

EZEQUIEL

AWTELAX YA' EZEQUIEL YU YALNI ISTZOTI' KOMAM DIOS

(1:1—3:27)

Yil ya' Ezequiel isq'aq'al yip Komam Dios

1 ¹Hanin Ezequiel inti'an ayinikojan xol eb'naj ah Judá ilaxto preso b'ey Babilonia. Haxa yet 30 (islahonheb' iskawinaj) hab'il, yinh ishoweb' tz'ayik, yinh iskanh ixahaw yet ayinan isti' ha' Quebar, ishajni isb'a satkanh yinh insatan, isyeni Komam Dios hunteq'an haka' wayike wil-a'an. ²Hayet howeb'xa hab'il yilaxto ya' rey Joaquín preso Babilonia yinh hune' ixahaw tu', ³yul istzoti' Komam Jahawil wetan, hanin sacerdote Ezequiel inti'an, isk'ahol ya' Buzi; yet ayinan sat istx'otx' eb'naj caldeo isti' ha' Quebar, yanayo Komam Jahawil isq'ab' wib'anhan.^a

⁴Wilnihan istit hune' niman howla jaq'eq' yinh yetk'ulal norte yeb' hune' niman moyan ayko q'a q'a' yinh, xanhe chitzejla yinhla ishoyan-il, haxa xolb'al hune' moyan b'ay ayko q'a q'a' tu' wilan hune' tzet ye tu' kaw chijepla haka' ch'en bronce chitzejtzoni.^b ⁵Haxa xolb'al hune' q'a' tu' wilan yechel kanhwanh eb'naj haka' jilni anma. ⁶Hunun eb'naj tu' ay kanheb' sat yeb' kanheb' xik'. ⁷Wal yoj eb'naj kaw tohol, haxa ispaq'an-il yoj eb'naj lahan haka' yisq'aj yoj wakax, chitzejla yinh eb'naj, haka' ch'en bronce kaw nhijb'ililo istz'ilal. ⁸Aypaxo kanheb' isq'ab' eb'naj haka' isq'ab' anma, ayko yinh iskanheb'al isq'axq'epal isnimanil yalanh isxik', kanheb' issat eb'naj yeb' kanheb'paxo isxik' eb'naj. ⁹Ha' isxik' eb'naj chis-chale isb'a hunun, hayet chib'elwi eb'naj machi meltzo eb'naj yintaj, wal xin satanhetik'a eb'naj chib'elwi. ¹⁰Ha' issat eb'naj tu' hak ti' jilni haka' ti': Ha' sataj, sat winaj jilni, haxa yinh iswatx', sat b'alam jilni, haxa yinh ismek, lahan jilni haka' sat wakax, haxa yintaj, lahan jilni haka' sat no'

^a **1:2-3** B'ey ti' mach chala b'ay ch'i'ichiti hunteq'an treinta hab'il, ay eb'naj juxhta ti' chalni ta hunteq'an hab'il ti' ha' ishab'ilal ya' Ezequiel. Yinh hune' tiempohal tu' ichiko ya' munil yinh sacerdotahal, eb'ya' sacerdote treinta hab'ilxa yet chi'ok yinh ismunil.

^b **1:4** Hune' chitzejtzoni. Hak tu' chu isyenilo isb'a Komam Jahawil, Is. 9:2; Is. 60:1-3. Chilahanb'anelax yulb'al isq'aq'al yip Komam haka' yet chisajb'iloj yet chi'ahilo yoj tz'ayik.

t'iw. ¹¹Hak tu' jilni sat eb'naj tu'. Ha' hunun eb'naj tu' leyankanh kab'eb' isxik' eb'naj, chischalen isb'a hunun, haxa kab'eb'xa isxik' eb'naj xin ha' ayko yenhelo isnimanil. ¹²Kaw tohol isb'elwi hunun eb'naj sataj b'ay chi'ijb'alaxto eb'naj yu Yespíritu Komam Dios; hayet chib'elwito eb'naj tu' matxa chimeltzo eb'naj yintaj. ¹³Ha' xol eb'naj tu' ay hune' tzet ye tu' ti' lahan jilni haka' tzaq'aq' kaw kaj txaltxonhe q'a' yinh, yeb' xin lahan jilni haka' tzejtah ayko q'a' yinh ch'ek' xolb'al eb'naj, ha' hune' q'a' tu' kaw toxanhe chitzejlahi, kat yelti k'uh chijepla xol. ¹⁴Ha' hune' q'a' tu' kaw yinh anhe chi'ek'i, kat ismeltzo haka' yek' isjepla k'uh.

¹⁵Hayet wilnihan eb'naj tu', wilnihan sat tx'otx', ayko hunun haka' jilni rueda isq'axq'ep hunun eb'naj kanhwanh tu'. ¹⁶Ha' hunteq'an rueda tu' lahannhe jilni, yeb' xin kaw chitzejla haka' ch'en crisólito, haka'tanhe xin ay hunteq'anxa rueda ayikto yul hunteq'an rueda tu'. ¹⁷Hayet chib'elwi chisje isb'elwi yinh iskanheb' isq'axepal isk'ul, mach yilalo chismeltzo isb'a. ¹⁸Ha' isarohal hunteq'an rueda tu' kaw nahat yekanh, kaw chonh-xiw jilni, ay xin isb'aq' sat yinhla ishoyanil iskanheb'al.

¹⁹Hayet chib'elwi eb'naj, kat isb'elwipaxo hunteq'an rueda tu' yeb' eb'naj, hayet chi'ah eb'naj sat tx'otx', kat yahpaxo hunteq'an rueda tu' sat tx'otx'. ²⁰Ha' eb'naj tu' chito eb'naj b'ay chi'ilaxto yu Yespíritu Komam Dios, hakpax tu' xin hunteq'an rueda tu', chitopaxo yinta eb'naj, yuto ha' yespíritu eb'naj ayko yinh hunteq'an rueda tu'. ²¹Hayet chi'ek' eb'naj, kat yek' hunteq'an rueda tu', haxa yet chi'ok linhno eb'naj, kat yokpaxo linhnoj. Hakpax tu' xin yet chi'ah eb'naj sat tx'otx' chi'ahpaxo hunteq'an rueda yinta eb'naj, yuto ha' yespíritu eb'naj ayko yinh hunteq'an rueda tu'.

²²Ha' yib'anh iswi' eb'naj tu' ay hune' tzet ye tu' leyantoj, xanhe chitzejtzoni haka' ch'en cristal, kaw k'ulch'ankano jilni. ²³Ha' yalanh hune' leyanto haka' jilni ch'en cristal tu', kaw tohol chiyutekanh eb'naj xik', chischalen isb'a xik' eb'naj, haxa kab'eb'xa xik' ha' ayko yenhelo isnimanil. ²⁴Hayet chi'ek' eb'naj kaw chib'ili xik' eb'naj haka' ishaxon ha' nime ha', haka' yul isnuq' Komam Dios sunil chisje yu, lahanpaxo jab'en haka' iswejcha hunb'ulan anma, yeb' xin haka' isb'ili yek' hunb'ulan eb'naj soldado. Hayet ch'ok linhno eb'naj tu' chiyinayo eb'naj xik'.

²⁵Hayet ch'ok linhno eb'naj kat yinayo eb'naj isxik' tu', ch'ab'elax hune' yul nuq'e chi'elti yib'anh hune' haka' cristal leyanto yib'anh iswi' eb'naj. ²⁶Ha' yib'anh hune' haka' cristal leyanto yib'anh iswi' eb'naj, wilan hune' yechel tz'onhob'al haka' jilni ch'en zafiro, ha' yul hune' yechel tz'onhob'al tu' tz'onhan hune' mak haka' anma jilni. ²⁷Ha' hune' mak tz'onhan tu' ha' yikta isnimanil chi'ichiko yinh yiktaj masanta yinh iswi', xanhe chitzejtzoni haka' ch'en bronce, haxa yiktaxa isnimanil chi'ichiko yinh yiktaj masanta chi'ayilo yinh yoj, lahan jilni haka' q'a' q'a' kaw kaj txaltxonhe, haxa yinhla ishoyanil xanhe chitzejtzoni. ²⁸Haka' jilni

yelawil no' ch'er yet chaq'ni ha' nhab', hak tu' jilni yelawil yinhla isho-yanil. Hak tu' yu wilnihan isq'aq'al ismay Komam Jahawil.

Hayet wilnihan isq'aq'al ismay, way jahnojan, way xulnojan sat tx'otx', wab'enan yul isnuq' hune' mak chitzoteli.

Awtelax ya' Ezequiel yu Komam Dios

2 ¹Yalni hune' yul nuq'e tu' wetan: «Hach isk'ahol naj winaj, ahanh-linhnoj, kat intzotelan tawet,» xhi wetan. ²Hayet lanhan istzotel wetan, yul Espiritu winhan yaq'ni yip wojan inlinhb'an hinb'ahan, wab'enan istzotel hune' yul nuq'e tu' wetan.

³Yalni: «Hach isk'ahol naj winaj, haninti'an chachinchejtojan xol eb'naj hawet konhob' Israel, ha' hunteq'an anma tu' kaw mach yijemoj, ok manhk'omal, haka'tik'a ismanhk'omal yichmam eb'naj wetan payxa, hak tu' ismanhk'omal eb'naj wetan tinanh. ⁴Haninti'an chachwatojan xol eb'naj uninale kaw lut'kanoj, yeb' kaw kawkano yanma, chawalni tet: “Hak ti' yalni Komam Jahawil wetan,»^c kachi tet eb'naj. ⁵Ta chab'eto eb'naj tzet chawala maka machoj yilal hawalni, yuto ha' hunteq'an anma ti' kaw manhk'omkanoj, yaja' xin chisnati eb'naj yet b'aq'inh ta inchejan inchejab'an xol eb'naj. ⁶Hach isk'ahol naj winaj, mach chaxhxiw tet anma tu', matzet chal hak'ul yinh tzet chal eb'naj tawet, waxanhka haka'ta xol te' tx'ix yeb' xol no' k'olotx ayach, matzet chal hak'ul. Mach chaxhxiw yinh tzet chal eb'naj tawet, mach chaxhxiwpaxo tet eb'naj, yuto ha' hunteq'an anma tu' kaw manhk'omkanoj. ⁷Yuxin yilal hawalni intzoti'an tet anma tu', ta chab'e maka machoj, yuto kaw hip yinh hunelnhe. ⁸Yaja' wal hach ti', hach isk'ahol naj winaj, ab'e tzet chiwalan tawet, mach manhk'omo chawute hab'a haka' hunteq'an anma tu'. K'ab'kanh hati' kat halonayto tzet chiwaq'an tawet,» xhi Komam wetan.

⁹Lahwi tu' wilnihan hune' q'ab'e, b'atxanti yinh insatan, iq'b'il hune' hum chulb'ilayo yul isq'ab'. ¹⁰Isholnito hune' hum tu' yinh insatan. Ha' hune' hum tu' tz'ib'nheb'il yul yeb' yintaj. Ha' yinh hune' hum tu' tz'ib'nheb'ilayo b'isk'ulal, isya'tajil, yeb' oq'il.

3 ¹Yalni wetan: «Hach isk'ahol naj winaj, loto hune' hum ayko tasata ti', kat hato hawalno hunteq'an tzoti' ti' tet anma Israel,» xhi wetan. ²Ink'ab'nikanh inti'an, yaq'ni Komam hune' hum tu' inlob'o'an.

³Yalnipaxo wetan: «Hach isk'ahol naj winaj, b'iq'ayto hune' hum chiwaq'an halob' ti', kaw kamojab' chinoh hak'ul,» xhi wetan. Hak tu' yu inlonitojan, kaw chi'eliko yul inti'an yu, haka' ischi'al no' kab'.

⁴Yalnipaxo wetan: «Hach isk'ahol naj winaj, Asi' xol hawet konhob' Israel, kat hawalni tzoti' chiwalan tawet tet eb'naj, ⁵yuto mach

^c 2:4 Chachwatojan. Hune' ismunil eb'naj profeta yinh yalni istzoti' Komam Dios kaw niman yelapnoj. Is. 6:8; Jer. 1:7; Am. 7:15.

chachinchejtojan xol anma ya'taj isnachalo yab'xub'al hawu, wal xin xol hawet konhob' Israel, chachinchejtojan. ⁶Mach chachinchejtojan b'ey hunu niman konhob' b'ay kaw ay tx'i'al anma ya'ta istxumchalo yab'xub'al hawu, yaja' ta chachinchejtojan xol anma tu', chimyab'e eb'naj tzet chawala. ⁷Yaja' wal hawet konhob' Israel tu' mach chiyoche yab'e' tzet chawala, yuto mach choche yab'e' tzet chiwalan; yuto mach chib'ili sat yinh tzet chiwalan, yeb' xin kaw kaw yanma. ⁸Haninan chiwaq' howb'ojan hasat yinh sat eb'naj, yeb' xin kaw kaw chawute hab'a sata eb'naj. ⁹Ek'na kaw pehponhe chiwutehan hapalanh haka' ch'en diamante. Yuxin matzet chal hak'ul, yeb' xin mach chaxxhiw sata eb'naj, yuto ha' eb'naj Israel tu' kaw hip eb'naj,» xhi Komam wetan.

¹⁰Yalnipaxoj wetan: «Hach isk'ahol naj winaj, kaw kam chawab'e tzet chiwalan tawet, chak'ub'an sunil intzoti'an yul hawanma. ¹¹Chaxhto hawala' intzoti'an tet hawet konhob' ayko preso, ta chab'e eb'naj maka machoj, yilal hawalni haka' ti': «Hak ti' yalni Komam Dios, Jahawil,» kachi,» xhi Komam.

¹²Kinyinikanhan Yespíritu Komam Dios, wab'enan hune' yul nuq'e awi yinh kaw ip, wintajan, yalni: «Hal-laxojab' k'ul-la tzoti' yinh Komam Jahawil b'ay aya, Komam kaw aykano ismay isq'aq'al,» xhi. ¹³Wab'enpaxojan isb'ili xik' eb'naj haka' anma tu' yet chischalen isb'a, yeb' isb'ili hunteq'an rueda ayko sata eb'naj, kaw aykano ismay isnhirnhoni. ¹⁴Kinyinikanhan Yespíritu Komam Dios, kinyinitojan. Hayet intohan kaw b'isk'ulal yehilo wanmahan, yeb' xin kaw ayti inhowalan, yaja' kaw ip ay isq'ab' Komam Jahawil wib'anhan. ¹⁵Wapnihan xol wet konhob'an ayko preso b'ey Tel-abib ay isti' ha' Quebar, way tz'onhnojan b'ay tz'onhan eb'naj, wokan yinh k'ayk'ulal matxa chinawi wuhan tzet chiwalan, inkankanojan hujeb' tz'ayik xol eb'naj.

Alaxiko ya' Ezequiel majwawomal xol anma Israel

(Ez. 33:1-9)

¹⁶Haxa yet yek'to hujeb' tz'ayik tu' xin, yul istzoti' Komam Jahawil wetan, yalni haka' ti': ¹⁷«Hach isk'ahol naj winaj, haninan chaxhwakojan majwawomal xol anma Israel, hayet chiwalnihan hune' tzet ye tu' tawet yilal hawalnilo tet konhob' ti' yunhe yohtanheniloj. ¹⁸Hayet chiwalnihan tet anma tx'oj isb'eyb'al ta chitit kamikal yib'anh yu istx'ojal, yaja' wal hach xin ta matzet chawal tet, yeb' xin mach chachkachwa yinh yunhe isb'ejni iswatx'en istx'ojal, hak tu' xin ay iskawil; ha' hune' mak tu' chikam yu ismul, yaja' iskamikal naj tu' xin chiwakojan tawib'anh. ¹⁹Yaja' ta chachkachwa yinh mak chiwatx'en istx'ojal, yaja' ta mach isb'ej iswatx'en istx'ojal, machi xin chishel isb'eyb'al, ha' hune' mak tu' chikam yu ismul, yaja' hach xin matxa hawok yinh iskamikal, yuto kaxhkachwa yinh.

²⁰»Ta ay hunu mak chitik'a iswatx'e istoholal, yaja' ta chispohilo isb'a yinh istoholal, kat iswatx'enpaxo istx'ojal, chiwanikojan hunu tzet b'ay

chitxaq'mohi; ha' hune' mak tu' chitit kamikal yib'anh, yuto mach kach kachwa yinh. Matxa xin chinnatijan isk'ulal iswatx'e yet yalanhtokano tu', chikam naj yu ismul; yaja' ha' iskamikal hune' mak tu' tawib'anh chitokanoj yuto mach kaxhkachwa yinh. ²¹Yaja' ta chakach mak chitik'a isb'eyb'alne istoholal yunhe mach chako ismul, mach xin chako ismul, ha' hune' mak tu' yinh kaw yeli ay isq'inal yuto kaxhkachwa yinh, wal hach ti' xin hakolilo hab'a,» xhi Komam wetan.

Ya' Ezequiel matxa yu istzotel ya' hanik' tiempo

²²Hayet ayinan b'ey tu' yanayo Komam Jahawil isq'ab' wib'anhan, yalni wetan: «Ahanhwanoj kat hawelto yintalto konhob', ha' tu' chintzotelan tawet,» xhi Komam. ²³Wahwanojan, weltojan yintalto konhob', wilnihan isq'aq'al ismay Komam Jahawil b'ey tu', haka' isq'aq'al ismay wilan b'ey isti' ha' Quebar. Hayet wilnihan isq'aq'al ismay Komam tu', way jahnojan, way xulnojan sat tx'otx'.

²⁴Yinhnhena tu' yul Espiritu winhan, yaq'ni yip wojan inlinhb'an hinb'ahan, istzotel Komam wetan haka' ti': «Asi' kat hamajchen hab'a yul hawatut. ²⁵Hach isk'ahol naj winaj, hach ti' chachk'alb'alaxayo yu tx'anh lasu yul hawatut, hak tu' xin mach chu hawelto xol hawet konhob'.

²⁶Yeb'paxo xin ch'ahkanto lak'no hawaq' yul ishomal hati' wuhan; hak tu' xin matxa chu hatzoteli, yunhe matxa chu hakachni hunteq'an anma ti'; anma kaw manhk'omkano, kaw hip yinh hunelnhe. ²⁷Yaja' hayet chintzotelan tawet hunelxa, chaxhwaq'ni tzotelojan, kat hawalni tet anma ti': “Hak ti' yalni Komam Dios, Jahawil,» kachi. Ha' mak choche yab'e', yab'ehab'i; haxa mak mach choche yab'e', machojab' chab'e, yuto ha' hunteq'an anma ti' kaw manhk'omtik'a,» xhi Komam.^d

2. TZOTI' YAL KOMAM DIOS YIB'ANHILO YAYK'AYKANO JERUSALÉN

(4:1—24:27)

Yechel yayk'ayb'anil konhob' Jerusalén

4 ¹Yalni Komam wetan: «Hach isk'ahol naj winaj, iti hunu tx'otx' lok', chawanayo tx'otx' yinh hasat, chatz'ib'nhenayo yechel konhob' Jerusalén yib'anh tx'otx'. ²Chahoyb'aniko yechel eb'naj soldado iq'b'il isch'en yet howal yinhla ishoyanil, chawanayo campamento sataj, chawanayo ch'en ariete chi'uchk'anto ch'en k'ub' yinhla ishoyanil. ³Chawiniti hunu ch'en lamina kaw pim, chawaniko ch'en haxolb'al yeb' konhob', yechelo ch'en k'ub' chukoj, kat hawok sata konhob' tu', haka'to

^d 3:22-27 Hunteq'an versículo ti' chitzotel yinh hune' yab'il kaw how ok yinh ya' Ezequiel, matxa yu istzotel ya', matxa ek'paxo ya' yala' istzoti' Komam Dios.

chawako howal yinh. Ha' hune' ti' yechelnhe chiwaq'an tet anma Israel yinh tzet chu yuchk'alaxto konhob' Jerusalén.^e

⁴»Lahwi tu' kat haway hilno yinh yetk'ulal hamekq'ab', hak tu' chu yayk'ay ismul konhob' Israel tawib'anh. Ha' yulb'al tz'ayikal chachway yinh yetk'ulal hamekq'ab' tu', chi'ay ismul anma Israel tawib'anh. ⁵390 tz'ayik chiyu hun tu', chal yelapnoj; hunun tz'ayik yinh hunun hab'il chi-yab'e anma Israel isya'il yu ismul.

⁶»Hayet xa'ek'to hunteq'an tz'ayik tu' xin, kat hawaypaxo yinh yetk'ulal hawatx'q'ab' yulb'al 40 (kawinaj) tz'ayik, hak tu' chu yayk'aypaxo ismul anma ah Judá tawib'anh, hunu tz'ayik yinh hunun hab'il chiyab'e anma isya'ilal yu ismul. ⁷Chaxhokt'anhno yinh yechel konhob' Jerusalén b'ay hoyaniko eb'naj ayko ishowal yinh, chab'alnikanh isq'ab' hakamixh, hak tu' chu hawinilo yenhel haq'ab', kat hawichiko hawalni tzoti' chiwalan tawet yinh konhob' Jerusalén. ⁸Haka'to chaxhink'alayojan yu lasu, mach chu hameltzon hab'a, masanto chitz'ajna istz'ayikal b'ay chawab'e isya'tajil.

⁹»Chawinito ixim trigo, ixim cebada, te' habas, te' haka' hub'al, yeb' te' avena, soman chu yayto yul hunu xi, ha' xin chawatx'e halob'. Ha' hunteq'an tu' chaloh yulb'al hilan hach yinh yetk'ulal hamekq'ab' yulb'al 390 tz'ayik. ¹⁰Yiktanhe libra yalil tzet chaloh yinh hunun tz'ayik, yeb' xin aynhe yorahil b'ay chachwa'i. ¹¹Chimalelaxpax ha ha' chawuk'u, yiktanhe litro ha' chawuk' hunun tz'ayik, yeb' xin aynhe yorahil b'ay chawuk' ha'. ¹²Chawatx'e hapan cebada, chaq'antzen xol q'a' yinh sat anma, yaja' ha' istza' anma chi'okniko si'al hawu,» xhi Komam.

¹³Yalnipaxo Komam Jahawil: «Chaloh hunteq'an itah tz'il, yu hayeni sata anma Israel ta ha' itah tz'il chislo xolaj anma ay yulajla nimeta konhob' b'ay chiwaq' sajlemotojan anma,» xhi Komam.

¹⁴Intaq'wihan tet Komam: «Mamin, Dios Wahawil, haninti'an mach tz'ilo wanmahan, yinhtax intzehalan masanta tinanh, maxhto hunelo ti' xa'ink'uxan ischib'ehal no noq' tonhe chikamkanh, maka ischib'ehal no chixitlaxkamo yu no noq', maxhto hunel ti' xa'ink'uxan ischib'ehal no noq' mach sajo haka' yalni ley,» kinchihan.

¹⁵Istaq'wi Komam wetan: «Ta hak tu', chisje yokniko istza' no' wakax si'al hawu selelo istza' anma chal tu', yet chatahtzen tzet chaloh,» xhi wetan.

¹⁶Tzujan tu', yalnipaxo Komam: «Hach isk'ahol naj winaj, haninan chiwayojan wahil yib'anh anma ay b'ey Jerusalén, ha' tzet chislo hunun

^e 4:1-3 Yet yicheniko ya' profeta Ezequiel ismunil, ha' tzet b'ab'el yalik'o ya', ha' yinh yet chi'uchk'alaxayo konhob' Jerusalén, yeb'paxo Yatut Komam, yu ismul anma ah Judá yeb' konhob' Jerusalén. 2Rey. 24:8-17. Yeb'paxo xin yal ya' ta nahatil chi'ek' anma b'ay ilaxto preso tu'.

tz'ayik chimalelaxi, kaw ch'ek'ya' yu isya'tajil, hakpax tu' ha ha' chuk' anma, yinh mal ch'aq'lax ha' tet, kaw xin yinh xiwkilal chiyu yuk'ni ha'.¹⁷Hayet chiyaq'len anma wahil yeb' tajinti'al, chilat'anhxiko yinh sat hunun yinh xiwkilal, kat istanhkanilo yu ismul,» xhi Komam.

5¹Yalnipaxo Komam Jahawil wetan: «Hach isk'ahol naj winaj, iti hunu ch'en cuchillo kaw ay ye, yeb' hunu ch'en navaja chi'okniko yu eb'naj chi'inilo xil wi'e, chak'upnilo xil hawi' yeb' xin xil hati'. Lahwi tu' chawiniti hunu malb'al, chamalen xil hawi' tu', ox majan chawute hamaleni.²Chanhusni hune' majan xil hawi' yul yiktab'anil konhob' Jerusalén yet xatanh yalaxiko howal yinh Jerusalén, haxa hunxa majan xil hawi', chak'upayo yu ch'en espada yinhla ishoyanil konhob', haxa hunxa yox majan, chatixhkanh xol jaq'eq'. Haninti'an chiwitijan ch'en espada yinh anma ah Jerusalén ti'.³Chasik'niti hanik'o xil hawi' tu', chaximniko yinh isti' xil haq'ap.⁴Lahwi tu', chawinilo hanik'o xil hawi' ximb'iliko yinh isti' xil haq'ap, chanhusnito xol q'a', hak tu' chu yelti xaj q'a q'a', kat isto q'a' yinh sunil konhob' Israel,» xhi Komam.

⁵Hak ti' chu yalnipaxo Komam Dios Jahawil: «Ha' xil hawi' hak'upiloj, yechel Jerusalén yehi, ha' Jerusalén wakojan yiktab'anil nimeta konhob', hoyb'ilayo yu nimeta konhob' ay sat tx'o tx'otx' ti'.⁶Yaja' xin ismanhk'o anma ah Jerusalén inleyan yeb' chejb'anile waq'an tet, kaw xin ek'na tx'oj isb'eyb'al sata anma ay yulajla nimeta konhob', yeb' anma ay yulajla konhob' ayko yinhla ishoyanil, yuto ha' anma ah Jerusalén yintanhekanilto inleyan yeb' chejb'anile waq'an tet, hak tu' xin mach isb'eyb'alnhe,» xhi Komam.

⁷Yuxin hak ti' yalni Komam Jahawil haka' ti': «Hex ah Jerusalén, kaw ek'na hemanhk'omal sata anma ay yulajla nimeta konhob' ayko yinhla hehoyanil, mach heb'eyb'alnhe chejb'anile waq'an teyet, mach hek'ub'a-paxo inleyan. Mach xin heyijepaxo isleyal nimeta konhob' ayko yinhla hehoyanil.

⁸»Yuxin hanin Yahawilinti'an, haninan, chiwalan: Haninti'an chinokan howal teyinh hex ah Jerusalén. Ho', haninan chiwayojan isya'tajil texol yinh sat anma ay yul nimeta konhob'.⁹Ha' isya'tajil chiwayojan teyib'anh yu isyabh'etajil chewatx'e maxhto hunelo ti' xayuhi, yeb' xin matxa b'aq'inhal chiwatijan yet chilahwi yaykano teyib'anh.¹⁰Ha' texol hex ah Jerusalén, chisk'uxayto eb'naj mame yeb' eb'ix mi'e yuninal, haxa eb'naj uninale, chisk'uxayto eb'naj ismam yeb' ismi'. Chiwayojan isya'tajil teyib'anh, haxa mak chikankano texol chisajlemito wuhan yulaj konhob' sunil b'ayejtu'wal.¹¹Hanin Dios Yahawilinti'an, itzitz hinan, yinh kaw yeli chiwalan, hex ti' heyilo ispixan watutan yu sunil hunteq'an isyabh'etajil hewatx'e, yuxin chiwayojan isya'tajil teyib'anh, matxa chiwaq' nimank'ulalan teyinh, mach xin chitz'aypaxo ink'ulan teyinh.¹²Hune' yox majan hex ah Jerusalén chechkam yul hekonhob' yu howla yab'il, yeb'

yu wahlil. Haxa hunxa yox majan hex xin chexpotx'laxkamo yu espada yinhla ishoyanil konhob', haxa hunxa yox majan hex xin chexsajlemi-to wuhan yulaj konhob', sunil b'ayejtu'wal, yaja' xin chinok tzujnojan teyintaj yeb' ch'en espada.

¹³»Chiyij isb'a wanayojan inhowalan yib'anh eb'naj ah Jerusalén, chiwanayojan isya'tajil yib'anh katto wokan yinh aq'ank'ulal. Hayet chiyijni isb'a yay inhowalan yib'anh eb'naj, chiyochtanheno eb'naj ta hanin Yahawilinti'an walan hunteq'an ti' yu sunil hinhowalan, yuto xahan ay eb'naj wuhan.

¹⁴»Kaw chitz'inhz'onkano konhob' Jerusalén wuhan, kat yokkano yinh tx'ixwilal sata anma ay yulaj konhob' ayko yinhla ishoyanil yeb' yinh sat sunil makta ch'ek'to iskawilal Jerusalén. ¹⁵Ha' Jerusalén kaw chib'uchlaxi, kat istzeyelaxi yet chiwanayojan isya'tajil yib'anh yet chitit inhowalan yinh. Ha' hune' ti' chiwaq'an yila' anma ayko yinhla ishoyanil, yu yaq'ni yul iswi', kat isxiwkanh yilni. Hanin Yahawilinti'an, hankawinan chiwalan hunteq'an ti'. ¹⁶Haninan chiwatojan wahlil texol hex ah Jerusalén, haka' chu isq'ojwa te' lit' kaw ay ismay. Ha' hune' wahlil tu' kaw chiyiq'kanokan yip, kat hetanhkanilo yu, yuto matxa tzet chilolax yul konhob'. ¹⁷Chiwatojan wahlil texol, hex ah Jerusalén, chiwanipaxtojan no' howla noq' teyinh, yu kexisixitnikamo no', chiwanipaxtojan howla yab'il texol, kat hepotx'laxkamo xol howal. Haxanhe chik' chimalik'o yul konhob' Jerusalén. Ha' hunteq'an ti' haninan Yahawilinti'an, hankawinan chiwalan,» xhi Komam.

Hal-lax isya'tajil chi'ay yib'anh ej wonhan ay b'ey Jerusalén

6 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, t'anhxanhto yinh ej wonhan ay b'ey Israel, kat hawalni isya'tajil chi'ay yib'anh.^f ³Chawalni: «Hex wonhan ay b'ey Israel, ab'ewe tzet chiyal Komam Dios, Jahawil yinh ej wonhan, yeb' yinh ha ha' ch'el yojomal, yeb' yinh ej ak'al; chalni Komam haka' ti': Chiwatojan howal teyinh, chiwuchk'antojan b'ay nahat yekanh b'ay cheyiyo heb'a sata tioxh. ⁴Ha' mexha b'ay chenus hexahanb'al chi'uchk'alaxkantoj, kat ismaq'laxpoho istioxhal tz'ayik, chiwaq'nikamojan eb'naj winaj sata hetioxh tu'. ⁵Chiwakojan henimanil hex Israel hex ti' yet kamom hexxa sata hetioxh yeb' xin xanche ch'ek' pak'la heb'ajil yinhla ishoyanil ismexhahil yet xahanb'al. ⁶B'ajxanhetu'wal konhob'al chextohi, chi'uchk'alaxtoj, kat yuchk'alaxto b'ay nahat yekanh b'ay cheyiyo heb'a tet hetioxh. Chi'uchk'alaxkantoj yeb' xin kaw chitz'inhzt'onkanoj, kat ismaq'laxpoho hetioxh,

^f 6:2 Ya' profeta Ezequiel chitzotelto ya' yib'anh hunteq'an witz ay b'ey tx'otx' Israel b'ay iswatx'ekanh eb'naj Israel isxahanb'al tet istioxh yeb' xin yinh hunteq'an wonhan b'ay yiyo isb'a eb'naj tet hunteq'an tioxh mach diosoj. Ez. 6:3-4; 1Rey. 3:2.

kat istanhkaniloj. Chimaq'laxpoho istioxhal tz'ayik, kat istanhkanilo sunil tzet watx'eb'il heyu. ⁷Hayet cheyilni yayk'ay anma chipotx'laxkamo texol, cheyohtanheniloj ta haninti'an Yahawil hinan.

⁸»"Yaja' ayto haywanhexxa chexwakanojan, chexkolcha tet ch'en espada; ha' ton hex tu' chexsajlemito xolaj nimeta konhob'. ⁹Hex chexkolcha tu' chinhenatijan yulaj nimeta konhob' b'ay chexilaxto preso, yuto wab'ehan isya'il yet hepohnilo heb'a winhan, heyaniko heyanna yinh hetioxh, heyok tzujno yintaj. Chextx'ixwikanh teyinh yu istx'ojal hewatx'e yeb' yu heb'eyb'al kaw yahb'etaj. ¹⁰Cheyohtanhelej ta haninan Yahawil hinan, mach nab'nheho chintzotelan ta chihul hunteq'an isya'-tajil teyib'anh," kachi,» xhi Komam.

¹¹Yalnipaxo Komam Dios Jahawil haka' ti': «Chatzaq' haq'ab', chatinhnayo hawoj, chawalni: "¡Ay, kaw k'anch'an anma Israel, yuto chi'ay isya'tajil yib'anh yu sunil isyahb'etajil chilaiswatx'e! Ay mak chipotx'laxkamo yu espada, ay mak chikam yu wahil, aypaxo mak chikam yu howla yab'il. ¹²Ha' mak nahat ayah chikam yu howla yab'il, haxa mak kawil ayah chipotx'laxkamo yu espada, haxa mak chikankano yul konhob', ha' wahil ch'aq'ni kamoj, yuto ch'ahlaxiko howal yinh konhob'," kachi. Hak tu' chu yijni isb'a yay inhowalan yib'anh anma. ¹³Cheyohtanhelej ta haninti'an Yahawil hinan yet cheyilni anma kamom, xanhepak'b'onb'atoj xolaj hetioxh yeb' yinhla ishoyanil ismexhahil yet xahanb'al b'ey iswi'la wonhan nahat yekanh, b'ey iswi'la witz yeb' yichla te' nimeta q'eb'taj, yeb' yichla te' nimeta hih, b'ay henhus te' pom tet sunil hetioxh. ¹⁴Chiwikanh inq'ab'an teyinh, chiwanayojan isya'tajil teyib'anh b'ayejxanhetu'wal chexehayoj. Chinmeltzokojan hetx'otx' tu' yinh haka' tx'otx' machi yahaw, yeb' xin kaw ek'b'al chitz'inhtz'onkanoj haka' tx'otx' desierto chi'apni b'ey Diblat. Hak tu' chu heyohtanheniloj ta haninti'an Yahawil hinan,» xhi Komam.

Chihul islahob'al tz'ayik

7 ¹Tzotel Komam wetan, yalni haka' ti': ²«Hach isk'ahol naj winaj, hanin Dios, Yahawilinti'an, hankawinan chiwalan tet anma Israel: "Lanhan yul islahob'al tz'ayik,

lanhan yul islahob'al tz'ayik yib'anh iskanheb'al istxikin yul sat yib'anhq'inal ti'.

³Wal tinanh hex ah Israel, xa'apni islahob'al tz'ayik b'ay chi'ay isya'-tajil teyib'anh,

chiwayojan inhowalan teyib'anh.

Hatatik'a tzet heb'eyb'alnhe, hak tu' chu wilnihan yinh tzet chexelikoj,

chiwayojan isya'tajil teyib'anh yu sunil isyahb'etajil hewatx'e.

⁴Mach chiwaq' nimank'ulalan teyinh, yeb' xin mach chitz'aypaxo ink'ulan teyinh.

Chiwayojan isya'tajil teyib'anh yu istx'ojal cheb'eyb'alnhe,
 chetohlan sunil isyahb'etajil chilahewatx'e,
 hak tu' chu heyohtanheniloj tato haninan Yahawil hinan," xhi
 Komam.

5»Yalnipaxo Komam Dios Jahawil haka' ti':

¡Ay hune' isya'tajil, ha' hune' isya'tajil ti' xin, lanhan yuli!

6 ¡Lanhan yul islahob'al tz'ayik, lanhan yuli.

Xa'el iswayanh yu chul yaq'a'ko howal teyinh. Yinh kaw yeli chuli!

7 ¡Lanhan yul istz'ayikal b'ay chi'ay isya'tajil teyib'anh, sunil hex ay
 hex sat tx'o tx'otx' ti'.

Lanhan yul hune' tiempo b'ay chi'ay isya'tajil. Lanhan ishitzti
 hune' tz'ayik tu'.

Ha' yinh hune' tz'ayik tu' chiwejchakanh anma yu xiwkilal, matxa
 tzalahilal iswi'la wonhan!

8 Wal tinanh, kaw toxa chiwayojan inhowalan teyib'anh,
 masan chiyij isb'a yay inhowal tu'an.

Hatatik'a tzet heb'eyb'alnhe, hak tu' chu wilnihan yinh tzet
 chexelikoj,

chiwanayojan isya'tajil teyib'anh yu isyahb'etajil chawatx'e.

9 Mach chiwaq' nimank'ulalan teyinh, yeb' xin mach chitz'aypaxo in-
 k'ulan teyinh,

wal xin chiwayojan isya'tajil teyib'anh yu istx'ojal cheb'eyb'alnhe,
 chetohla isyahb'etajil chilahewatx'e.

Hak tu' chu heyohtanheniloj ta hanin Yahawilinti'an,
 haninan chiwayojan isya'tajil yib'anh makta chiwatx'en istx'ojal.

10 ¡Lanhan yayilo istz'ayikal b'ay chi'ay isya'tajil teyib'anh,
 ha' hune' tz'ayik tu', kaw yeli chuli!

Xa'apni yorahil b'ay chuli. Ha' istx'ojal kaw xayiq'kanokanh yip,
 yiq'nipaxokanh yip islolo'al anma.

11 Chiyiq'kanokanh yip istx'ojal yu howal,

matxa hunu mak ti' chikankano xol eb'naj chiwatx'en istx'ojal tu',
 waxanhka kaw niman eb'naj, yaja' matxa hunu yetb'i eb'naj
 chikani;

matxa hunu eb'naj chikani, yu yiq'ni b'isk'ulal.

12 Xa'apni istz'ayikal b'ay chi'ay isya'tajil, xa'apni hune' tz'ayik tu'.

Ha' mak chiloq'ni, machojab' chitzalahi, haxa mak chitxonhwi,
 machojab' ch'oq' yu b'isk'ulal yinh tzet istxonhtoj, yuto chi-
 wayojan inhowalan yib'anh sunil anma.

13 Yuto ha' mak chitxonhni hunu tzet ye tu', matxa chu ismeltzo tzet is-
 txonh yul isq'ab' hunelxa,

waxanhka itzitzto iskawanhil, yuto ha' isya'tajil xawalan ta chi'ay
 yib'anh hunteq'an anma kaw nimankano isb'isil ti',

- mach ch'ek'to yet yijni isb'a. Ha' makta chiwatx'en istx'ojal,
 machi hunu ti' chikolchahi.
- 14 Chi'oq'tzelax ch'en trompeta yu iswatx'en isb'a eb'naj winaj yinh
 howal,
 yaja' matxa hunu eb'naj chitit yinh howal,
 yuto wayo inhowalan yib'anh sunil hunteq'an anma kaw niman-
 kano isb'isil.
- 15 Ha' yintalto konhob' ay howal, haxa yul konhob' ay howla yab'il
 yeb' wahil,
 ha' mak ay xol ismunil chitejlaxkamo yu espada,
 haxa mak ay yul konhob' chikam yu wahil yeb' yu howla yab'il.
- 16 Ha' mak chikolchalo yul isq'ab' kamikal xol anma tu', ch'elkanh,
 kat isto yeb'ano isb'a iswi'la witz, haka' no' kuwis ch'ek' satla
 ak'al.
 Ha' sunil mak ch'elkanh tu' chiq'ajwi yinh hununtajil yu ismul.
- 17 Ha' sunil eb'naj winaj chipáxilo yip isq'ab' eb'naj,
 kat ispaxilo yip iswitx'i' sunil eb'naj haka' ha ha'.
- 18 Chiyanipaxiko eb'naj xilq'ape yet b'isk'ulal yinh,
 kat yul niman xiwkilal yib'anh eb'naj,
 kajpulpoxanhe chi'eliko sat eb'naj yu tx'ixwilal, chisk'upnilo
 eb'naj xil iswi'.
- 19 Toxanche chistixhto eb'naj isplata yulaj b'eh, matxa tzet chalilo yoro
 eb'naj.
 Ha' isplata yeb' yoro eb'naj mach chu iskolnilo ch'en eb'naj yul
 isq'ab' isya'tajil yinh istz'ayikal yet chi'ay inhowalan yib'anh
 eb'naj,
 mach chu yaq'ni noho ch'en yanma eb'naj, nitam yaq'ni noho
 ch'en isk'ul eb'naj yinh istz'ayikal isya'tajil;
 yuto ha' ch'en aq'ni ayk'ayo eb'naj tet istx'ojal.
- 20 Ha' yu isk'ulch'anil isq'alomal eb'naj, yuxin meltzokaniko eb'naj
 yinh lolo'al,
 iswatx'en eb'naj yechel isdios yinh isq'alomal tu',
 ha' ton hunteq'an tioxh kaw yahb'etaj,
 yuxin inmeltzokojan isq'alomal eb'naj yinh q'alemal.
- 21 Chiwakojan isq'alomal eb'naj tu' yul isq'ab' eb'naj nan konhob'al,
 chiyelq'anto eb'naj, chiwanipaxikojan istioxh eb'naj yul isq'ab'
 eb'naj
 winaj kaw tx'oj ay sat tx'o tx'otx' ti', chiyetankanto eb'naj, kat yel-
 kano ispixan.
- 22 Chinpohilo hinb'ahan yinh anma Israel, matxa chint'anhxikojan yinh,
 ha' watutan kaw ocheb'il wuhan chi'elkano ispixan, yuto chihul
 eb'naj yet howal,

- kat yokto eb'naj yul watutan, kat yetankanto eb'naj.
- 23 Watx'e hunu ch'en cadena, yuto ha' tx'otx' Israel ti' kaw nohna tx'otx' yu eb'naj potx'om anma, haxa konhob', kaw nohna yu istx'ojal.
- 24 Yuxin haninan chiwaq'tijan eb'naj winaj kaw tx'ojkano ay yulajla nimeta konhob', kat yokkano yatut anma Israel ti' yu eb'naj, kat intanhtzenkanil-ojan islolol'al eb'naj winaj kaw ay yip, kat yetalaxto yatut istioxh eb'naj, kat yelkano ispixan.
- 25 ¡Lanhanxa yul istz'ayikal b'ay chi'uchk'alaxto konhob'! Chissay anma aq'ank'ulal, yaja' matxa aq'ank'ulal.
- 26 Lanhantotik'a yay hune' isya'tajil, kat yul hune'xa isya'tajil, lanhantotik'a yal-lax tzoti' b'isk'ulal yoki kat yul yal-laxo hune'xa. Nab'xanhe chiyaq' eb'naj isq'amb'eb'al tet eb'ya' inchejab'an, yuto matxa tzet chiwaq'an yohtanheloj, matxa ley chiyal eb'ya' sacerdote, matxa kuyb'anile chiyaq' eb'naj ichamta winaj.
- 27 Naj rey chiyako naj xilq'ape yet b'isk'ulal yinh, haxa eb'naj yahaw konhob' chi'ok niman b'isk'ulal yinh eb'naj, kat isb'ilikanh isq'ab' sunil anma ay yul konhob' yu xiwkilal. Haka'tik'a isb'eyb'al, hak tu' chiwutehan eb'naj, haka' yu yilni eb'naj tzet eliko yet anmahil, hak tu' chu wilnihan yinh tzet chi'eliko eb'naj, hak tu' chu yohtanhenilo eb'naj tato haninti'an Yahawil hinan,» xhi Komam.

Yelax isyabh'etajil chiwatx'elax b'ey Jerusalén yila' ya' Ezequiel

8 ¹Ha' yinh isho' tz'ayik, yinh iswaj ixahaw yinh iswaj hab'il, tz'onhan hinan watutan yeb' eb'naj ichamta winaj ah Judá. Hayet tz'onhan intu'an, yanayo Komam Dios Jahawil isq'ab' wib'anhan. ²Yinh-nhena tu', wilnihan hune' mak haka' anma jilni, ha' yiktaj haka' q'a q'a' jilni masanta chi'ayapno yinh yoj, haxa yiktaxa isnimanil masanta chi'ahapno yinh iswi' kaw chitzejtzoni haka' ch'en bronce. ³Ha' hune' mak haka' jilni anma tu', yati isq'ab', yok tzab'no yinh xil inwi'an, kin-yinikanhan yu Espíritu xol jaq'eq', isyeni Komam Dios hunteq'an tzet ye tu' yinh sajsatil wila'an. Haka'to kinyitojan Komam b'ey Jerusalén, kin-yanayojan b'ey ispultahil yatut, hune' pulta ayko yinh yetk'ulal norte. Ha' b'ey tu' ay hune' tioxh aq'nitij ishowal Komam Jahawil. ⁴Ha' b'ey tu' wil-an isq'aq'al ismay Komam Jahawil, isDiosal Israel, haka' isq'aq'al ismay wilan yet b'ab'elal yet ayinan sat ak'al.

⁵Yalni Komam wetan: «Hach isk'ahol naj winaj, t'anhxanhto yinh yetk'ulal norte tinanh,» xhi Komam. Int'anhxitojan yinh yetk'ulal norte,

wilnihan hune' tioxh chi'aq'nitij ishowal Komam Jahawil b'ey isti' is-pultahil ismexhahil xahanb'al. ⁶Lahwi tu' yalni Komam wetan: «Hach isk'ahol naj winaj ζtom mach chawil hunteq'an nimeta isyahb'etajil chiswatx'e anma Israel ti'? Ha' yu tzet chiswatx'e ti' yuxin chinelan yul watutti'an, yaja' xin ayto hunteq'anxa nimeta isyahb'etajil chito hawila',» xhi Komam wetan.

⁷Lahwi tu' kinyinitojan amaq', wilnihan hune' holan yinh isk'ul ch'en k'ub'. ⁸Yalni Komam wetan: «Hach isk'ahol naj winaj, ha' hune' holan ti', aq' ch'ib'o yul,» xhi Komam wetan. Hak tu' yu inholnihan isk'ul ch'en k'ub' tu', wilnihan hune' pulta.

⁹Tzujan tu' yalni Komam wetan: «Okanhto yul pulta tu', chawilni isyahb'etajil kaw tx'ojkano chiswatx'e anma b'ey tu',» xhi Komam wetan. ¹⁰Woktojan xin, wilnihan isk'ul b'itz'ab' b'ay tz'ib'nheb'iliko yechel sunil no noq' chishatxik'o isk'ul, yeb' yechel no noq' mach sajo haka' yalni ley. Wilnipaxojan yechel sunil tioxh chiyal anma Israel isdiosaløj yinhla sunil ishoyanil isk'ul b'itz'ab' tu'. ¹¹Wilnihan 70 (lahonheb' iskanhwinaj) eb'naj ichamta winaj ah Israel sata hunteq'an tioxh tu', ha' xol eb'naj tu' ayko naj Jaazaniás, isk'ahol naj Safán. Ha' hunun eb'naj tu', iq'b'il islesén yul isq'ab', xanhe xin chitopla yah isnhub'al pom chisnhus eb'naj.

¹²Lahwi tu' yalni Komam wetan: «Hach isk'ahol naj winaj, ζmamxawil sunil tzet chiswatx'e eb'naj ichamta winaj Israel xol q'ejholo ti'? Ha' hunun eb'naj tu' aylekto eb'naj yul iscuarto b'ay tz'ib'nheb'iliko yechel tioxh yinh isk'ul b'itz'ab', chalni eb'naj: “Mach chonhyil Komam Jahawil, yuto b'ejb'ilkano kokonhob' ti' yu Komam,» xhi eb'naj,» xhi Komam wetan. ¹³Tzujan tu', yalnipaxo wetan: «Ayto hunteq'anxa isyahb'etajil chiswatx'e anma ti' ek'b'alto tx'oj sata hunteq'an ti' chito hawila',» xhi wetan.

¹⁴Lahwi tu', kinyinitojan b'ey ispultahil Yatut Komam Jahawil, hune' pulta ayko yinh yetk'ulal norte, wilnihan hunteq'an eb'ix ix tz'onhanayoj lanhan yoq' sata tioxh Tamuz. ¹⁵Yalnipaxo Komam wetan: «Hach isk'ahol naj winaj, ζmaxawil hunteq'an ti'? Yaja' xin ayto hunteq'anxa kaw ek'na yahb'eta chito hawila',» xhi wetan.

¹⁶Lahwi tu' kinyinitojan b'ey amaq' yul Yatut Komam Jahawil, wilnihan yul Yatut Komam 25 (howeb' iskawinaj) eb'naj winaj xolb'al b'ay chonhokapno yul yatut yeb' ismexhahil yet xahanb'al. Ha' eb'naj tu', ha' yichinh eb'naj aykanto yinh Yatut Komam Jahawil, hakanto eb'naj yinh yetk'ulal b'ay chi'ahilo tz'ayik, jahanayo eb'naj, chiyinayo isb'a sata tz'ayik.

¹⁷Yalni Komam wetan: «Hach isk'ahol naj winaj, ζmamxawil hunteq'an ti'? Ha' anma ah Judá ti' maxhtik'a chiyiq' isk'ul iswatx'en hunteq'an isyahb'etajil ti', yeb'paxo xin kaw nohna yul konhob' ti' yu ej istx'ojal chilaiswatx'e, kaw naunhe chiyaq'nitij inhowalan, kaw chihul sam tzet

chiswatx'e anma ti' yinh intxaman. ¹⁸Yaja' haninti'an chiwayojan inhowalan yib'anh anma ti', mach chiwaq' nimank'ulalan yinh, waxanhka ch'eliko yaw winhan yinh kaw ip, mach chiwab'ehan tzet chisq'ana,» xhi Komam.

Yelax yila' ya' Ezequiel ispotx'laxkamo makta chiyo isb'a tet ej tioxh

9 ¹Lahwi tu', wab'enan hune' mak awi yinh kaw ip yinh intxikinan, yalni: «Mahul eb'naj chi'anayo isya'tajil yib'anh konhob' ti', ha' hunun eb'naj ti', iq'b'il isch'en eb'naj yet howal yul isq'ab' chi'uchk'anto sunil,» xhi. ²Wilnihan istit wajwanh eb'naj winaj yul isb'ehal pulata ayko yinh yetk'ulal norté, ha' hunun eb'naj tu' iq'b'il isch'en eb'naj yet howal yul isq'ab' chi'uchk'anto sunil. Ha' xol eb'naj tu' ayko hune' naj winaj ayko q'ap lino xilo isq'ap, haxa yinh yikta naj k'alb'iliko tzet chi'okniko yu eb'naj tz'ib'lom, yokto eb'naj yul pulata yok linhno eb'naj iskawilal ismexhahil xahanb'al bronce.[§]

³Yinhnhena tu', isyeni isb'a isq'aq'al yip Komam Jahawil, isDiosal Israel yib'anh yechel eb'naj querubín, b'aytik'a isye isb'a yib'anh iswi' pulata yul Yatut Komam. Yawten Komam Jahawil naj winaj ayko q'ap lino xilo isq'ap, yeb' k'alb'iliko tzetaj ch'okniko yu eb'naj tz'ib'lom yinh yiktaj. ⁴Yalni Komam tet naj: «Ek'anh yul konhob' Jerusalén, chawaniko yechel ispalanh anma kaw b'isk'ulal ye isk'ul yu sunil isyahb'etajil chiswatx'e anma yul konhob' ti',» xhi Komam.

⁵Wab'enpaxojan yalni Komam tet hunteq'anxa eb'naj winaj tu' haka' ti': «Ek'anhwe yul konhob' Jerusalén yinta naj, kat hepox'nikamo makta machi yechel ispalanh, mach cheyaq' nimank'ulal yinh anma tu', mach chitz'aypaxo hek'ul yinh. ⁶Ha' eb'naj ichamtaj, eb'naj tzehtaj, eb'ix q'o-potaj, nixhte unin yeb' eb'ix ix chepotx'kamo sunil; matxa hunu mak tu' cheyakanoj, yaja' wal sunil makta ayko yechel ispalanh, mach chexhitziko isk'atanh. Chetzab'iko hemaq'nikamo anma tu' b'ey watutan,» xhi Komam tet eb'naj. Hak tu' yu yichiko eb'naj ispotx'nikamo eb'naj ichamta winaj sata isti' Yatut Komam Dios.

⁷Lahwi tu', wab'enan yal-lax tet eb'naj: «B'akweto Yatut Komam Dios, kat henohtzenkanh yamaq'il Yatut Komam yu kamom, lahwi tu' kat heyelto hepox'nokamo anma yul konhob',» xhi tet eb'naj. Hak tu' yu yelto eb'naj, yok eb'naj ispotx'nokamo anma yul konhob'. ⁸Hayet lanhan ispotx'nikamo eb'naj anma tu', inkankanojan inchukilan sata Komam, way jahnojan, way xulnojan sat tx'otx'. Yah wawan yu b'isk'ulal tet Komam, walnihan: «Mam Wahawil, ¿tom chatanhtzekanilo sunil anma Israel kantokanoj, chawanayo hahowal yib'anh konhob' Jerusalén ti'?» kinchihan.

§ 9:2 Hune' xilq'ape lino; ha' ton xil isq'ap eb'naj sacerdote. Ex. 28:42; Lv. 16:23; 1Sam. 2:18.

⁹Istaq'wi Komam wetan: «Ha' istx'ojal anma Israel yeb' anma Judá, kaw nimankanoj, kaw nohna sat tx'o tx'otx' yu ischik'il anma potx'-b'ilkamoj, kaw nohna yul konhob' yu istx'ojal, yuto hak ti' yalni anma: “Xa'isb'ejkano Komam Jahawil kokonhob' ti', yeb' xin mach chiyil tzet chikowatx'e,” xhi. ¹⁰Yu hune' tu' xin mach chiwaq' nimank'ulalan yinh hunteq'an anma ti', yeb' mach chitz'aypaxo ink'ulan yinh; wal xin chiwayojan isya'tajil yib'anh hunteq'an anma ti' haka'tik'a istx'ojal isb'ey-b'alnhe,» xhi Komam.

¹¹Lahwi tu', wilnihan ismeltzo naj winaj ayko q'ap lino xilo isq'ap, yeb' xin k'alb'iliko tzetaj chi'okniko yu eb'naj tz'ib'lom yinh yiktaj, wab'enan yalni naj hayeb' tzoti' haka' ti': «Mamin, manwatx'ehan sunil tzet maxawal wetan,» xhi naj.

Isq'aq'al yip Komam Dios isb'ejkano Yatut Komam

10 ¹Lahwi tu', wilnihan hune' haka'tanhe jilni tz'onhob'al, haka' jilni ch'en zafiro yib'anh hune' leyanto yib'anh iswi' eb'naj querubín. ²Yalni Komam Jahawil tet naj winaj ayko q'ap lino xilo isq'ap haka' ti': «Okanhto xolb'al hunteq'an rueda ayko yalanh eb'naj querubín, kat hawinilti hunu b'etx tzaq'aq' kaw kaj txaltxonhe q'a' yinh xolb'al eb'naj querubín tu', kat hatixhnito yib'anh konhob',» xhi Komam. Lahwi tu' yokto naj yinh insatan.

³Ha' eb'naj querubín tu', ayko eb'naj yinh yetk'ulal kowatx'q'ab' yinh Yatut Komam Dios, yet yokto naj winaj ayko q'ap lino xilo isq'ap; isnohilo yamaq'il yul Yatut Komam yu hune' moyan. ⁴Hak tu' yu yah isq'aq'al yip Komam Jahawil ayko yib'anh eb'naj querubín, isto yib'anh iswi'ta pulita, isnohilo yul Yatut Komam yu moyan, isnohpaxilo yamaq'il yu isq'aq'al yip Komam. ⁵Apnita yel yaw isb'ili xik' eb'naj querubín tu' b'ey yamaq'il yintalto Yatut Komam. Hayet chib'ili tu' lahan jab'en haka' yul isnuq' Komam Dios, Komam sunil chisje yu, yet chitzoteli.

⁶Hayet ischejni Komam naj winaj ayko q'ap lino xilo isq'ap yinolti tzaq'aq' xolb'al hunteq'an rueda ayko xolb'al eb'naj querubín, yokto naj, yok linhno naj xolb'al rueda. ⁷Ha' xol eb'naj querubín tu' ay hune' naj querubín anito isq'ab', yinilti naj q'a' ayko xolb'al eb'naj querubín, yaq'ni naj q'a' tu' yul isq'ab' naj winaj ayko q'ap lino xilo isq'ap, ischahnilo naj q'a', yelti naj b'ey tu'. ⁸Ha' yalanh xik' eb'naj querubín tu', wilan isyeni isb'a hune' haka' isq'ab' anma.

⁹Wilnihan kanheb' rueda isk'atanh eb'naj querubín tu'. Ay hunun rueda tu' isk'atanh hunun querubín. Ha' hunteq'an rueda tu' lahan jilni haka' istzejla ch'en crisólito. ¹⁰Kaw lahannhe jilni kanheb' rueda tu', yeb' xin haka'tanhe ch'ek'leto yul isk'ul hunun iskanheb'al. ¹¹Ha' eb'naj querubín tu' chisje isb'elwi eb'naj yinh iskanheb'al sat b'ay chikaw istokoj, mach chismeltzo isb'a eb'naj yet chib'elwi eb'naj, toholnhetik'a isb'elwi eb'naj

b'ay chikaw yijb'alax yu hunun. ¹²Ha' sunil isnimanil eb'naj querubín tu' yeb' yichinh eb'naj yeb' isq'ab' eb'naj, yeb' xik' eb'naj nohnako isb'aq' sat yinh, hakpax tu' kanheb' rueda tu', nohnako isb'aq' sat yinh ishoyan-il. ¹³Wab'enan yal-lax tet hunteq'an rueda tu': «¡Ek'anhwej!» xhi. ¹⁴Ha' eb'naj querubín tu' kanheb' sat hunun eb'naj. Ha' b'ab'el sat lahan jilni haka' sat querubín, ha' iskab' lahan jilni haka' sat winaj; haxa yox lahan jilni haka' sat no' b'alam, haxa iskanh, haka' sat no' t'iw.

¹⁵Yah eb'naj querubín tu' satkanh. Ha' hunteq'an eb'naj querubín tu', ha' eb'naj wilan b'ey isti' ha' Quebar. ¹⁶Hayet chib'elwi eb'naj querubín, kat isb'elwipaxo hunteq'an rueda yeb' eb'naj, haxa yet chiyinikanh eb'naj xik' yet chi'ah satkanh, maxhtik'a chikanilo isb'a hunteq'an rueda yinh eb'naj. ¹⁷Hayet ch'ok linhno eb'naj querubín, kat yok linhno hunteq'an rueda tu', haxa yet ch'ah eb'naj querubín satkanh, kat yahpaxo rueda yinta eb'naj, yuto yetb'i isb'a yespíritu eb'naj querubín yeb' rueda tu'.

¹⁸Hak tu' yu yah isq'aq'al yip Komam Jahawil yib'anh iswi'la ispultahil Yatut Komam Dios, yok linhno yib'anh eb'naj. ¹⁹Yinikanh eb'naj querubín xik', yah eb'naj sat tx'otx' isto eb'naj satkanh yinh insatan. Hayet yah eb'naj querubín, yahpaxo hunteq'an rueda tu' yeb' eb'naj, yok linhno eb'naj yul ispultahil Yatut Komam Jahawil, hune' pulta ayko yinh yet-k'ulal b'ay chi'ahilo tz'ayik, wal isq'aq'al yip Komam Dios, isDiosal Israel, ayayo yib'anh eb'naj querubín tu'.

²⁰Ha' hunteq'an eb'naj ti', ha' ton eb'naj ayko yalanh isq'aq'al yip Komam Dios, isDiosal Israel wilan b'ey isti' ha' Quebar. Hak tu' yu in-txumnihan ta querubín eb'naj. ²¹Ha' eb'naj tu' kanheb' sat hunun eb'naj, kanheb'paxo xik' hunun eb'naj, ay isq'ab' eb'naj haka' isq'ab' anma yalanh hunun xik'. ²²Ha' issat eb'naj xin lahan haka' jilni sat eb'naj wilan b'ey isti' ha' Quebar, kaw lahan jilni yeb' eb'naj tu', kaw xin tohol isb'elwi hunun eb'naj sataj.

Kachb'anile yinh eb'naj yahaw konhob' Israel kaw tx'ojkano

11 ¹Kinyinikanhan Espíritu, kinyinitojan b'ey ispultahil Yatut Komam Jahawil, hune' pulta ayko yinh yetk'ulal b'ay chi'ahilo tz'ayik, wilnihan 25 (howeb' iskawinaj) eb'naj winaj yul pulta tu'. Ha' xol eb'naj tu' wilan naj Jaazanías, isk'ahol naj Azur yeb' naj Pelatías, isk'ahol naj Benaía, ha' eb'naj ti', kaw aykano yelapno eb'naj xol konhob'. ²Yalni Komam wetan: «Hach isk'ahol naj winaj, ha' hunteq'an eb'naj ti', ch'ek' istx'ojal yinh isnab'al, chilaiswatx'eni, chiskuyini eb'naj anma ay yul konhob' yinh istx'ojal. ³Chiyalni eb'naj: “Maxhto chihul istz'ayikal b'ay chonhtantzelaxiloj, yuxin Kowatx'e'wexanh jatut. Ha' konhob' ti', lahan haka' hunu xi, haxa hanhonh ti', lahanonh haka' no' chib'e,” xhi eb'naj. ⁴Yuxin hach isk'ahol naj winaj, tzotelanh yib'anhilo isya'tajil chi'ay yib'anh eb'naj,» xhi Komam wetan.

⁵Yul Yespíritu Komam Jahawil wib'anhan, yalni wetan: «Hala: Hak ti' yalni Komam Jahawil: “Xawab'ehan tzet cheyala hex ah Israel, yeb' xin wohtajan tzet ch'ek' yinh henab'al. ⁶Kaw xa'ahkanokanh isb'isil anma xahepotx'kamo yul hune' konhob' ti', nohna iscallehal konhob' yu isnimanil kamom anma.

⁷»Yuxin hanin Dios, Yahawilinti'an, haninan chiwalan: Ha' anma xahepotx'kamo yul konhob' Jerusalén ti', lahan haka' no' chib'e, haxa Jerusalén ti', lahan haka' tx'otx' xi; wal hex ti' xin chexwilojan yul konhob' ti'. ⁸Hanin Dios, Yahawilinti'an chiwalan: Hex ti' kaw chexxiw tet ch'en espada, yuxin chiwatijan espada teyinh. ⁹Chexwilojan yul konhob' Jerusalén ti', chexwanikojan yul isq'ab' eb'naj nan konhob'al, chiwanayojan isya'tajil texol. ¹⁰Chexpotx'laxkamo yu espada, chiwilnihan tzet chexeliko b'ey ismohonal tx'otx' Israel, cheyohtanheniloj ta haninti'an Yahawil hinan. ¹¹Ha' Jerusalén ti', mach lahano haka' hunu xi teyinh, yeb' xin mach lahanoj hex haka' no' chib'e. Ha' b'ey ismohonal tx'otx' Israel, chiwilan yinh tzet chexelikoj. ¹²Cheyohtanheloj ta haninti'an Yahawil hinan, yuto hex ti' mach heb'eyb'alnhe chejb'anile waq'an teyet, mach heyijepaxo inleyan, wal xin ha' isb'eyb'al nimeta konhob' ayko yinhla hehoyanil, ha' hewatx'e,” kachi,» xhi Yespíritu Komam.

¹³Hayet lanhan walnihan istzoti' Komam Jahawil tu', yayk'ay naj Pelatías, isk'ahol naj Benafa, iskamilo naj. Hayet wilnihan hune' tu', way jahnojan, way xulnojan sat tx'otx', wahwihan yinh kaw ip: «¡Ay, Mam Wahawil! ¿Tom chatanhtzekanilo yinh hunelnhe haywanhxa anma Israel kantokano ti'?» kinchihan.^h

Haltelaxi ta ch'ak'b'ilo Israel hunelxa

¹⁴Yul istzoti' Komam Jahawil wetan, yalni haka' ti': ¹⁵«Hach isk'ahol naj winaj, ha' yinh eb'naj hawuxhtaj, yeb' yinh makta ayto hawu hab'a yeb'i, yeb' yinh sunil Israel, chitzotel anma kankano b'ey Jerusalén, chalni: “Wal eb'naj tu' nahat yehilo eb'naj yinh Komam Jahawil, yuxin ha' tx'o tx'otx' ti' ma'aq'laxkano tx'otx' komajuloj,” xhi eb'naj.

¹⁶»Yuxin hal tet anma ay b'ey Jerusalén tu': Hak ti' yalni Komam Jahawil: “Waxanhka nahatta inq'ojtojan anma Israel yulaj nimeta konhob', waq'ni sajlemotojan sat ej sunil tx'o tx'otx' ti', yaja' xin haka'to nich'an yatut eb'naj wehikojan xol,” kachi,» xhi Komam.

¹⁷Chawalnipaxo tet eb'naj ayto preso haka' ti': «Hak ti' yalni Komam Jahawil: “Haninan chexwilojan xolaj konhob'laj, chexwinitijan b'ay puja-nexto sat tx'o tx'otx' ti', chexinkutxb'anikojan, chiwaq'nihan tx'otx' Israel ti' hunelxa teyet. ¹⁸Chexmeltzoti b'ey tu', kat heyinilo sunil hunteq'an tioxh kaw yahb'eta sat tx'otx' Israel tu'. ¹⁹Chiwaq'ni ak'b'olojan heyanna

^h 11:13 Yinh hebreo, hune' b'ihe Pelatías, chal yelapnoj *kolb'ililo* yu Komam Dios Jahawil.

yeb' henab'al, chihelniltijan heyanna kaw kaw haka' ch'en ch'en, kat waniktojan seel kaw lab'an haka' chib'e. ²⁰Yu heb'eyb'alnhen chejb'anile chiwalan, chek'ub'an kuyb'anile aq'b'il wuhan, kat heyok inkonhob'ojan, kat wokan heDiosalaj. ²¹Yaja' wal hunteq'an anma ayko yanma yinh yochento tioxh, kaw yahb'eta yul insatan, hanin Yahawilinti'an, chiwalan ta chiwayojan isya'tajil yib'anh yu tzetaj isb'eyb'alnhe tu',» kachi,» xhi Komam.

²²Lahwi tu', wilnihan yinikanh eb'naj querubín isxik', yah eb'naj, yah-paxo hunteq'an rueda isk'atanh eb'naj, wal isq'aq'al ismay Komam Dios, isDiosal Israel aykanh yib'anh eb'naj querubín tu'. ²³Yah isq'aq'al yip Komam Jahawil, yilo xol konhob' Jerusalén, yapni linhno yib'anh iswi' witz ayko yinh yetk'ulal b'ay chi'ahilo tz'ayik yinh konhob' tu'. ²⁴Lahwi tu', kinyinikanhan Espíritu, isyeni Yespíritu Komam Dios hunteq'anxa saj wayik wila'an, kinyaq'ni meltzohojan sat istx'otx' eb'naj caldeo b'ay ayko anma Israel preso. Lahwi tu' yel hune' saj wayik tu' yinh insatan, matxa isye isb'a. ²⁵Wokan walnojan sunil tzet isye Komam Jahawil wetan tet anma Israel ayko preso tu'.

Yal ya' Ezequiel ta chi'ilaxto anma Jerusalén presohal

12 ¹Yul istzoti' Komam Jahawil wetan, yalni haka' ti': ²«Hach isk'ahol naj winaj, hach ti' ay hach xol anma kaw manhk'omkanoj. Ha' hunteq'an anma ti', ay isb'aq' sat yaja' haka'to mach chu yilni, ay istxikin, yaja' haka'to mach chab'e, yuto ha' hunteq'an anma ti' kaw manhk'omkanoj.

³»Yuxin wal tinanh, hach isk'ahol naj winaj, watx'eyo haq'uyb'e, kat hawel hawatut yinh sat anma Israel ti', kat hato hunuxa nan b'ayah, haka'to chachto preso, k'uxantaxka istxumchalo yu hunteq'an anma ti'; yuto ha' hunteq'an anma ti' kaw manhk'omkano yinh hunelnhe. ⁴Chawito haq'uyb'e yet tz'ayikal yinh sat anma, haka' isq'uyb'e anma chi'ilaxto preso, kat hawel yinh q'ejb'iyal yinh sat anma haka' mak chi'ilaxto preso. ⁵Chaholni isk'ul ch'en k'ub' yinh sat anma, kat haweltojan. ⁶Chawilto haq'uyb'e tu' yet aq'b'alil yib'anh hawixik' yinh sat anma, chawaniko yenhel hasat yu mach chawil konhob' yet chaxheli, yuto hach chaxhwakojan yechelo tet anma Israel,» xhi Komam wetan.

⁷Inyijenan haka' yu yalni Komam wetan, winiltijan inq'uyb'ehan yet tz'ayikal haka' isq'uyb'e anma chi'ilaxto preso, haxa yet q'ejb'iyalil, inholan isk'ul ch'en k'ub', weltojan yet aq'b'alil yeb' inq'uyb'ehan yib'anh inwixik'anh yinh sat anma. ⁸Haxa yet sak'ayalil yet hunxa tz'ayik, yul istzoti' Komam Jahawil wetan, yalni haka' ti': ⁹«Hach isk'ahol naj winaj, çmam isq'amb'e anma Israel, anma kaw manhk'omkanoj yinh tzet maxawu? ¹⁰Ta chisq'amb'e, hak ti' chawute hawalni tet: Hak ti' yalni Komam Jahawil: «Ha' hune' ti' chitzotel yinh tzet chi'utelax naj rey ah Jerusalén

yeb' tzet chi'utelax sunil anma Israel ay yul konhob' Jerusalén,” kachi. ¹¹“Haninti'an yechel wehan yinh hune' ti', haka' mayu welan yul konhob' ti', hak tu' chexutelaxoj, chexilaxto preso nan konhob'al,” kachi,» xhi Komam. ¹²«Ha' naj isreyal Jerusalén ti', chiswixik'nheto naj isq'uyb'e yet aq'b'alil, kat ishol-lax isk'ul ch'en k'ub' b'ay chi'ilaxilto naj, kat isto naj. Chaniko naj yenhel sat, yunhe mach chil naj konhob' yet chito naj. ¹³Yaja' haninan chiwayojan latz'ab' yinh sat naj, kat yayk'ay naj yul latz'ab', chiwanitojan naj b'ey Babilonia sat istx'otx' eb'naj caldeo, yaja' mach chil naj yinh tx'otx' Babilonia tu', ha' b'ey tu' xin chikam naj. ¹⁴Chiwaq' sajlemotojan sunil b'ayejt'uwal sunil eb'naj soldado chikolwa yinh naj, yeb' sunil issoldado naj yet howal, kat itzumb'elaxik'o eb'naj yu espada. ¹⁵Chiyohantelo eb'naj ta haninti'an Yahawil hinan yet chisajlemito eb'naj wuhan yulaj sunil nimeta konhob', yeb' yet chipujnakanh eb'naj sat tx'o tx'otx' ti'. ¹⁶Yaja' xin ay haywanh eb'naj ch'elkanh chikolchalo tet ch'en espada, tet wahil, yeb' tet howla yab'il, yu yalni eb'naj isyahb'etajil iswatx'e yet konhob' tet anma ay yul konhob' b'ay chi'apni, chiyohantehenilo eb'naj ta haninti'an Yahawil hinan,» xhi Komam.

¹⁷Yulpaxo istzoti' Komam Jahawil wetan, yalni haka' ti': ¹⁸«Hach isk'ahol naj winaj, hayet chachwa'i, kach luylunkanh yu xiwkilal, chawiq'ni b'isk'ulal yu isya'tajil yet chawuk'ni hawa'. ¹⁹Chawalni tet anma ay sat tx'otx' Israel: “Hak ti' yalni Komam Jahawil yinh anma ah Jerusalén yeb' yinh anma ay sat tx'otx' Israel: Chiswah anma ispan yinh xiwkilal, chiyuk'ni ya' yinh b'isk'ulal, yuto chi'elq'alaxto sunil tzet ay sat tx'otx' Israel ti' yu ismul sunil anma ay sat tx'otx'. ²⁰Ha' ej konhob' b'ay kaw ay anma, haka' tx'otx' desierto chukanoj, haxa tx'otx' Israel ti', kaw tz'inan chi'elkaniko tx'otx'; hak ti' chu heyohanteheniloj ta haninti'an Yahawil hinan,» kachi,» xhi Komam.

²¹Yulpaxo istzoti' Komam Jahawil wetan, yalni haka' ti': ²²«Hach isk'ahol naj winaj, tzet chal yelapno hunteq'an tzoti' yal eb'naj Israel haka' ti': “B'elb'on yelto tz'ayik, mach xin chiyij isb'a tzet chiyal eb'ya' ischejab' Komam Dios yinh tzetaj chiyil eb'ya' yinh sajsatil?” xhi eb'naj. ²³Yuxin hal tet eb'naj: “Hak ti' yalni Komam Jahawil: Haninan chinlinhb'ahan yal-lax hunteq'an tzoti' tu', matxa chihal-lax xol anma Israel. Wal tinanh ma'apni istz'ayikal b'ay chiyij isb'a sunil tzet chinyehan yinh sajsatil. ²⁴Yuto matxa eb'naj leq'ti'wom chihalni ta ay tzet yil yinh sajsatil, yeb' xin matxa eb'naj ahb'elom kaw lolo' istzotel xol anma Israel. ²⁵Yuto hanin Yahawilinti'an, haninan chintzotelan, ha' xin tzet chiwalan tu' chiyij isb'a, mach chinahatli, ayxayo istz'ayikal b'ay chij isb'a. Wal xin ha' yinh hetz'ayikal ti', hex Israel kaw manhk'om hex ti', chintzotelan, chiyijni isb'a tzet chiwalan, ha' hune' ti', hanin Yahawilinti'an chiwalan,» xhi Komam.

²⁶Lahwi tu', yul istzoti' Komam Jahawil wetan, yalni: ²⁷«Hach isk'ahol naj winaj, ha' anma Israel ti' chalnipaxo hunteq'an tzoti' ti': “Ha' tzet chil hune! naj ti' yinh sajsatil maxhto chiyij isb'a, ꝑb'aq'inhtam chiyij isb'a tzet chal naj?» xhi eb'naj,» xhi Komam.

²⁸Yuxin hal tet eb'naj haka' ti': «Hak ti' yalni Komam Jahawil: “Ha' tzoti' chiwalan, matxa chi'ek'to niman tiempo yijni isb'a, wal xin ha' tzoti' chiwalan masan chiyij isb'a. Ha' hunteq'an tzoti' ti', hankaw in-Yahawil inti'an chiwalan,» kachi,» xhi Komam.ⁱ

Isya'tajil chi'ay yib'anh eb'naj chisb'aliko isb'a ischejab'o Komam Dios

13 ¹Yul istzoti' Komam Jahawil wetan, yalni haka' ti': ²«Hach isk'ahol naj winaj, hal intzoti'an tet eb'naj Israel chisb'aliko isb'a inchejab'ojan, eb'naj ha' tzet chal yanma ha' chalik'oj. Chawalni tet eb'naj: “Ab'ewe istzoti' Komam Jahawil, ³yuto hak ti' yalni Komam Jahawil haka' ti': ꝑAy, kaw k'anch'an eb'naj chisb'aliko isb'a inchejab'ojan, hunteq'an eb'naj machi isbab'al, eb'naj tzujan yinta tzet chal yanma, yeb' xin matzet chil yinh sajsatil! ⁴Hex ah Israel, ha' eb'naj hechejab' leq'ti' tu', lahan eb'naj haka' no' wech ch'ek' b'ey tx'otx' desierto. ⁵Ha' eb'naj tu' mach lanhano iswatx'enkanh eb'naj ch'en k'ub' yinhla ishoyanil Israel, yu ay yip iskolni isb'a tet howal, yinh istz'ayikal b'ay chiwayojan inhowalan yib'anh. ⁶Ha' tzet chi'aq'lax yila' eb'naj, mach yeloj, ha' tzoti' chal eb'naj yet chi'ahb'eli, leq'ti'al. Chalni eb'naj: ‘Ha' Komam Jahawil chalni hunteq'an tzoti' ti’,’ xhi eb'naj. Yaja' xin maxhtaj hinan chinchejan eb'naj yala', kaw xin chikawxi isk'ul anma ta chiyij isb'a tzet chal eb'naj tu'. ⁷Yuxin haninti'an chiwalan tet eb'naj chejab' leq'ti' tu': Ha' tzet cheyil heyalni, mach yeloj, haxa tzoti' cheyal yet chextxumli, leq'ti'al. Cheyalni: ‘Ha' hunteq'an tzoti' ti', ha' Komam Jahawil chihalni jetanh,’ kexchi, yaja' xin matzet chiwalan teyet,» xhi.

⁸»Yuxin hanin Yahawilinti'an chiwalan: “Chiwayojan inhowalan teyib'anh, yuto ha' tzoti' cheyala mach yeloj, yeb' xin leq'ti'al tzet cheyila. ⁹Chiwikanh inq'ab'an, chiwanayojan isya'tajil yib'anh eb'naj chisb'aliko isb'a inchejab'ojan, chalni ta ay tzet chila, yaja' mach yeloj, yeb' xin leq'ti'al tzoti' chala yet chitxumli. Ha' eb'naj tu', mach chi'ok eb'naj xol inkonhob'an yet chiskutxb'an isb'a, yeb' xin mach chitz'ib'nhe-lax isb'i eb'naj yul hum b'ay chimeltzopaxo eb'naj sat tx'otx' Israel, hak tu' chu yohtanhenilo eb'naj ta haninti'an Yahawil hinan. ¹⁰Ha' kaw yeli ha' eb'naj tu', yaq' sub'chaho eb'naj inkonhob'an, yalni eb'naj ta ay aq'an-k'ulal, yaja' machi aq'ank'ulal. Lahan haka' yet chiwatx'elaxkanh hunu

ⁱ **12:28** Hayet chiyijni isb'a istzoti' Komam Dios chalik'o ischejab', ha' chalniloj ta kaw ischejab' Komam Dios yehi; yuto aypaxo eb'naj chisb'aliko isb'a ischejab'o Komam Dios. Dt. 18:21-22.

b'itz'ab', haxa eb'naj xin chi'aniko tz'otz'ew isrepellohaloj. ¹¹Yaja' hal tet eb'naj chi'aniko tz'otz'ew repellohal tu' ta chi'ay tixhna tz'otz'ew tu', yuto chiwatijan hune' niman yaxnhab', chiwanipaxtijan nimeta sajb'at yeb' howla jaq'eq', kat yayk'ay hune' b'itz'ab' tu'. ¹²Hayet xa'ayk'ay hune' b'itz'ab' tu', kat isq'amb'elax tet eb'naj, ζtzet iswatx'e tz'otz'ew heyako repellohal yinh hune' b'itz'ab' ti?" xhi. ¹³Yuxin hanin Yahawilinti'an chiwalan, chiwatijan hune' niman howla jaq'eq' yu inhowalan, kat ishatkanh hune' b'itz'ab' tu', chiwanipaxtijan hune' niman jaq'eq' yaxnhab' yeb' nimeta sajb'at, haka' ch'en ch'en yu inhowalan, kat yuchk'akanto hune' b'itz'ab' tu'. ¹⁴Hak tu' chu wuchk'antojan hune' b'itz'ab' heyako tz'otz'ew isrepellohalo tu', kat yaykano wuyna sat tx'otx', kat yixtanhwipaxahti xe'. Chi'ay wuyna hune' b'itz'ab' tu' teyib'anh, kat hetanhkanilo yalanh, hak tu' chu heyohtanheniloj ta haninti'an Yahawil hinan. ¹⁵Hak tu' chu yijni isb'a wanayojan inhowalan yib'anh hune' b'itz'ab' tu' yeb' yib'anh eb'naj aniko tz'otz'ew isrepellohaloj. Hanin Yahawilinti'an chiwalan: "Matxatik'a yek'lenal hune' b'itz'ab' tu' chikani, kat istanhpaxkanilo eb'naj aniko tz'otz'ew isrepellohaloj. ¹⁶Ha' eb'naj tu', ha' ton eb'naj Israel chisb'aliko isb'a inchejab'ojan, chalni tet anma ta ay tzet chil yinh sajsatil; chalni tet anma Jerusalén ta ay aq'ank'ulal, yaja' xin machi aq'ank'ulal. Ha' hunteq'an ti' hanin Yahawilinti'an, chiwalan," xhi Komam.

¹⁷»Hach isk'ahol naj winaj, wal tinanh, tzotzelanh tet eb'ix ix hawet konhob' chisb'aliko isb'a inchejab'ojan, eb'ix chitzotel tet anma haka' chal yanma; chawalni isya'tajil chi'ay yib'anh eb'ix. ¹⁸Chawalni: "Hak ti' yalni Komam Jahawil: ¡Ay, kaw k'anch'an hex ix hex ti', yuto chewatx'e q'ap q'ap yet eslom tet anma, kat isk'alniko anma yinh isq'ab'; chewatx'enpaxo q'ap payu'e yet eslom chiyahto ichamta anma yeb' nixhte unin yinh iswi', yunhe issub'cha heyu! ζChetxumu tato yu heleq'ti'al ch'ok anma wet konhob'an yul heq'ab', cheyalni tzet chi'elikoj, ta chikami, maka ta ay iskawil? ¹⁹Hex ti' cheyilo inpixanan sata inkonhob'an yu nixhte yachan cebada yeb' yu nixhte q'axep isti' pan. Cheyaq'kamo anma mach yeto ay iskami, cheyanikano sat yib'anhq'inal anma yet ay iskami, cheyaniko leq'ti'al tet inkonhob'an, chiyab'en leq'ti'al cheyala," xhi Komam.

²⁰»Yuxin hanin Yahawilinti'an, chiwalan: "Haninti'an chiwayo inhowalan teyib'anh yu hunteq'an q'ap q'ap yet eslom ch'aq'ni sub'chaho yanma anma; yaja' xin chinkolilojan anma, chinb'ejtzonilojan anma tu' yul heq'ab' haka' chu isb'ejtzolaxto hunu no' ch'ik. ²¹Chintzilnitojan q'ap payu'e yet eslom chewatx'e, chinkolnilojan inkonhob'an yul heq'ab', matxa xin preso chuko yul heq'ab', hak tu' xin chu heyohtanheniloj ta haninti'an Yahawil hinan. ²²Heyako b'isk'ulal yinh makta tohol isb'eyb'al yu heleq'ti'al, yaja' wal hinan mach waq'an b'isk'ulal tet, walpaxo anma tx'oj isb'eyb'al heyiptze yunhe mach chisb'ej iswatx'en istx'ojal,

hekawxenkaniko yinh istx'ojal. ²³Yuxin matxa cheyala' leq'ti'al, yet cheyalni ta ay tzet chiyelax teyet yinh sajsatil, yeb' xin matxa chex-txumli; chinkolilojan inkonhob'an yul heq'ab', kat heyohtanheniloj ta haninti'an Yahawil hinan,» kachi,» xhi Komam wetan.

Isya'tajil ch'ay yib'anh eb'naj chiyiyo isb'a tet tioxh

14 ¹Hul haywanh eb'naj ichamta winaj Israel ink'atanhan, yay tz'onhno eb'naj insatajan. ²Yul istzoti' Komam Jahawil wetan, yalni haka' ti': ³«Hach isk'ahol naj winaj, ha' hunteq'an eb'naj ti', kaw ayko yanma eb'naj yinh istioxh, chiyaniko isbab'al eb'naj yinh istx'ojal ch'aq'ni ayk'ayoj. ¿Tom xin chinokan wab'ehan tzet chal eb'naj yet chaq'ni eb'naj isq'amb'eb'al wetan? ⁴Yuxin tzotelanh tet eb'naj, kat hawalni: “Hak ti' yalni Komam Jahawil: Makxanhetik'a Israel chiyako yanma yinh istioxh, chiyaniko isbab'al yinh istx'ojal ch'aq'ni ayk'ayoj, lahwi tu' kat yul isk'atanh hunu inchejab'an yu isq'amb'en hunu tzet ye tu', hanin Yahawilinti'an chinpajtzehan tet haka'tik'a ismul, yuto kaw tx'i'al istioxh. ⁵Haninan chintzotelan yul yanma sunil anma Israel yuto xa'ispohilo isb'a winhan yu yok tzujno yinta istioxh,» xhi Komam.

⁶»Yalnipaxo Komam: Yuxin hal tet anma Israel, “Hak ti' yalni Komam Jahawil: Meltzanhweko yul inq'ab'an, kat heb'ejnikano hetioxh, cheb'ejni heyaniko henab'al yinh sunil isyahb'etajil tu'. ⁷Ta ay hunu naj Israel maka hunu mak nan konhob'al ay yul konhob' Israel chispohilo isb'a winhan, chaniko yanma yinh istioxh, chaniko isbab'al yinh istx'ojal ch'aq'ni sub'chahoj, lahwi tu', kat yul isk'atanh hunu inchejab'an yu yaq'ni isq'amb'eb'al wetan, hankawin Yahawilinti'an chiwaq'an ispaj tet. ⁸Chiwiti inhowalan yinh hune' mak tu', chiwanayojan isya'tajil yib'anh, yu yilni sunil anma, kat yaq'ni yul iswi'. Chintanhtzelojan xol inkonhob'an, hak tu' chu heyohtanheniloj ta haninti'an Yahawil hinan.

⁹»”Ta ay hunu mak chisb'aliko isb'a inchejab'ojan, kat istzotel yul yet, hanin Yahawilinti'an chiwaq' sub'chahojan hune' mak tu', chiwinikanh inq'ab'an yinh, chintanhtzenkanilojan xol anma Israel inkonhob'an. ¹⁰Ha' kawanh mak tu', chi'ay isya'tajil yib'anh yu istx'ojal, yuto haka' istx'ojal naj ch'aq'ni isq'amb'eb'al, haxpax tu' istx'ojal naj chejab' chispajtzen yul yet. ¹¹Yunhe matxa chislahiko anma Israel ishek'nilo isb'a winhan, yeb' yunhe matxa chislahiko yetanto isb'a yinh sunil ismanhk'omal, kat yokkano inkonhob'ojan, kat wokpaxkanojan isDiosalaj,» xhi Komam Jahawil.

Isya'tajil ch'ay yib'anh anma ah Jerusalén yu ismul

¹²Yul istzoti' Komam Jahawil wetan, yalni haka' ti': ¹³«Hach isk'ahol naj winaj, ta ay hunu konhob' chiyako ismul wetan, kat yok manhk'omal, chiwikanh inq'ab'an yinh, chiwilojan tzet chislo, chiwayojan

wahil yib'anh, chiwaq'nikamojan anma yeb' no noq'. ¹⁴Q'inalo ta ha' xol hunteq'an anma tu' aytok'o ya' Noé, ya' Daniel, yeb' ya' Job, hanin Yahawilinti'an chiwalan ta hanhem eb'ya' tu' chikolchahi, yuto iswatx'e eb'ya' istoholal.^j

¹⁵»Ta xin chiwatojan no' howla noq' xol anma ay yul konhob' tu', chikam sunil anma yu no', hak tu' xin kaw chitz'inhtz'onkanoj. Matxa xin hunu mak chi'ek' b'ey tu' yu xiwkilal tet no'. ¹⁶Q'inalo ta xin ayk'o eb'ya' oxwanh tu' yul konhob' tu', hanin Yahawilinti'an chiwalan ta hanhem eb'ya' chikolchahi, walpaxo isk'ahol eb'ya' yeb' iskutz'in eb'ya', machom chikolchahi, hak tu' xin kaw chitz'inhz'onkano konhob' tu'. ¹⁷Maka ta xin chiwatojan howal yinh anma ay yul konhob' tu', chinchejnihan potx'lax-okamo yu espada, kat iskamilo anma yeb' no noq'. ¹⁸Q'inalo ta xin ayk'o eb'ya' oxwanh yul hune' konhob' tu', hanin Yahawilinti'an chiwalan ta hanhem eb'ya' chikolchahi, walpaxo isk'ahol yeb' iskutz'in, matxam chikolchahi.

¹⁹»Maka ta chiwayojan howla yab'il yinh anma ay yul konhob' tu', chiwanitojan kamikal yib'anh yu inhowalan, kat iskam anma yeb' no noq', ²⁰q'inalo ta xin ayk'o ya' Noé, ya' Daniel, yeb' ya' Job yul hune' konhob' tu', hanin Yahawilinti'an chiwalan ta hanhe eb'ya' oxwanh tu' chikolcha yu istoholal iswatx'e; walpaxo isk'ahol yeb' iskutz'in, matxam chikolchahi.

²¹»Yuxin hanin Yahawilinti'an chiwalan: “iHajxam yet chiwanitojan kanheb' majan isya'tajil kaw aykano ismay yib'anh Jerusalén, yuto chiwatojan espada yinh, yeb' wahil, chiwanipaxtojan no' howla noq' yinh, yeb' howla yab'il, yu istanhkanilo anma yeb' no noq' ay yul konhob'!
²²Yaja' xin ay haywanh mak ti' chikolchahi, ha' ton eb'naj hek'ahol yeb' eb'ix hekut'zin chi'ilaxilo yul konhob' tu'. Ha' xin chihul tek'atanh, cheyilni isb'eyb'al yeb' tzetaj chiswatx'e, hak tu' chu hetxumni tzet yinh xin wayojan sunilal isya'tajil yib'anh Jerusalén. ²³Hayet cheyilni isb'eyb'al yeb' tzetaj chiswatx'e eb'naj hek'ahol yeb' eb'ix hekut'zin tu', kat yok heyanna yinh aq'ank'ulal, cheyohtanheniloj tato mach tonheho wayojan sunil isya'tajil yib'anh Jerusalén,» xhi Komam.

Jerusalén lahan haka' te' uva, matzet chi'oknikoj

15 ¹Yul istzoti' Komam Jahawil wetan, yalni haka' ti':
² «Hach isk'ahol naj winaj, ζtom ek'b'alto yelapno iste'al te' uva sata iste'al hunuxa te te'?
ζTom ek'b'alto yelapno isq'ab' te' uva sata hunu te' q'eb'taj ay xolaj q'eb'taj?

^j 14:14 Ya' Daniel kaw niman yelapno ya' yet payat tiempo, kaw b'inakano ya' yu istoholal tzet iswatx'e yeb'paxo xin kaw aykano ishelanil ya'. Ez. 28:3.

- 3 ¿Aymi hunu mak ti' chi'initi istx'anhal te' uva yu iswatx'en hunu munil yinh iste'al te'? Machoj.
¿Aymi hunu mak ch'initi istx'anhal te' uva yu iswatx'e hun estaca yu islokb'alax tzetaj ye tu' yinh?
- 4 Wal xin si'alnhe chi'okniko te', kat yalaxikto te' yul q'a',
kat istz'akanto isyutz te' yeb' iswi' te', kat istz'apaxkanto yikta-b'anil te'.
¿Aymi munil chiwatx'i yinh te' yet chilahwi istz'akanto te'?
- 5 Hayet maxhto chinhuslaxto te', machi hunu munil ti' chisje iswatx'e-lax yinh te',
¿ha' tom xin yet xanhuslaxto te' aytom tzet chisje iswatx'elax yinh te'?
- 6»Yuxin hanin Yahawilinti'an chiwalan:
Haka' chu istz'ato te' yoj uva yinta hunteq'anxa te te' xol q'a q'a',
hak tu' chu innhusnitojan anma ay b'ey Jerusalén.
- 7 Chiwako inhowalan yinh anma tu', waxanhka ch'elkanh tet q'a q'a'
tu' yalni, yaja' masan chitz'akanto yu q'a',
hayet chiwanayojan inhowalan yinh anma tu' cheyohtanheniloj ta haninti'an Yahawil hinan.
- 8 Hanin Yahawilinti'an, chiwalan ta chinmeltzokanikojan konhob'
Jerusalén tu' haka' tx'otx' matxa yahaw,
kat istz'inhtz'onkanoj yuto ha' hunteq'an anma tu',
kaw manhk'omkano yute isb'a wetan,» xhi Komam.

Lahan Jerusalén haka' hunu ix ix tx'oj ye iswi'

16 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, halilo tet anma ah Jerusalén isyahb'etajil chila-iswatx'e. ³Chawalni tet haka' ti': «Hak ti' yalni Komam Jahawil yinh konhob' Jerusalén: Hach Jerusalén, hach ti' haka'to b'ey Canaán pitzk'anaj hach, hamam xin amorreo, wal hami' hetea. ⁴Hayet istz'ayikal yet hapitzk'ahi, mach k'uplaxilo istx'anhal hamuxuk, mach kachaxhnelaxi, mach alaxpaxiko atz'am tawinh, machi pichlaxiko q'ap tawinh. ⁵Machi mak tz'ay isk'ul tawinh, machi mak yako yinh isk'ul iswatx'en hunteq'an tu' tawinh. Hayet hapitzk'ahi, haq'ojlaxkanayo sat tx'otx', hayahlaxi.

⁶»Wek'tojan hakawilal, kaxhwilnihan, aytoko istz'ilal hachik'il yet hapitzk'ahi; walnihan ta chiwaq'an hakawil. Ho', walan tawet tato chiwaq'an hakawil yet aytoko istz'ilal hachik'il tawinh. ⁷Kaxhwaq' ch'ib'ojan haka' te' telaj, hach'ib'kan, hawok nime anmahil, kaw xin k'ulch'an kaxhelkanikoj haka' hunu ix q'opo xach'ib' yim yeb' xil iswi'. ¡Yaja' xin t'ilan hach, machi xil haq'ap aykoj!

⁸»Kinek'paxtojan hunelxa hakawilal, kaxhwilnihan, lahan hachxa haka' hunu ix q'opo istz'ayikalxa yiq'ni yichamil; inleb'anikojan q'ap

q'ap tawinh, yokkano xilo haq'ap. Hanin Yahawilinti'an, waq' b'ina-ho inb'ihan, int'inhb'ankanojan intzoti'an tawet, hawokkano wuhan. ⁹Kaxhwaxhnenan, intx'ahnilojan istz'ilal hachik'il, inmasnikojan aceite tawinh. ¹⁰Wanikojan q'ap q'ap chemb'il xilo haq'ap, wanikojan no' tz'um xanhab' yinh hawoj, wanikojan q'ap tx'amb'ale lino yinh hawiktaj, waq'nipaxojan q'ap seda xilo haq'ap. ¹¹Wanikojan hawelawil, wakojan ch'en pulsera yinh isnuq' haq'ab' yeb' ch'en uwe yinh hanuq'. ¹²Wanikojan ch'en ome yinh hatxam yeb' yinh hatxikin, wanahtojan hune' diadema kaw k'ulch'ankano jilni yinh hawi'. ¹³Hak tu' yu wanikojan ch'en oro yeb' ch'en plata hawelawiloj, haxa xil haq'ap hawakoj, ha' ton q'ap lino, q'ap kaw k'ul yeb' q'ap seda, yeb' q'ap kaw k'ul yeko yelawil. Hawani ixim harina, ixim kaw k'ul yeb' no' kab', yeb' aceite. Kaw saq'al isk'ulch'anil kaxhelkanikoj, hak tu' yu hawiq'nikanh hawip masanto kaxhok yahawil. ¹⁴Kaw b'inakano hab'i xolaj nimeta konhob' yu hak'ulch'anil, hanin Yahawilinti'an chiwalan, ha' hak'ulch'anil tu' kaw matxa hunuxa haka', yuto haninan wakojan hak'ulch'anil," xhi Komam Jahawil.

¹⁵»Yalnipaxo Komam: "Yaja' xin kaw kawxi hak'ul yinh hak'ulch'anil, yeb' xin yu chaxhb'inahi, yuxin hawetato hab'a, haka' hunu ix ix ay iswinaj, makxanhetik'a yeb' kach ek'i; hawatx'e mule yeb'i. ¡Hawokkano yetoj! ¹⁶Hawatx'enayo q'ap mantiado yinh xil haq'ap b'ay hawiyo hab'a tet hatioxh, hawatx'en tx'i'al ismexhahil yet xahanb'al iswi'la witz, hawatx'en mule b'ey tu'. ¡Ha' hunteq'an tu' maxhto b'ay xayuhi, matxa b'aq'inhal chupaxoj! ¹⁷Hawatx'en yechel winaj hatioxhoj yinh ch'en oro yeb' ch'en plata kaw k'ulejch'an waq'an tawet, hawok hawinoyo hab'a tet, hawaniko hamul haka' ismul hunu ix ix ay iswinaj. ¹⁸Hawaniko xil haq'ap kaw tx'i'al yelawil xilo isq'ap hatioxh tu', ha' xin te' aceite yeb' incienso wetan yehi, hawaq' xahanb'alil tet hunteq'an hatioxh tu'. ¹⁹Hakpax tu' ixim pan waq'an hawab', yeb' ixim harina kaw k'ul, yeb' aceite yeb' no' kab' waq'an halob', ha' hawalte xahanb'alil tet hatioxh tu', yunhe kaw xuq' yek' sam. Hanin Yahawilinti'an chiwalan tato hak tu' hawatx'e. ²⁰Yeb'paxo xin hawiti hak'ahol yeb' hakutz'in, hunteq'an wetan yehi, hanhusni xahanb'alil tet hatioxh. ¿Tom xin hanik'nhe hamul yinh haka' tu', ²¹yet hahojnikamo nixhte wuninalan hanhusni yinh xahanb'alil tet hunteq'an hatioxh tu'? ²²Ha' yu sunil hayahb'etajil yeb' yu hamul haka' ismul eb'ix ix ay iswinaj, yuxin matxa chawatij yet nich'anaxhto, yet t'il-an hach, machi xil haq'ap aykoj, yet aytoko istz'ilal hachik'il tawinh.

²³»"Hanin Yahawilinti'an chiwalan: ¡Ay, ay kaw k'anch'an hach! Yuto hayet xalahwi hawatx'en sunil istx'ojal tu', yay isya'tajil tawib'anh. ²⁴Hawatx'enkanh b'ay chawiyo hab'a tet hatioxh, b'ay nahat yekanh, hawatx'enpaxokanh ismexhahil yet xahanb'al sunil yulajla txonhb'al. ²⁵Sunil b'ay chikachnakan apno b'eh hawatx'enkanh b'ay chawiyo hab'a tet hatioxh, kaw yahb'eta elkaniko hak'ulch'anil yu, makxanhetik'a

ch'ek'to b'ey tu' hawatx'e mule yeb'i, yahkanokanh hamul yinh winajloj. ²⁶Hawatx'e mule yeb' eb'naj ayayo hakawilal, ha' ton eb'naj ah Egipto, eb'naj kaw ay yip, isch'ib'kanh hamul yinh winajloj, hawaq'nitij inhowalan. ²⁷Yuxin wikanh inq'ab'an tawinh, wanayojan isya'tajil tawib'anh, wanitojan wahil texol, kaxhwanikojan yul isq'ab' eb'ix iskutz'in eb'naj filisteo, kaxhisyahni eb'ix, istx'ixwilo eb'ix yilni hab'eyb'al kaw tx'ixob'al. ²⁸Hawatx'enpaxo mule yeb' eb'naj asirio, yuto maxhtik'a yiq' hak'ul hawatx'en mule, yaja' xin maxhtik'a yiq'paxo hak'ul hawatx'en mule yeb' eb'naj asirio tu'. ²⁹Yuxin kaw kaxhahpaxokanh hawatx'en mule sat tx'otx' Canaán, hawatx'enpaxo mule tu' yeb' eb'naj filisteo, yaja' xin maxhtik'a yiq'paxo hak'ul.

³⁰»"Hanin Yahawilinti'an chiwalan, ¡Kaw machi hawanma hawatx'en sunil hunteq'an ti', kaw lahan hach haka' hunu ix ix tx'oj ye iswi', kaw mach chitx'ixwi! ³¹Sunil b'ayejtu'wal b'ay chikachnakan apno b'eh, hawatx'ekanh b'ay chawiyó hab'a sata hatioxh b'ay kaw nahat yekanh, hawatx'enpaxokanh ismexhahil yet xahanb'al sunil yulajla txonhb'al. Yaja' xin mach lahan hawute hab'a haka' hunu ix ix tx'otx' ye iswi', yuto mach chaq'an hatohol. ³²Haka' hunu ix ix tx'oj ye iswi' ay yichamil chischah ix hunuxa komon yichamil, hak tu' hawute hab'a hach Jerusalén. ³³Ha' sunil eb'ix ix tx'oj ye iswi', chischah eb'ix istohol, yaja' wal hach ti' chatohla sunil makta chaxhocheni, chawaq'ni sab'ehal tet eb'naj winaj, yunhe yapni eb'naj sunil b'ayejtu'wal iswatx'e mule yeb' hach. ³⁴Ha' yinh hune' mule ti', mach lahano hach haka' eb'ix ix tx'oj ye iswi', yuto machi mak chaxhsaynik'oj yeb' xin hach chatohla makta chiwatx'en mule yeb' hach. Ha' yinh tu' mach lahano hach haka' eb'ix tx'oj ye iswi' tu'.

³⁵»"Yuxin hach tx'oj ye hawi', ab'e tzet chiwalan. ³⁶Hanin Yahawilinti'an chiwalan: Hach ti' makaxhilchalo yinh hamul, ma'el yenhel istx'ixwilal chawatx'e, haka' eb'ix ix tx'oj ye iswi'. Yelpaxkano hatx'ixob'al sata eb'naj hawinaj, hawinilo hapixan sata hatioxh, hunteq'an kaw yahb'etaj, hawaq'ni maloto ischik'il hawuninal hawalten xahanb'alil tet hatioxh tu'. ³⁷Yuxin chinkutxb'akojan sunil eb'naj chaxhocheni, eb'naj yaq' tzalaho isk'ul yeb' hach, yeb' sunil eb'naj kaw xahan ay hawu, yeb' eb'naj yahb'il hawu. Chinkutxb'akojan sunil eb'naj tawinh, chaxhinit'ilib'anan sata eb'naj, chiyilni eb'naj hanimanil yet t'ilan hach tu'. ³⁸Chiwayojan isya'tajil tawib'anh haka' isya'tajil chi'ay yib'anh ix ixale ay iswinaj yeb' eb'ix maq'om anma, yuxin chiwatojan kamikal tawib'anh yu inhowalan, yuto hawaq' chíwaho ink'ulan. ³⁹Chaxhwanikojan yul isq'ab' hunteq'an eb'naj tu', chiyuchk'anto eb'naj b'ay hawiyó hab'a tet hatioxh kaw nahat yekanh, chiyuchk'anpaxayo eb'naj ismexhahil yet xahanb'al, chiyelq'anto eb'naj xil haq'ap, chiyinipaxto eb'naj ch'en ch'en kaw k'ulch'an chawako hawelawiloj, chaxhist'ilib'ankano eb'naj. ⁴⁰Chiyiti eb'naj hunb'ulan anma tawinh, kat haq'ojlaxkamoj, kat hatejlxakamo

yu ch'en espada. ⁴¹Chinhuslaxto hawatut, chikawxelaxiko kamikal tawib'anh yinh sat tx'i'al eb'ix ix, hak tu' chu hab'ejni hawinjli, chab'ejni hatohlan eb'naj. ⁴²Hak tu' chu inb'ejnihan wanayojan inhowalan tawib'anh, kat yek'ayo ischiwa ink'ulan tawinh, kat yok wanmahan yinh xewilal, matxa b'aq'inh xin chitit inhowalan. ⁴³Hach ti' xahanahulnheto tzet hawaq'le yet nich'an hachto, hawaq'nitij inhowalan yu sunil isyahb'etajil hawatx'e, yuxin hanin Yahawilinti'an chiwayojan isya'tajil tawib'anh yu hab'eyb'al, maxhtik'a istxumpaxo isb'a hak'ul yinh sunil halolo'al.

⁴⁴»Sunil anma chalno tawinh haka' ti': 'Haka'tik'a ix mi'e, haktik'a-pax tu' ix uninale,' xhi. ⁴⁵Hach ti' unine haweh yu hami'. Ha' hami' tu' isyahkanh yichamil yeb' yunin, hach ti' aypaxo hunteq'anxa hanoh isyahpaxokanh yichamil yeb' yunin. Hami' tu', heta ix, haxa hamam amorreo naj. ⁴⁶Ha' ix hanoh b'ab'el, Samaria ix, ha' xin yinh yetk'ulal norte ay ix yeb' eb'ix yunin. Haxa ix hanoh islahob'al unin Sodoma ix, ha' xin yinh yetk'ulal sur ay ix yeb' eb'ix yunin.^k ⁴⁷Hex ti' heyilto tzetaj iswatx'e henoh tu', heyok hewatx'en isyahb'etajil iswatx'e, mach xin hanik'nhe tzet hewatx'e tu', wal xin to kaw ek'b'alto kexpalk'on hewatx'en sunil istx'ojal yib'anh Samaria yeb' Sodoma tu'. ⁴⁸Haninti'an, itzitz hinan, Yahawil hinan. Haninan chiwalan: Hanoh Sodoma yeb' eb'ix yunin, mach apni iswatx'en istx'ojal haka' istx'ojal hawatx'e hach ti' yeb' eb'ix hawunin. ⁴⁹Hanoh Sodoma yeb' eb'ix yunin, ha' hunteq'an ti' ismul: Lolo'al, isahil, yeb' kaw ay tzet chislo yul isq'ab', yaja' maxhtik'a kolwa nino yinh anma meb'a' ayko yinh manhtzetal. ⁵⁰Hak tu' yu islolo'nhen isb'a, iswatx'en isyahb'etajil yinh insatan, yuxin hayet wilnihan ismul tu', intanhtzenilojan, winilojan sat yib'anhq'inal ti'. ⁵¹Walpaxo Samaria mach apni ismul haka' hamul hach ti', yuto hach ti' kaw ahkanokanh isyahb'etajil hawatx'e sata Samaria tu', yuxin hanik'nhe ismul tasataj, wal hach ti' xin hawatx'e sunil isyahb'etajil. ⁵²Hach ti' kaxhok hawila' ismul hanoh ha' ton Sodoma yeb' Samaria, yuxin chaxhokkano yinh tx'ixob'al yu hamul, yuto kaw ek'na isyahb'etajil hawatx'e sata hanoh tu', ek'na k'ulto tasataj. Chaxhokkano yinh tx'ixwilal yeb' takk'ulal, yuto ek'na k'ulto eb'ix hanoh tu' tasataj.

⁵³»Haninan chiwaq' meltzohojan hanoh Sodoma b'ey eb'ix yunin, yeb'paxo Samaria yeb' eb'ix yunin. Chaxhwaq'nipaxo meltzohojan hach ah Jerusalén, xol anma tu'. ⁵⁴Yaja' xin kaxhokkano yinh takk'ulal yeb' yinh tx'ixwilal yu sunilal istx'ojal hawatx'e, hak tu' yu hawokkano yipo isk'ul anma, yuto hanik'nhe ismul tasataj. ⁵⁵Ha' Sodoma hanoh yeb' eb'ix yunin, yeb' Samaria yeb' eb'ix yunin chimeltzopaxo haka'tik'a ye yet

^k 16:46 Ha' konhob' Samaria, ha' isniman konhob' eb'naj Israel ay yinh tx'otx' norte, 1Rey. 16:24. Ha' xin eb'naj asirio hul howal yinh konhob' Samaria tu' yetankanto eb'naj. Chu hawilnipaxo yinh 2Rey. 17:5-6.

b'ab'elal, hakachpax tu' yeb' eb'ix hawunin chexmeltzopaxo haka'tik'a heye yet b'ab'elal.¹ ⁵⁶Hach ti', kaw kaxhb'uchwa yinh Sodoma hanoh yulb'al istiepohal ay ayachiko yinh halolo'al. ⁵⁷Yalanhto maxhto chi'-ixtanhwilo hatx'ojal; walpaxo tinanh chaxhb'uchlax yu eb'ix iskutz'in eb'naj ah Siria yeb' yu sunil eb'ix iskutz'in eb'naj filisteo, b'ajxanhetu'wal chaxhyahlax yu eb'ix. ⁵⁸Hanin Yahawilinti'an, chiwalan ta chawaq'le is-ya'tajil yu halolo'al yeb' yu isyabh'etajil hawatx'e.

⁵⁹»Yaja' hanin Yahawilinti'an chiwalpaxojan. Haninti'an mach chin-watx'ehan haka' hawu tu', hach ti' hawintanhekanilto ist'inhanil tzet walan tawet, hanahulnhetoj hune' trato. ⁶⁰Yaja' wal hinan mach chin-nahulnhetojan intratohan int'inhb'akanojan tawet, yet nich'an hachto, ha' xin hune' tu' chint'inhb'apaxkanojan tawet tinanh yinh sunilb'al ej tiempo. ⁶¹Chanapaxti hab'eyb'al ti', kat hatx'ixwikanh yet chiwaq'ni meltzohojan eb'ix hanoh yul haq'ab' haka' hawuninal chuko, ha' ton ix b'ab'el unin yeb' ix islahob'al unin, yaja' maxhtaj yu tzet t'inhb'ab'ilkano hawu. ⁶²Wal xin chiyij isb'a yu intratohan t'inhb'ab'ilkano tawet, hak tu' chu hawohtanheniloy ta haninti'an Yahawil hinan, ⁶³yunhe hananitij, kat hatx'ixwikanh, kat isk'aykanokanh hak'ul yet chiwaq'ni nimank'ulalan yinh sunil tzet hawatx'e,» xhi Komam.

Yechel yib'anhilo no' t'iw yeb' te' uva

17 ¹Yul istzoti' Komam Jahawil wetan yalni haka' ti': ²«Hach isk'ahol naj winaj, tzotelanh tet anma Israel, chawalni kuyb'anile tet eb'naj. ³Chawalni: Hak ti' yalni Komam Jahawil:

“Ay hune' no' t'iw kaw nimajalkanoj,
kaw nahatta chi'apni istel xik' yeb' xin kaw tx'i'al yelawil no'
aykoj.

Ha' hune' no' t'iw tu' apni purna no' yinh isq'ab' hune' te' cedro
b'ey Líbano,

isnhotx'nilto no' ischon te' cedro tu'.^m

⁴Ha' ischon te' isnhotx'ilto no' kaw aykano yelapnoj,
yinito no' te' sat istx'otx' hunteq'an eb'naj txonhom yul hune'
konhob' b'ay kaw ay txonh.

⁵Lahwi tu' yinikanh no' hune' te' hinhat uva sat tx'otx',
istz'unnayo no' hune' hinhat tu' sat tx'o tx'otx' kaw k'ul,
b'ay ay tz'unub' isti' ha ha' haka' chu istz'unlax te' sauce.

⁶Yahilo te' uva tu', isch'ib'kanh te', kaw xin tx'i'al isq'ab' te' eliloy,
txannhe xin yukanh istel te'.

¹ 16:55 Eb'ix yunin, hune' ti' chitzotel yinh yaldeahil hunteq'an konhob' tu'.

^m 17:3 Hune' no' niman t'iw, ha' ton naj Nabucodonosor, yito naj ya' rey Joaquín preso b'ey Babilonia, yanikaniko naj ya' Sedequías reyal selelo ya' b'ey Jerusalén, 2Rey. 24:12-17.

Ha' isq'ab' te' uva tu' t'anhanto yinh no' t'iw,
 isch'ib'ayto isxe' te' yul tx'otx', isch'ib'kanokanh te', yelilo iswol
 yeb' isq'ab' te'.

7 Aypaxo xin hune'xa no' niman t'iw kaw nimajal istel xik' yeb' xin
 kaw niman isxil,
 ha' xin iskawilal no' yato te' uva tu' isxe' yeb' isq'ab',
 yunhe ishayen no' te' b'ay tz'unb'ilayo yinh istxolal.

8 Ha' te' uva tu' tz'unb'ilayo te' sat tx'o tx'otx' kaw k'ul isti' ha ha',
 yunhe yaq'ni te' isq'ab' yeb' sat, yeb' yunhe kaw ay yip chi'elkan-
 iko te',» kachi,» xhi Komam.

9 Chawalnipaxoj: «Hak ti' yalni Komam Jahawil:

“Ha' te' uva tu', mach chich'ib' te'. Ha' no' b'ab'el t'iw chishok'kanh
 no' te' yeb' sunil xe', kat yayk'ay sat te', kat istajkanilo te'.

Ha' sunil xaj te' kaw yax chitajkaniloj;

mach xin yilalo tx'i'al anma yeb' xin mach yilalo kaw ay yip anma
 chihok'nikanh te' yeb' sunil xe'.

10 Waxanhka chitz'unlaxayo te', yaja' matxa chiwolni te',
 wal xin maq'b'il istajkanilo te' yet chilow jaq'eq'
 chitit yinh yetk'ulal b'ay chi'ahilo tz'ayik yinh te',
 matxa chi'elilo iswol te', to maq'b'il istajkanilo te',» xhi Komam
 Jahawil.

11 Yul istzoti' Komam Jahawil wetan, yalni haka' ti': 12 «Q'amb'e tet
 anma kaw manhk'omkano haka' ti': “¿Mamtxumchalo heyu tzet chal
 yelapno hunteq'an kuyb'anile ti'?” kachi. Chawalni tet: “Ha' naj isreyal
 Babilonia apni naj Jerusalén, yinito naj ya' hereyal yeb' eb'naj yahawil
 hekonhob' preso b'ey Babilonia. 13 Lahwi tu' yaniko naj hune'xa ya'
 yuninal eb'ya' okle reyal b'ey Israel, ist'inhb'ankano naj istzoti' tet ya'
 istaq'weniko ya' yinh ta yijem chiyute isb'a ya' tet naj rey Babilonia tu'.
 Yinipaxto naj rey Babilonia eb'naj winaj kaw ay yelapno ay yul konhob'
 Jerusalén preso b'ey Babilonia, 14 yunhe ispaxkano yip tx'otx' Judá, hak
 tu' xin matxa chu yahwanoj, chisyijen hune' tzet t'inhb'ab'ilkano yunhe
 yijem chute isb'a. 15 Yaja' ok ya' isreyal Jerusalén tu' manhk'omal tet naj
 rey ah Babilonia, ischejnito ya' ischejab' b'ey Egipto isq'ana' no' cheh yeb'
 tx'i'al eb'naj soldado. ¿K'ulmi xin chenah tzet iswatx'e ya' tu', aymi iskol-
 b'anil ya' yinh haka' tu'? ¿aymi iskolb'anil mak mach chisyije hunu tzet
 ye tu' t'inhb'ab'ilkanoj? 16 Hanin Yahawilinti'an, itzitz hinan, haninan
 chiwalan: Ha' ya' mach chiyijen tzet ye tu' t'inhb'ab'ilkanoj tu', yeb' mach
 isyije tzet taq'web'ilkano yu, chipotx'laxkamo xolb'al konhob' Babilonia
 b'ay ay naj rey aniko ya' reyal. 17 Hayet chiyaniko naj rey Babilonia howal
 yinh konhob' Jerusalén, chiswatx'enkanh naj torre yeb' ch'en k'ub' yinhla
 ishoyanil, chispotx'nikamo naj tx'i'al anma, mach chu iskolwa naj rey
 faraón yeb' tx'i'al issoldado yeb' hunb'ulan anma yinh konhob' Jerusalén.

18 Yuto mach isyije ya' isreyal Jerusalén tu' tzet taq'web'ilkano yu, yeb' yu ismanhk'o tzet ist'inhb'akanoj, yuxin machi iskolb'anil ya' yu tzet iswatx'e. 19 Yuxin hanin Yahawilinti'an chiwalan: Ha' ya' isreyal Jerusalén tu', mach isyije tzet istaq'weko yib'anh yinh insatan, ismanhk'on ya' tzet t'inhb'ab'ilkanoj, yuxin chiwayojan isya'tajil yib'anh. 20 Chiwayojan tx'anh hak' yib'anh ya', kat iskanano ya' yul tx'anh, chiwanitojan ya' b'ey Babilonia, ha' tu' xin chiwilan tzet ch'elkaniko ya', yuto ok ya' manhk'omal wetan, yaniko ismul. 21 Haxa sunil eb'naj winaj chiyaq'le yelkanh yeb' sunil eb'naj issoldado ya' chipotx'laxkamo eb'naj yu espada, haxa mak chitokani, chisajlemitoj sunil b'ayejt'uwal. Cheyotanhelohj ta hanin Yahawilinti'an walan hunteq'an ti', xhi Komam.

22 »"Yalnipaxo Komam Jahawil haka' ti':

Haninan chinwoq'ilojan ischon te' cedro kaw nimajal yekanh istel, chintz'unnayojan te';
chintzok'ilojan ischon isq'ab' te' kaw ay yelapnoj chintz'unnayojan te' iswi' hune' wonhan kaw nahat yekanh.

23 Ha' b'ey iswi' wonhan kaw nahat yekanh b'ey Israel, ha' tu' chintz'unnayojan te', kat isch'ib' isq'ab' te', chaq'ni te' sat. Hak tu' xin kaw niman cedro ch'elkaniko te', kat yul sunil ismajanil no' ch'ik chiswatx'en no' yatut xol isq'ab' te', kat yul no' yenhelnhen isb'a yalanh te'.

24 Hak tu' chu yohtanhenilo sunil te' q'eb'taj ta haninti'an Yahawil hinan.

Haninan inq'ajayojan te' q'eb'taj kaw nimankano yelapnoj, waq'ni ch'ib'ojan istel te' q'eb'taj txannhe istel.

Haninan waq' tajolojan te' q'eb'taj kaw yax, waq'ni yaxb'olojan te' q'eb'taj tajin.

Haninan xin chiwalan hunteq'an ti', kat yaq'ni yija' isb'a, xhi Komam Jahawil," kachi,» xhi Komam.

Ha' mak chiyako ismul chikami

18 1 Yul istzoti' Komam Jahawil wetan, yalni haka' ti': 2 «Tzet yinh xin mach chisb'ej anma Israel yalob'tanhen hunteq'an tzoti', chalni haka' ti':

“Ha' eb'naj mame chiloni te' pahla uva, haxa eb'naj uninale tit ha' yichla ye eb'naj yu te'?” xhi.

3 »Hanin Yahawilinti'an, itzitz hinan, haninan chiwalan ta matxahojab' b'aq'inhal chihal-lax hunteq'an tzoti' ti' b'ey Israel. 4 Sunil anma wetan yehi: Wetan ye naj mame, wetan ye naj k'ahole. Ha' mak chiyako ismul, ha' chikami. 5 Ha' naj winaj tohol isb'eyb'al, ha' ton naj chiwatx'en isk'ulal yeb' istoholal, 6 mach ch'ok naj wa'o xol anma ch'ek'tzen q'inh tet tioxh iswi'la witz, mach chito t'anhno yinh istioxh anma Israel, mach

chiswatx'e naj mule yeb' yixal hunuxa yet anmahil, mach chiway naj yeb' yixal yet chilni ix istx'awob'al, ⁷mach hunu mak ti' chiyeta naj, wal xin chiyaq' meltzoho naj tzet chischah yet chaq'ni melyu k'amil, mach chi'elq'awi naj; chaq' naj tzet chislo makta chinchahahi, chaq'nipaxo naj xil isq'ap makta mach xil isq'ap. ⁸Mach chisq'an naj yal ch'en melyu chaq' k'amil, ta xin chisq'an naj yal ch'en, mach nimano chisq'an naj, yeb' xin mach chato naj isq'ab' yinh istx'ojal. Kaw lahan chu iswatx'en naj istoholal yinh yet anmahil. ⁹Chisb'eyb'alnhen inchejb'anilan, chisk'ub'an naj inleyan yinh kaw istoholal, ha' hune' naj winaj tu' kaw tohol isb'eyb'al. Hanin Yahawilinti'an chiwalan ta ay iskawil hune' naj winaj tu'.

¹⁰»Yaja' ta xin ay hunu isk'ahol naj elq'om yeb' xin potx'om anma chi'eliko, ha' tu' isb'eyb'al, ¹¹mach isb'eyb'alnhe ismam haka' tu'. Wal xin ch'ok wa'o xol anma, chek'tzen q'inh tet tioxh iswi'la witz, chiswatx'en mule yeb' yixal yet anmahil, ¹²chiyetan anma meb'a' yeb' anma ch'oq' yanma yu manhtzetal, elq'om, mach chaq' meltzo tzet chischah yet chaq'ni melyu k'amil, kat isto t'anhno yinh tioxh, chiswatx'en isyahb'etajil, ¹³chisq'anni yal ch'en melyu chaq' k'amil yeb' xin kaw niman yal ch'en chisq'ana. ¿Aymi iskawil hune' naj k'ahole tu'? ¡Mach iskawil naj sat yib'anhq'inal ti'! Yinh kaw yeli chikam naj yu sunil isyahb'etajil iswatx'e tu', ha' yib'anh naj chitokano ischik'il.

¹⁴»Yaja' ta ay hunu isk'ahol naj tx'oj isb'eyb'al ti' chi'ilni sunil istx'ojal chiswatx'e ismam, yaja' mach chi'oktzujno yinta istx'ojal tu', ¹⁵mach chi'ok wa'o xol anma ch'ek'tzen q'inh tet tioxh iswi'la witz, mach chit'anhxiko yinh istioxh anma Israel, mach chiswatx'e mule yeb' yixal yet anmahil, ¹⁶mach hunu mak chiyeta, chaq' meltzo naj tzet chischah yet chaq'ni melyu k'amil, mach chi'elq'awi, chaq' tzet chislo makta chaq'le nhochahilal, chaq'ni xilq'ape tet mak mach xil isq'ap. ¹⁷Mach cheta anma meb'a', mach chisq'an yal melyu chaq' k'amil, ta xin chisq'ana, mach nimano chisq'ana, chisk'ub'a inleyan, chisb'eyb'alnhen chejb'anile chiwalan, ha' hune' naj ti' mach chikam naj yu ismul ismam yinh kaw yeli ay iskawil naj. ¹⁸Wal ismam naj tu' chikam yu istx'ojal iswatx'e, yuto chelq'alo tzetaj ay yet anmahil, yeb' yu maxhtaj isk'ulal iswatx'e xol yet konhob', yuxin chikam naj yu istx'ojal.

¹⁹»Yaja' ta cheq'amb'e haka' ti': «¿Tzet yinh xin mach chistohla naj k'ahole tu' ismul ismam?» kexchi. Wal xin mach chistohla naj ismul ismam, yuto ha' isk'ulal yeb' istoholal iswatx'e naj, isk'ub'a naj sunil chejb'anile chiwalan, isyijen naj, yuxin yinh kaw yeli ay iskawil naj. ²⁰Ha' anma chiyako ismul, ha' hune' tu' chikami, naj k'ahole mach chistohla naj ismul ismam, naj mame, mach chistohla naj ismul isk'ahol. Ha' mak tohol isb'eyb'al chischah ispaj istoholal chiswatx'e, haxa mak tx'oj isb'eyb'al chischah ispaj istx'ojal chiswatx'e.

Ha' isb'eyb'al Komam Dios kaw toholkanoj

²¹»Ta ay hunu mak kaw tx'oj isb'eyb'al, yaja' ta chispohilo isb'a yinh sunil istx'ojal chilaiswatx'e, chisk'ub'an inchejb'anilan, chiswatx'en isk'ulal

yeb' istoholal, ha' hune' mak tu' ay iskawil, mach chitit kamikal yib'anh. ²²Ha' sunil ismul yako, matxa chinahlaxtij. Ha' yu isk'ulal iswatx'e yuxin ay iskawil. ²³Hanin Yahawilinti'an chiwalan ta mach chiwochehan chitit kamikal yib'anh anma tx'oj isb'eyb'al; wal xin chiwochehan ta chispohilo isb'a yinh istx'ojal, haxinwal ay iskawil. ²⁴Yaja' ta ay hunu mak tohol isb'eyb'al chispohilo isb'a yinh istoholal, kat yok iswatx'eno istx'ojal, chiswatx'en sunil isyabh'etajil chilaiswatx'e anma tx'oj, ha' hune' mak tu' mach isq'inal. Ha' istoholal iswatx'e yet yalanhtokanoj, mach chinnatijan, wal xin chitit kamikal yib'anh yu ismanhk'omal yeb' yu ismul yako.

²⁵»¿Tajka chetxumu ta mach toholo inb'eyb'alan? Ab'ewe tzet chiwalan tinanh, hex Israel hex ti'. Mach wetojan hune' b'eh kotxkiltanhe tu', wal xin kaw tohol inb'ehan. ²⁶Ta ay hunu mak tohol isb'eyb'al chispohilo isb'a yinh istoholal, chiswatx'en istx'ojal, ha' hune' mak tu' chitit kamikal yib'anh yu istx'ojal iswatx'e. ²⁷Ta xin ay hunu mak tx'oj isb'eyb'al chispohilo isb'a yinh istx'ojal, kat iswatx'en isk'ulal yeb' istoholal, ha' hune' mak tu' ay iskawil, itzitz yanma. ²⁸Yuto istxum isb'a isk'ul ispohnilo isb'a yinh sunil istx'ojal chilaiswatx'e, ha' hune' mak tu' yinh kaw yeli ay iskawil, mach chitit kamikal yib'anh. ²⁹Yaja' chiyal eb'naj Israel haka' ti': "Yinh kaw yeli mach toholo isb'eyb'al Komam Dios," xhi eb'naj. ¿Tom mach toholo inb'ehan, heyalni? ¿Yinh kaw isyelal hex ti' machiswalil b'eh b'ay tzujaan hex!

³⁰»Yuxin hex Israel, hanin Yahawilinti'an, chiwilan tzet chexelikoj, hunun hex, hatatik'a b'eh b'ay ayexikoj. Wal xin nahwe heb'a, pohwelo heb'a yinh sunil istx'ojal, haxinwal mach chexthanhiloj. ³¹B'ejwekano sunil istx'ojal b'ay heyako hemul, kat yak'b'ilo heyanna yeb' henab'al. Hex konhob' Israel, ¿tzet yinh xin cheyiti kamikal teyib'anh? ³²Yuto hanin Yahawilinti'an mach chiwochehan kamikal yib'anh anma chikami, yuxin meltzanhweko yul inq'ab'an, haxinwal ay hekawil,» xhi Komam.

B'it yet b'isk'ulal yinh eb'ya' isreyal Israel

- 19** ¹Yalni Komam: «Hach Ezequiel, okanh hab'itnhe hune' b'it yet b'isk'ulal yinh eb'ya' isreyal Israel. ²Chawalni:
 «¡Ha' hemi' lahan haka' hunu no' mi'e b'alam ayko xol ej no' icham b'alam! Ha' xol no' b'alam tu' yaq' ch'ib'o no' mi'e nixhte yunin.
³Ay xin hune' yunin no' yaq' ch'ib'oj masanto ok no' nime b'alamil, isq'aytzen isb'a no' istzab'ni ischib'e, chisk'uxaytoj, ha' hunpaxo anma chisk'uxpaxayto no'.
⁴Yab'elaxilo isq'umal hune' tu' yu nimeta konhob', yayk'ay yul latz'ab' yu hunteq'an nimeta konhob', isk'al-laxayo yu cadena, yilaxto b'ey tx'otx' Egipto.»ⁿ

ⁿ **19:3-4** Hunteq'an versículo ti' chitzotel yinh naj faraón Neco yeb' yet yilaxto ya' Joacaz preso b'ey Egipto. 2Rey. 23:33-35; Jer. 22:10-12.

- 5 Hayet yilni no' mi'e b'alam tu' ta kaw tx'i'alxa tz'ayik chechma no',
yeb' xin ta mach chiyij isb'a tzet ayko yipo isk'ul,
yiniti no' hunxa yunin yaq'ni ch'ib'oj.
- 6 Haxa yet xach'ib'kanh no' yok no' nime b'alamil chilab'eyk'o no' xol
hunteq'anxa no' b'alam.
Iskuyini no' istzab'ni no noq' isk'uxu', chisk'uxnipaxayto no' anma.
- 7 Yuchk'anto cuartel, istanhtzenilo konhob',
kaw tz'inhlokano tx'otx', manh anmahil,
yeb' xin sunil tzet ay sat tx'otx' chixiwkanh yet ch'el yaw no'.
- 8 Yaja' ej konhob'la hoyaniko yinh b'ay ay tu',
isq'ojto tx'anh hak yib'anh no', yok no' yul latz'ab'.
- 9 Yalaxiko cadena yinh, yalaxikto yul yatut b'alam, yilaxto tet naj rey
Babilonia,
ismajchelaxikto yul cuartel, yunhe matxa chi'ab'elax yul isnuq' is-
wi'la witz b'ey Israel yet ch'el yaw.
- 10 Ha' hemi', lahanpaxo haka' hunu yoj te' uva xol te' uva, tz'unb'ilayo
isti' ha ha',
chaq'ni te' sat, chiwolnipayo te', yuto tz'unb'ilayo te' isti' ha ha'.
- 11 Ay xin isq'ab' te' kaw kaw elikoj, okniko isvaraho eb'naj rey,
kaw sunil mak ilni te' yuto kaw nimajal yukanh istel te',
yeb' xin kaw tzetk'a iswol te' eliloj.
- 12 Yaja' hok'laxkanh te' uva tu' yu sunil ishowal mak hok'nikanh te',
yayk'aykano te' sat tx'otx', isq'ahkanto isq'ab' te' kaw kaw,
istajkaniloj.
Tzujan tu' xin isnhuslaxto isq'ab' te'.
- 13 Ha' tinanh xin tz'unb'ilayo te' sat tx'otx' machi yahawo,
b'ay kaw tajin sat tx'otx' b'ay machi ha ha'.
- 14 Ha' xol isq'ab' te' ch'elilo q'a q'a' chinhusnito ischon te' yeb' sat te'.
Matxa isq'ab' te' kaw kaw chisje yokniko isq'ojocho eb'naj rey,"
kachi,» xhi Komam.
Ha' hune' b'it ti', b'it yet b'isk'ulal, ha' chib'itnhelax yet ay b'isk'ulal.

Isk'ulch'anil isk'ul Komam Dios yeb' ismanhk'omal konhob' Israel

20 ¹Yinh ishuj hab'il, yulb'al howeb' ixahaw, yinh 10 (islahonheb')
tz'ayik yinh hune' ixahaw tu', yapni haywanh eb'naj ichamta
winaj Israel ink'atanhan, yuto ay tzet yoche eb'naj isq'amb'e' tet Komam
Jahawil, yay tz'onhno eb'naj insatajan.

²Yul istzoti' Komam Jahawil wetan, yalni haka' ti': ³«Hach isk'ahol
naj winaj, tzotelanh tet eb'naj ichamta winaj Israel ti', chawalni tet
eb'naj: “Hak ti' yalni Komam Jahawil: ¿Tom ay tzet cheyoche heq'amb'e'
wetan? Hanin Yahawilinti'an itzitz hinan. Chiwalan ta mach chiwaq'an
ispaj tzet cheyoche heq'amb'e' wetan,» xhi Komam. ⁴Hach isk'ahol naj

winaj, hach ti' hal tzet ch'eliko hunteq'an eb'naj ti', chawaq'ni yohtanhelo eb'naj yinh isyahb'etajil iswatx'e yichmam eb'naj. ⁵Chawalni tet eb'naj: "Hak ti' yalni Komam Jahawil haka' ti': Ha' istz'ayikal yet insik'nilojan konhob' Israel, wikanh inq'ab'an, waq'ni b'inaho inb'ihan tet yuninal ya' Jacob heyichmam, waq'ni hinb'ahan yohtanhelo eb'naj b'ey Egipto. Hayet winikanh inq'ab' tu'an, waq'ni b'inaho inb'ihan, walnihan: 'Hanin-ti'an Yahawil hinan, haninan heDiosal,' kinchihan. ⁶Hayet hune' tz'ayik tu' wikanh inq'ab'an, waq'ni b'inaho inb'ihan, walnihan ta chiwilojan heyichmam sat tx'otx' Egipto, chiwinitoan b'ey hune' tx'o tx'otx' sayb'il-xa wuhan, kaw yax sat b'ay kaw ay no' lech yeb' no' kab'. Ha' hune' tx'o tx'otx' tu' kaw ek'na k'ulch'ankano tx'otx' sata sunil tx'o tx'otx'. ⁷Walnihan tet eb'naj ta chisb'ejkano eb'naj iswatx'en isyahb'etajil yinh insatan yeb' xin ta mach chetato isb'a yu hunteq'an istioxh anma Egipto, yuto hanin Yahawil, haninan isDiosal.

⁸»"Yaja' xin mach isyije eb'naj tzet walan, yok eb'naj manhk'omal wetan. Mach isb'ej eb'naj iswatx'en isyahb'etajil, yeb' xin mach isb'ej eb'naj yinayo isb'a sata istioxh anma Egipto, walnihan ta chiwayoan inhowalan yib'anh eb'naj, chiwanayoan isya'tajil yib'anh eb'naj b'ey Egipto tu'. ⁹Yaja' xin matxa wayoan isya'tajil yib'anh eb'naj haka' yu walni tu'an, yunhe machi el ispixan inb'ihan yul sat anma ay b'ay ay eb'naj, yuto yinh sat anma tu' waq' b'inaho inb'ihan, walnihan ta chiwilojan eb'naj sat tx'otx' Egipto. ¹⁰Hak tu' yu winilojan eb'naj sat tx'otx' Egipto, winitojan eb'naj sat tx'otx' desierto. ¹¹Waq'nihan chejb'anile tet eb'naj, waq'nihan kuyb'anile yohtanhelo eb'naj, ha' mak xin chib'eyb'alnheni, ay iskawil. ¹²Waq'nipaxoan tz'ayik xewilal tet eb'naj, yu yok yechelo inxolb'alan yeb' eb'naj, yeb' yu yohtanhenilo eb'naj ta hanin Yahawilinti'an, inpohilojan eb'naj yok eb'naj wuhan. ¹³Yaja' xin ok eb'naj Israel manhk'omal wetan b'ey tx'otx' desierto, mach isb'eyb'alnhe eb'naj chejb'anile walan, yintanhenilto eb'naj tzet walan. Ta chisyije eb'naj chejb'anile walan ay iskawil eb'naj. Ha' eb'naj tu', mach isyije eb'naj tz'ayik xewilal, yinilo eb'naj ispixan tz'ayik tu', yuxin walan ta chiwayoan inhowalan yib'anh eb'naj b'ey tx'otx' desierto yu intanh-tzenkanilojan eb'naj yinh hunelnhe. ¹⁴Yaja' yunhe mach chi'el ispixan inb'ihan yinh sat anma b'ay wilojan eb'naj, yuxin matxa intanhtzelojan eb'naj.

¹⁵»"Yeb'paxo xin wikanh inq'ab'an yinh eb'naj, sat tx'otx' desierto waq'ni b'inaho inb'ihan, walnihan ta mach ch'okto eb'naj sat tx'o tx'otx' walan ta chiwaq'an tet, b'ay kaw ay no' lech yeb' no' kab', tx'otx' kaw ek'na k'ulch'an sata sunil tx'o tx'otx'. ¹⁶Yuto yintanhelto eb'naj chejb'anile walan tet, yeb' xin mach isb'eyb'alnhe eb'naj intzoti'an, mach isyijepaxo eb'naj tz'ayik xewilal, yinilo eb'naj ispixan tz'ayik tu', yuto ha' yinh tioxh yako yanma eb'naj. ¹⁷Yaja' xin waq' nimank'ulalan yinh

eb'naj, mach inpotx'kamojan eb'naj, mach intanhtzekanilojan eb'naj yinh hunelnhe sat tx'otx' desierto. ¹⁸Walnihan tet yuninal eb'naj b'ey tx'otx' desierto: Mach cheb'eyb'alnhe isb'eyb'al hemam, mach chek'ub'a-paxo ischejb'anil eb'naj, yeb' xin mach cheyeto heh'a yu istiohx eb'naj. ¹⁹Haninti'an heYahawil, heDiosal wehan, ek'anhwe yinh chejb'anile, kat hek'ub'an kuyb'anile kat heyanko yinh ismunil. ²⁰Nimanojab' yelapno tz'ayik xewilal yul hesat, tz'ayik wetan yehi, hune' wakojan yechelo texol yeb' hinan, yunhe heyohtanheniloj ta hanin Yahawilinti'an, heDiosal.

²¹»Yaja' xin ok eb'naj k'ahole tu' manhk'omal wetan, mach isb'eyb'al-nhe eb'naj chejb'anile walan, mach isk'ub'a eb'naj intzoti'an, mach isyije eb'naj, yaja' xin ha' ch'aq'ni iskawil makta chiyijeni. Mach isyijepaxo eb'naj tz'ayik xewilal, yinilo eb'naj ispixan tz'ayik tu'. Walnihan xin ta chiwayojan isya'tajil yib'anh eb'naj, yu yijni isb'a inhowalan yinh eb'naj sat tx'otx' desierto. ²²Yaja' matxa wayojan isya'tajil yib'anh eb'naj yu inb'ihan, yunhe machi el ispixan inb'ihan tu' yinh sat anma ay yulajla nimeta konhob' ilni winilojan eb'naj sat tx'otx' Egipto. ²³Yeb'paxo xin wikanh inq'ab'an yinh eb'naj b'ey tx'otx' desierto, waq'ni b'inaho inb'ihan, walnihan ta chisajlemite eb'naj wuhan yulajla nimeta konhob', yu ispujnakanto eb'naj sunil sat yib'anhq'inal ti'. ²⁴Yuto machi isb'eyb'al-nhe eb'naj chejb'anile walan, yintanhenilto eb'naj tzet walan, ismanhk'o eb'naj tz'ayik xewilal, ist'anhxito eb'naj yinh istiohx ismam, yok tzujno eb'naj yintaj. ²⁵Yuxin hakinpax tu'an, waq'an hunteq'an chejb'anile mach k'ulo tet eb'naj yeb' hunteq'an intzoti'an mach yaq' iskawil eb'naj. ²⁶In-b'ejtzonikojan eb'naj yinh yetanto isb'a yu isxahanb'al yet isnhusni eb'naj isb'ab'el k'ahol xahanb'alil tet istiohx. Ha' hunteq'an tu' waq'an yub' eb'naj, yu yok eb'naj yinh xiwkilal kat yohtanhenilo eb'naj ta haninan Yahawil hinan,» kachi tet eb'naj ichamta winaj Israel, xhi Komam.

²⁷»Hach isk'ahol naj winaj tzotelan tet anma Israel ti', chawalni tet: «Hak ti' yalni Komam Jahawil haka' ti': Ha' eb'naj heyichmam, yaq'tij eb'naj inhowalan yet yok eb'naj manhk'omal wetan yinh hunteq'anxa ti'. ²⁸Hayet winitojan eb'naj sat tx'o tx'otx', yinh tx'otx' b'ay waq' b'inaho inb'ihan winikanh inq'ab'an, walnihan ta chiwaq'an tet eb'naj; yaja' xin yilto eb'naj sunil hunteq'an wonhanlaj yeb' sunil te' q'eb'taj kaw how yeko xaj, isnhusni eb'naj xahanb'al tet istiohx b'ey tu', yaq'nitij eb'naj inhowalan. Isnhusnipaxo eb'naj te' pom kaw xuq' sam, isjob'nayo eb'naj vino isyeb'alq'ab'oj. ²⁹Inq'amb'enan tet eb'naj: '¿Tzet chal yelapno hunteq'an b'ay nahat yekanh^p b'ay chexto ti'? kinchihan. Yuxin *Bama*, chihal-lax yinh hunteq'an wonhan tu' masanta tinanh,' xhi Komam,» kachi.

° 20:25 Ro. 1:24-32 P 20:29 *B'ay nahat yekanh*. Yinh hebreo hunteq'an tzoti' ti', ha' ton b'ay aykanh ismexhahil xahanb'al yet tiohx. 1Rey. 3:2.

30»Chawalnipaxo tet anma Israel: “Hak ti' yalni Komam Jahawil haka' ti': ¿Tom mach heyetato heb'a haka' yu yetanto isb'a heyichmam? ¿tom mach lahano isyabh'etajil chawatx'e cheyinayo heb'a sata ej tioxh haka' heyichmam tu'? 31 Yuto hayet heyalten hexahanb'al, henhusni heyuninal xahanb'alil tet hetioxh, heyetanto heb'a, yexnheto xin heyetanto heb'a yu sunil hunteq'an hetioxh tu' tinanh. ¿Tom xin chiwaq'an ispaj tzet cheyoche heq'amb'e' wetan hex Israel hex ti' yinh haka' tu'? Hanin Yahawilinti'an itzitz hinan, yaj xawalan ta mach chiwaq'an ispaj tzet cheq'amb'e'.

32»Hex ti' cheyala: ‘Lahanojab' chijute kob'a haka' hunteq'anxa konhob', haka' anma ay sat yib'anhq'inal ti', chiyiyo isb'a sata te te' yeb' ch'en ch'en,' kexchi. Yaja' mach chu heyu haka' ch'ek' yinh henab'al tu'.

33»Hanin Yahawilinti'an, itzitz hinan. Haninan chiwalan ta ha' yinh sunil inhowalan yeb' yinh sunil wipan yeb' inq'ab'an leyantoj, chinokan yahawilo teyinh. 34 Chexwilojan yulajla konhob' ay sat tx'otx' b'ay kex-pujnakantoj, chexinkutxb'anikojan yinh sunil wipan yeb' inhowalan yeb' inq'ab'an leyantoj. 35 Chexwinitojan sat ej tx'otx' desierto, ha' b'ey tu' xin chijil-le kosat, chiwilnihan tzet chexelikoj. 36 Haka' yu wilnihan tzet eliko heyichmam sat tx'otx' desierto b'ey Egipto. Hanin Yahawilinti'an chiwalan ta hak tu' chu wilnihan tzet chexelikoj. 37 Chexek'to yalanh inq'ojochan haka' chu yek'to no' me' yalanh isq'ojoch naj tanhem me', hak tu' chexwutehan yu heyijen ist'inhanil intratohan. 38 Ha' mak manhk'om texol yeb' makta ok manhk'omal wetan, chiwilojan texol, chiwitijan yulajla nan konhob'al b'ay ayah, yaja' mach chi'apni sat tx'otx' Israel, hak tu' chu heyohtanheniloj ta haninti'an Yahawil hinan.

39»Hex konhob' Israel, hanin Yahawilinti'an chiwalan haka' ti': Ta mach cheyoche heyije' tzet chiwalan, okanhwe tzujno yinta hetioxh, kat heyinayo heb'a tet, yuto mach cheyije tzet chiwalan. Yaja' tzujanxa xin cheyab'en tzet chiwalan, matxa cheyilo ispixan inb'ihan, matxa xin cheyaq' heyeb'alq'ab' yeb' heyinayo heb'a sata hetioxh.

40»Yaja' hanin Yahawilinti'an, chiwalan ta ha' b'ey wonhan wetan yehi, hune' wonhan nahat yekanh b'ey Israel inkonhob'an, ha' tu' cheyaq' cheja' heb'a sunil hex Israel hex ti' wetan. Ha' b'ey tu' chexinchahan, chinq'annihan teyet ta cheyaq' heyeb'alq'ab' wetan, cheyaq'ni b'ab'el sat hetz'unub' wetan yeb' sunil tzet ye tu' wetan yehi. 41 Chexinchahan haka' chu inchahnihan te' pom kaw xuq' sam chi'aq'lax yeb'alq'ab'ehal wetan, yet chexwinilojan yulajla konhob' b'ay pujanexto sat yib'anhq'inal ti', kaw niman welapnojan texol yinh sat anma ay yulaj nimeta konhob'. 42 Cheyohtanheniloj ta haninan Yahawil hinan, yet chexwinitijan sat tx'otx' Israel, tx'otx' b'ay wikanh inq'ab'an waq'ni b'inaho inb'ihan, walnihan ta chiwaq'an tet heyichmam. 43 Ha' b'ey tu' chenati istx'ojal heb'eyb'alnhe yeb' sunil tzet hewatx'e kexyetantoj, ischiwakanh hek'ul

teyinh hunun hex. ⁴⁴Hex konhob' Israel, hanin Yahawilinti'an chiwalan ta cheyohtanheloj ta haninti'an Yahawil hinan yet chinyenilojan isk'ulal ink'ulan teyinh mach haka'o heb'eyb'al kaw tx'oj yeb' sunil ismachiswalilal hewatx'e yet yalanhtokanoj, mach hako tu' chiwaq'an teyey,» xhi Komam.

Hal-laxkano isya'tajil ch'ay yib'anh tx'otx' Neguev

⁴⁵Hul istzoti' Komam Jahawil wetan, yalni haka' ti': ⁴⁶«Hach isk'ahol naj winaj, t'anhxanhto yinh yetk'ulal sur chachtzotelto yinh, chawalni isya'tajil ch'ay yib'anh te' q'eb'tala ay b'ey tx'otx' Neguev ayko yinh yetk'ulal sur. ⁴⁷Chawalni tet te' q'eb'taj ay b'ey Neguev: “Ab'ewe istzoti' Komam Jahawil, hak ti' yalni haka' ti': Haninan chintzujb'akojan q'a' teyinh kat hetz'aloj. Chisnhusnikanto q'a' sunil te' q'eb'taj yax yeb' sunil te' q'eb'taj tajin. Ha' hune' q'a' tu' mach chitanh yah xaj. Ha' sunil anma ay b'ey tu' chitz'ato yu q'a', chitaichiti q'a' b'ey sur masanta ch'apni q'a' b'ey norte. ⁴⁸Sunil anma chi'ilni ta hanin Yahawilinti'an intzujb'akojan q'a' yinh, matxa xin chitanhaya q'a',» xhi Komam.

⁴⁹Walnihlan tet Komam: «¡Ay, Mamin Wahawil! Ha' anma ti' chitzoteli, chalni winhan haka' ti': “¿Hanhk'anhe yechel chiyaq'b'alnhe ya' yet chitzoteli?» xhi anma,» kinchihan tet Komam.

Ch'en espada ayahti yeh yet Komam Jahawil

21 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, t'anhxanhto yinh yetk'ulal Jerusalén, kat hachtzotelto yinh watutan, chawalni isya'tajil ch'ay yib'anh tx'otx' Israel. ³Chawalni tet Israel: “Hak ti' yalni Komam Jahawil haka' ti': Haninti'an chiwakojan howal teyinh, chiwihtijan wespadahlan yul yatut, chinpotx'nikamojan anma k'ul yeb' anma tx'oj. ⁴Chiwihtijan wespadahlan yul yatut, chinpotx'nikamojan sunil anma, anma k'ul, anma tx'oj, chitaichiti b'ey sur, kat yapni b'ey norte. ⁵Chiyochtanhenilo sunil anma ta hanin Yahawilinti'an wihtijan wespadahlan yul yatut, matxa chiwaytojan ch'en yul yatut,» xhi Komam. ⁶Yalnipaxo Komam: «Hach isk'ahol naj winaj, okanh oq'o yu b'isk'ulal, yu isya'il hawanma, yeb' yu isya'il hamotx, oq'anh sata anma Israel. ⁷Yet chiq'amb'elax tawet: ¿tzet yinh xin chachoch'i? kat hataq'wi haka' ti': “Chinoq'an yuto ay hune' isya'tajil chihuli, hayet chiyab'en anma isq'umal, kat ispaxilo yip yanma, kat ispaxilo yip isq'ab', kat issomchakanh isnab'al; chipáxilo yip yoj anma haka' istanhaya ha ha,» kachi. Hanin Yahawilinti'an, chiwalan ta chihul hune' isya'tajil tu', chiyijni isb'a,» xhi Komam.

⁸Yulpaxo istzoti' Komam Jahawil wetan, yalni haka' ti': ⁹«Hach isk'ahol naj winaj tzotelanl tet anma Israel chawalni: “Hak ti' yalni Komam Jahawil haka' ti':

¡Ha' ch'en espada, ha' ch'en espada, kaw ayxahti yeh,
kaw elnaxa istz'ilal ch'en, kaw chijepla ch'en!

10 Kaw ayxati yeh ch'en yu ishosnikamo ch'en anma,
yeb' xin kaw sajhophonhe yil-laxti ch'en nahat haka' k'uh.
Matxa tzalahilal yuto yintanhekanilto konhob' isq'o'joch ink'ahol-
an haka' hunu komon te' ye yul sat.

11 Ha' ch'en espada tu' kaw sajhophonhe elkaniko ch'en,
yeb' xin kaw ayahti ye ch'en yu yalaxiko ch'en yul isq'ab' naj
potx'om anma.

12 Hach isk'ahol naj winaj, elojab' hawaw, kat hawok oq'oj,
yuto chiwatojan ch'en espada tu' xol inkonhob'an yeb' xol sunil
eb'naj yahaw konhob' Israel.
Hun chu istejlaxkamo eb'naj yahaw tu' yinta inkonhob'an yu
ch'en espada.

¡Yuxin chak'iko istxam hak'ul yu b'isk'ulal!

13 Yuto ilweb'al hune' ti', yaja' ta chiyintanhelto ch'en espada ti' te' q'o-
joch, matxa k'ulo ch'eliko ch'en.

Ha' hune' ti' hanin Yahawilinti'an chiwalan.

14 Hach isk'ahol naj winaj, hal isya'tajil chihuli, chapoq'ni haq'ab'.
Ha' ch'en espada ti' ayxakano ismay ishowal ch'en,
kaw nimankano anma chistejkamo ch'en, chiq'axponilto ch'en
yulaj isk'ul anma.

15 Chipáxilo yip yanma anma, kat yahkanh isya'tajil;
sunil yulaj ispulta anma ay nimeta xiwkilal tet ch'en espada ti'.
Ha' ch'en espada, hinan ch'en isjeplahi yeb' k'ulxa ye ch'en is-
tejnikamo anma.

16 ¡Ha' ch'en espada ti', chispotx'kamo ch'en anma yinh iswatx',
kat istejenikamo ch'en anma yinh ismek,
chispotx'nikamo ch'en anma yet chismeltzon isb'a ch'en!

17 Haninti'an, chiwalan ta chinpoq'paxo inq'ab'an masanta ch'ek'ayo
inhowalan,» xhi Komam Jahawil.

18 Yulpaxo istzoti' Komam Jahawil wetan, yalni haka' ti': 19 «Hach
isk'ahol naj winaj, watx'e yechel kab'eb' b'eh b'ay chitit naj rey
Nabucodonosor yeb' yespada. Ha' kab'eb' b'eh tu' hune'nhe konhob' b'ay
chi'ichikanh, ha' b'ay chispoh isb'a b'eh tu' hako kab'eb' yechel yu is-
yenilo tzet konhob'al b'ay chilaapni hunun. 20 Chawatz'e yechel hune'
b'eh b'ay chitit naj rey Nabucodonosor yeb' yespada, chi'inapno b'ey
Rabá, istx'otx' isk'ahol naj Amón, haxa hunxa b'eh xin chi'apni sat tx'otx'
Judá, kat isto b'ey konhob' Jerusalén, konhob' ayko isk'ub'al. 21 Yuto ha'
naj rey Nabucodonosor chi'ok linhno naj b'ay chispoh isb'a b'eh, chis-
q'amb'en naj yab'e' tzet b'ehal chito naj, chistzik naj islit', chiyaq'ni naj
isq'amb'eb'al tet istioxh. 22 Ha' yinh iswatx' q'ap naj elilo islit' chiyenito

Jerusalén, chalniolj ta ha' yinh Jerusalén tu' yilal yaniko naj howal, kat yichiko niman kamikal, kat yah aw yet howal, kat ismaq'laxpoho ispulta-hil konhob', kat ishoylaxayo Jerusalén, kat iswatx'elaxkanh torre yinhla ishoyanil. ²³Yaja' wal anma ah Jerusalén xin leq'ti'al hunteq'an ti' yalni, yu istrato t'inhb'ab'il kaw niman yelapno iswatx'e yeb' naj, yaja' xin yohta naj Nabucodonosor tu' istx'o'jal anma ah Jerusalén, yuxin chiyito naj eb'naj preso.

²⁴»Yuxin chalpaxo Komam Jahawil haka' ti': "Hex ah Jerusalén, kaw heyelo hetx'o'jal, hepak'iko winhan, heyenilo hemul yinh sunil tzetaj hewatx'e, yuxin xakexinnatijan, chexwanikojan yul isq'ab' naj rey Nabucodonosor. ²⁵Haxa hach isreyal Israel ti', kaw yahb'il hach yeb' xin kaw tx'o'j hachkanoj, xa'apni istz'ayikal b'ay chi'ay isya'tajil tawib'anh yu hatx'o'jal. ²⁶Hanin Yahawilinti'an chiwalan: Chi'ilaxilo hune' yenhel hawi', kat yilaxilo hacorona; sunil chihel-laxi. Ha' mak chiyiyo isb'a chi'ilaxkanh, ha' mak chiyikanh isb'a chi'ilaxayoj. ²⁷Sunil chiwuchk'a-kantojan, sunil chiwuchk'akantojan, yek'lenalxanhe chikani, ha' hune' isya'tajil ti' chiyij isb'a yet chihul naj winaj chinchejtijan iswatx'e istohol-al, chiwanikojan konhob' ti' yul isq'ab' naj," xhi Komam, kachi.

Isya'tajil chihul yib'anh eb'naj amonita

²⁸»Hach isk'ahol naj winaj, hal hunteq'an isya'tajil chihuli, chawalni: "Hak ti' yalni Komam Jahawil yinh eb'naj isk'ahol naj Amón, eb'naj chib'uchwa yinh konhob' Israel. Ha' ch'en espada xa'ilaxahti ch'en yul yatut yu ispotx'nikamo ch'en anma, kaw sajhophonhe jilni istzejla ch'en, chispotx'nikamo ch'en anma. ²⁹Ha' tzet chiyil eb'naj yinh sajsatil yalni, leq'ti'al, haxa tzet chiyal eb'naj ahb'e mach yeloj. Ha' ch'en espada tu' chi'alaxiko ch'en yinh isnuq' hunteq'an eb'naj kaw tx'o'jkano tu', eb'naj halb'ilxa ta yilal ispotx'laxkamoj, yuto xa'apni istiemphal b'ay chitanh-tzelaxkanilo yu istx'o'jal. ³⁰Ha' ch'en espada chiwaq' meltzohojan ch'en yul yatut. Ha' b'ay kexhch'ib'kanh yeb' b'ay ay hex, ha' tu' chiwilan tzet chexelikoj. ³¹Chiwayojan inhowalan teyib'anh haka' chu istzujb'alaxiko hunu q'a', kat isto b'olob', hak tu' chu wanayojan inhowalan teyib'anh. Chexwakojan yul isq'ab' eb'naj winaj kaw how iswi' yeb' kaw helan yuchk'anto tzetaj ye tu'. ³²Hex ti' telaj hex yokb'al q'a', chichak'انب'i sat tx'otx' yu hechik'il, matxa mak ti' chexnanitij, yuto hanin Yahawilinti'an chiwalan hunteq'an ti',» xhi Komam.

Ismul eb'naj ah Jerusalén

22 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, hach chaxhok hawala' isya'tajil chi'ay yib'anh konhob' maq'omkamo anma, chayenilo sunil isyahb'etajil chis-watx'e. ³Chawalni tet: "Hak ti' yalni Komam Jahawil haka' ti': ¡Hex ah

Jerusalén, hex chepotx'kamo heyet anmahil yul konhob', hewatx'en hetiohx kexetantoj, lanhanxa yul yorahil b'ay chi'ay isya'tajil teyib'anh! ⁴Yu ischik'il anma hemaltoj, yuxin xa'ok hemul, heyetano heb'a yu hunteq'an hetiohx hewatx'e, yuxin lanhan ishitzti istz'ayikal b'ay chi'ay isya'tajil teyib'anh, yeb' islahob'al hetiepmohal, yuxin chexb'alaxo yu anma ay yulajla nimeta konhob', kat heb'uchlax yu ej konhob' ay sat tx'o tx'otx'. ⁵Ha' anma ayko hekawilal yeb' anma ay nahat chitzeb'o teyinh. Kaw xa'elkano ispixan isb'i hekonhob', kaw xasomchakanto henab'al.

⁶»"Ha' eb'naj yahaw konhob' Israel ay yul konhob' tu', hatatik'a yip hunun eb'naj chispotx'kamo eb'naj makta chal isk'ul. ⁷Matxa yelapno mame mi'e yul hesat yul konhob', cheyeta anma nan konhob'al ay texol, cheyinilo tzet ay nixhte meb'a' unin ay texol, yeb' eb'ix hunix ay yul hekonhob'. ⁸Matxa yelapno watutan yul hesat, cheyinilo ispixan tz'ayik xewilal. ⁹Ha' yu b'altzoti', ay mak ti' machi ismul chepotx'kamoj, chexwa'paxo iswi'la wonhan yet cheyek'tzen q'inh tet hetiohx, chewatx'en ismachiswalilal yul konhob'. ¹⁰Ay hex ti' heyilo ispixan hemam, heway yeb' yixal hemam tu', ay hex ti' kexway yeb' heyixal yet lanhan yilni istx'awob'al. ¹¹Ay hex ti' hewatx'e mule yeb' yixal heyet anmahil, ay hexpaxo hewatx'e mule yeb' heyalib', ay hex ti' kexipiko yinh iskutz'in hemam. ¹²Ay hex ti' kextolalaxi yu hepotx'nikamo heyet anmahil, ay hex ti' niman yal ch'en melyu heq'ana yet heyaq'ni ch'en k'amil. Ay hex ti' kexok eleq' yinh heyet anmahil heyinilo yinh sunil hehowal tzet aya. Hanin Yahawilinti'an chiwalan ta kinhenahulnhetojan.

¹³»"Haninti'an intzaq' inq'ab'an yuto kaw chíwa ink'ulan wilnihan heyaniko heyanna yinh q'alomal, hepotx'nikamo anma, ismalik'o ischik'il heyu yul konhob'. ¹⁴Hex ti' chimhenah ta ay yip heyanna yeb' yip heq'ab' yinh istz'ayikal yet chexok linhno yinh insatan yet chiwanayojan isya'tajil teyib'anh. Hanin Yahawilinti'an, ha' tzet xawalan chinwatx'e-han. ¹⁵Chexsajlemito wuhan yulajla nimeta konhob', chexpujnakanto yulajla konhob' ay sat tx'o tx'otx' ti', chexinsajnhenan yinh sunil hetz'ilal. ¹⁶Hex kaw hex cheyilo hepixan sata anma ay yulajla nimeta konhob'» xhi Komam.

¹⁷Istzotelpaxo Komam Jahawil wetan, yalni haka' ti': ¹⁸«Hach isk'ahol naj winaj, ha' anma Israel ti', lahan xa'elkaniko haka' istz'ilal ch'en plata, ch'en bronce, ch'en estaño, ch'en hierro yeb' ch'en plomo yet chinhuslax ch'en yul horno. ¹⁹Yuxin hanin Yahawilinti'an, chiwalan: "Hex ah Israel yu kexmeltzokaniko haka' istz'ilal ch'en plata, yuxin chexinkutx-b'akojan yul konhob' Jerusalén, ²⁰haka' chu iskutxb'alaxiko ch'en plata, ch'en bronce, ch'en hierro yeb' ch'en estaño yul horno yunhe isnhuslaxi, kat yulitoj, hak tu' chu kexinnhusnihan yu sunil inhowalan. Chexinkutx-b'akojan, chexinnhusnihan. ²¹Chexinkutxb'akojan, chinxunitojan q'a' teyib'anh yu sunil inhowalan, kat heyulito xol q'a', ²²haka' chu yulito

ch'en plata xol q'a q'a', hak tu' chu heyulitoj; hak tu' chu heyohtanheniloj ta hanin Yahawilinti'an wayojan inhowalan teyib'anh," kachi,» xhi Komam.

²³ Yulpaxo istzoti' Komam Jahawil wetan haka' ti': ²⁴ «Hach isk'ahol naj winaj, hal tet anma Israel haka' ti': "Ha' hetx'otx' mach sajo tx'otx', mach chiyaq'a' ha' nhab' yib'anh tx'otx' yinh istz'ayikal yet chiwanayojan inhowalan teyib'anh. ²⁵ Ha' eb'naj chisb'aliko isb'a inchejab'ojan texol, pak'iko eb'naj howal yinh yet anmahil, lahan eb'naj haka' no' b'alam chixitnito no noq', chispotx'kamo eb'naj anma, chiyelq'anilo eb'naj is-q'alomal yeb' tzetaj ayah. Kaw ahkanokanh isb'isil eb'ix ix kankano hunixal yul konhob' yu eb'naj. ²⁶ Eb'ya' sacerdote ay yul konhob', mach isyije chejb'anile walan, yinilo ispixan watutan. Mach istxum eb'ya' b'ayet k'ul wetan yehe yeb' b'ayet tx'oj; mach istxum b'ayet saj haka' yalni intzoti'an yeb' b'ayet mach sajoj. Machi yelapno tz'ayik xewilal yul sat eb'ya', kaw ch'el inpixanan xol yuto machi welapnojan yul sat eb'ya'. ²⁷ Haxa eb'naj yahaw konhob' Israel ti', lahan eb'naj haka' no' oj chixitnikamo no noq', yuto chispotx'kamo eb'naj anma, chaq'ni maloto eb'naj ischik'il, yu yok eb'naj q'alomal yu iswatx'en istx'ojal tu'. ²⁸ Ha' eb'naj chisb'aliko isb'a inchejab'ojan, lahan eb'naj haka' mak chimasniko tz'otz'ew repellohal, yuto ha' tzet chil eb'naj yul iswayik leq'ti'al, ha' tzet chistxum eb'naj mach yeloj. Chalni eb'naj haka' ti': 'Hak ti' yalni Komam Jahawil,' xhi eb'naj, yaja' matzet chiwalan. ²⁹ Haxa konhob' Israel ti' xin, hanhk'anhe yetan yet anmahil yeb' xin eleg' chu, potx'walnhetik'a chu yinh anma meb'a' matzet aya. Chetanpaxo eb'naj anma nan konhob'al yu mach istohol chaq' eb'naj. ³⁰ Insayan xol anma Israel ti' ta ay hunu naj winaj chikolnilo konhob' ti', kat istxahli wetan yunhe mach chintanhtze-lojan yinh hunelnhe, yaja' xin machi hunu mak ilcha wuhan. ³¹ Yuxin chiwayojan inhowalan yib'anh eb'naj, chintanhtzenilojan eb'naj. Hanin Yahawilinti'an chiwalan, ta haka'tik'a tzet isb'eyb'alnhe eb'naj, hak tu' is-ya'tajil chiwayojan yib'anh iswi' eb'naj,» xhi Komam Jahawil.

Samaria yeb' Jerusalén lahan haka' kawanh eb'ix ix isnoh isb'a

23 ¹ Hul istzoti' Komam Jahawil wetan, yalni haka' ti': ² «Hach isk'ahol naj winaj, ay kawanh eb'ix ix isnoh isb'a, ³ yettax-tik'a kaw nixhte q'opoto eb'ix yichiko iswatx'en eb'ix mule yeb' eb'naj winaj b'ey Egipto, ha' b'ey tu' tzab'ob'tanhelax yim eb'ix, hak tu' xin matxa q'opo yukano eb'ix. ⁴ Ha' ix b'ab'el, Ahola isb'i ix, ha' ix ti' yechel konhob' Samaria; haxa ix isnoh ix Aholiba isb'i ix, ha' ix yechel konhob' Jerusalén. Ha' eb'ix ti' haka'ta ok eb'ix wixalojan, ispitzk'a ink'aholan yeb' inkutz'inan yeb' eb'ix.

⁵ »Hayet iq'b'il ix Ahola wuhan, issayni ix iswinaj, yochento ix eb'naj asirio ayayo iskawilal. ⁶ Ha' eb'naj asirio tu', q'ap q'ap kajmutz'munhe

ayko xilo isq'ap eb'naj, yahawil konhob' eb'naj, yeb' xin yahawil soldado-paxo eb'naj. Sunil eb'naj tu' kaw tzehtanhe eb'naj yeb' xin kaw kawla winaj eb'naj, kaw helan eb'naj yek' yib'anh cheh. ⁷Ha' eb'naj kawla winaj xol eb'naj asirio yocheto ix Ahola tu', iswatx'en ix mule yeb' sunil eb'naj, yok ix yinoyo isb'a sata istiohx eb'naj. ⁸Hataxtik'a yet q'opo xin yet ay ix b'ey Egipto issomchakanto yul iswi' ix, maxhtik'a xin chisb'ej ix iswinajli, ha' eb'naj Egipto tu' tzab'ob'tanhen yim ix, iswatx'en eb'naj mule yeb' ix. ⁹Yuxin inb'ejtzokojan ix yul isq'ab' eb'naj asirio, eb'naj iswinaj ix, yuto ha' eb'naj yocheto ix. ¹⁰Yilaxilo ispixan ix yu eb'naj, yinikanilo eb'naj yunin ix tet, istejniamo eb'naj ix yu espada. Ha' tzet utelax ix tu' kaw b'inakano xol eb'ix ix, yu isya'tajil ay yib'anh ix.

¹¹»Haxa ix Aholiba, isnoh ix xin, yil ix hunteq'an tu', yaja' xin kaw palk'on ix iswatx'en tzet chal isk'ul sata ix Ahola, yok ix winajloj. ¹²Yochento ix eb'naj asirio, ayayo iskawilal, ha' eb'naj tu' yahaw konhob' eb'naj, yeb' xin yahaw soldado eb'naj, kaw nanxa islow isch'en eb'naj yet howal, kaw helan eb'naj yek' yib'anh cheh. Sunil eb'naj tu' kaw tzehtanhe eb'naj, yeb' xin kaw kawla winaj eb'naj. ¹³Wilan yetanto isb'a ix Aholiba haka' isnoh, kaw lahannhe isb'eyb'al eb'ix iskawanhil. ¹⁴Yaja' xin kaw palk'on ix Aholiba tu' iswatx'en mule yeb' eb'naj winaj, yiln-iko ix yechel eb'naj caldeo kaj jilni, tz'ib'nheb'iliko yinh b'itz'ab'. ¹⁵Ha' yechel eb'naj tu' ayko iscincho yinh yiktaj b'ay ayko yespada, yeb' xin ayahto isq'uxil iswi', lahan jilni haka' eb'naj yahawil soldado ah Babilonia pitzk'ana sat tx'otx' Caldea. ¹⁶Hayet yilniko ix yechel eb'naj ah Babilonia tu', yocheniko ix eb'naj, ischejnito ix ischejab' tet eb'naj b'ey tx'otx' Caldea. ¹⁷Yapni eb'naj ah Babilonia isk'atanh ix, isway eb'naj yeb' ix, iswatx'en eb'naj mule yeb' ix, yetaxkanto ix yu eb'naj. Tzujan tu' xin isyahnikanh ix eb'naj yuto kaw tx'oj elkaniko ix yu eb'naj. ¹⁸Hak tu' yu isb'ejtzonkaniko isb'a ix yul isq'ab' istx'ojal, iswatx'en mule yeb' eb'naj winaj yinh sat konhob', chisyeni ix isnimanil tet eb'naj winaj, yuxin inyahkanhan ix yinh sunil wanmahan haka' yu inyahnikanhan isnoh ix. ¹⁹Kaw xin palk'onkanokan ix iswatx'en mule yeb' eb'naj winaj, chisniniti ix mule iswatx'e yinh isq'opohal yeb' eb'naj ah Egipto. ²⁰Kaw ok yanma ix yinh eb'naj winaj kaw maxhtik'a chitx'ixwininoj, yochelen isb'a haka' no' burro yeb' haka' no' cheh yet chisajchi. ²¹Hak tu' yu isnahniti ix Aholiba tu' tzetaj yoche isnimanil yet nich'an q'opoto yet istzab'ob'tanhen eb'naj ah Egipto yim ix.

²²»Yuxin hanin Yahawilinti'an, chiwalan: “Hach Aholiba, haninan chiwitijan eb'naj hawinaj yaq'a'ko howal tawinh, eb'naj chayah tinanh; chul eb'naj kat kach ishoynayo eb'naj. ²³Ha' eb'naj tu', ha' ton eb'naj ah Babilonia, yeb' sunil eb'naj caldeo, eb'naj ah Pecod, eb'naj ah Soa, yeb' eb'naj ah Coa, kat yulpaxo sunil eb'naj ah Asiria yinta eb'naj. Ha' eb'naj tu' nab'a tzehtaj eb'naj yeb' xin kaw kawla winaj eb'naj, yahaw konhob'

eb'naj, yeb' xin yahaw soldado ye eb'naj. Kaw nime winaj eb'naj yeb' xin kaw aykano yelapno eb'naj, sunil eb'naj ch'ek' yib'anh cheh. ²⁴Chul eb'naj tu' tawinh yeb' tx'i'al iscarruaje, kaw hunb'ulan eb'naj soldado ay yulajla konhob' chul tawinh, chachishoynayo eb'naj, iq'b'il isch'en eb'naj yet howal yeb' ch'en escudo, ch'en paves yeb' ch'en yelmo chi'ah-to yinh iswi' eb'naj. Haninan chiwaq'an yip eb'naj yilni tzet chachelikoj, haka' chal iskuyb'anil iskonhob' eb'naj. ²⁵Haninti'an chiwitijan inhowalan tawinh, chachyaq'nipaxo ek'oya' eb'naj chi'aniko howal tawinh tu' yinh sunil ishowal. Chisk'upilto eb'naj hatxam, yeb' hatxikin, haxa hawet konhob' itzitzto chitokani, chipotx'laxkamo yu espada. Chiyilo eb'naj, eb'naj hawunin yeb' eb'ix hawunin, kat kach isnhusnikanto eb'naj. ²⁶Chiyilo eb'naj xil haq'ap, kat yinilo eb'naj sunil ch'en ch'en ayko hawelawiloj. ²⁷Chitanhkanilo tzet yoche hanimanil, yet hawatx'en mule yeb' eb'naj winaj sat tx'otx' Egipto, matxa chaxht'anhxito yinh eb'naj Egipto tu' yeb' xin matxa b'aq'inh chanati tx'otx'. ²⁸Yuto hak ti' yu yalnipaxo Komam Jahawil haka' ti': Haninan chachwakojan yul isq'ab' eb'naj winaj hayaha, eb'naj b'ay ch'íwa hak'ul. ²⁹Ha' eb'naj tu' chul yaq'a'ko howal tawinh yinh sunil ishowal, chiyelq'anto eb'naj sat hatz'unub', kat kach ist'ilb'ankano eb'naj, kat yixtanhwikanilo hatx'ojal yeb' hamul hawako yeb' eb'naj winaj. ³⁰Chiwatx'elax hunteq'an isya'tajil tu' tawinh, yuto hawatx'e mule yeb' hunteq'an nimeta konhob' tu', hawetanto hab'a hawok hawinayo hab'a sata hunteq'an istioxh nimeta konhob' tu'. ³¹Ha' tzet iswatx'e hanoh, ha' xin hab'eyb'alnhe, yuxin ha isya'tajil wayojan yib'anh ix, ha' chiwapaxayojan tawib'anh,» xhi Komam.

³²Yalnipaxo Komam Jahawil haka' ti':

«Ha' hune' niman vaso kaw nimajal yeb' kaw nahat yehayto yich waq'an yuk'u' ix hanoh,
 ha' chiwaq'paxojan hawuk'u', hune' vaso tu' kaw nimajal yul.
 Ha' anma ay yul nimeta konhob' chitzeb'i tawinh, kat kach isb'uchni.

³³Haka'ta chachuk'ikanokanh kat hawab'en isya'il yu tzet ayayto yul vaso tu',
 chihul isya'tajil tawib'anh kat hatanhkaniloj haka' yu hanoh Samaria.

³⁴Chawuk' tzet ayayto yul vaso tu' masanto chalahkanilo sunil, lahwi tu',
 kat hapohnito hune' vaso tu', haxa ispohlenal chawikanh kat hawaniko islahwilal hawim yu,
 yuto hanin Yahawilinti'an chiwalan hunteq'an ti',» xhi Komam.

³⁵Yuxin yalpaxo Komam Jahawil haka' ti': «Yu kinhanahulnhetojan, hawaniti hawichinh wetan, yu hune' tu' xin chawaq'le isya'tajil yu tzet hawaq' yoche hanimanil yet hawatx'en mule yeb' eb'naj winaj,» xhi Komam.

³⁶Lahwi tu' yalni Komam Jahawil wetan: «Hach isk'ahol naj winaj, ¿tom mach chachok hawila' tzet chi'eliko ix Ahola yeb' ix Aholiba, chawalnilo isyabh'etajil iswatx'e eb'ix? ³⁷Yuto ha' eb'ix tu' issay eb'ix iswinaj, yeb' xin b'akb'iliko chik' yinh isq'ab' eb'ix, kinisb'ejkanojan eb'ix, yok eb'ix yinoyo isb'a sata tioxh, isnhusnito eb'ix wuninalan xahanb'alil tet istioxh. ³⁸Iswatx'enpaxo eb'ix hunteq'an istx'ojal ti': Yetato eb'ix watutan yinh hune' tz'ayik tu', yinilo eb'ix ispixan tz'ayik xewilal, tz'ayik wetan yehi. ³⁹Ha' yinh istz'ayikal yet isnhusni eb'ix yunin xahanb'alil tet istioxh, yokto eb'ix yul watutan, yinilo eb'ix ispixan watuttu'an. Ha' hunteq'an tu' iswatx'e eb'ix yul watutan. ⁴⁰Yeb'paxo xin ischejto eb'ix ischejab' yalno tet eb'naj winaj ay kaw nahat, ta chitit eb'naj isk'atanh eb'ix. Hayet yapni eb'naj isk'atanh eb'ix yok eb'ix axhnoj, yaniko eb'ix yanhal isb'aq' sat, yaniko eb'ix ch'en ome yeb' ch'en uwe yelawiloj, yunhe ischani eb'ix eb'naj, yuto kaw chitzala eb'ix yinh eb'naj. ⁴¹Yay tz'onhno yul hune' tz'onhob'al kaw k'ul ay ismay, iswatx'elaxayo mexha sata tz'onhob'al tu', yanayo eb'ix inpoman yeb' waceitehan sat mexha tu'. ⁴²Xanhe chiwejcha hunb'ulan eb'naj winaj isk'atanh eb'ix yek'tzen q'inh, yapnipaxo eb'naj komon winaj isk'atanh eb'ix, ha' ton eb'naj sabeo ay sat tx'otx' desierto, yaniko eb'naj ch'en pulsera yinh isnuq' isq'ab' eb'ix, yanahto eb'naj corona kaw k'ulch'ankano jilni yinh iswi' eb'ix.

⁴³»Walnihan yinh ix kaw ixnamxa iswinajli tu': «¿Tom xin chito yixnhe eb'naj ix? hakpax tu' ix, ¿tom xin chito iswinajnhe ix eb'naj?» kinchihan. ⁴⁴Yuto apni eb'naj winaj isk'atanh eb'ix haka' chu yapni eb'naj winaj isk'atanh ix ix tx'oj ye iswi', hak tu' yu yapni eb'naj isk'atanh ix Ahola yeb' ix Aholiba, eb'ix kaw mulumkanoj. ⁴⁵Yuxin ha' eb'naj winaj tohol is-nab'al chi'ilni tzet chi'eliko eb'ix, haka' isya'tajil chi'alaxayo yib'anh eb'ix ix tx'oj ye iswi' yeb' xin haka' isya'tajil chi'ay yib'anh eb'ix potx'omkamo anma, hak tu' ch'utelax eb'ix, yuto ha' eb'ix ti' tx'oj ye iswi' eb'ix, yeb' xin b'akb'iliko chik' yinh isq'ab' eb'ix.

⁴⁶»Yuxin hak ti' yu yalnipaxo Komam Jahawil haka' ti': «Haninan chi-waq'tijan hunb'ulan eb'naj soldado yaq'a'ko howal yinh eb'ix chiwanikojan niman xiwkilal yinh, kat yelq'alaxto tzetaj aya. ⁴⁷Chiq'ojlaxkanh eb'ix yu ch'en ch'en yu anma, kat ispotx'laxkamo eb'naj yunin eb'ix, yeb' eb'ix yunin eb'ix, kat isnhuslaxkanto yatut eb'ix. ⁴⁸Hak tu' chu waq'ni tanholojan istx'ojal tzetaj choche ix Ahola yeb' ix Aholiba ay yul ismajul tx'otx' Israel, chiyilni sunil eb'ix ix hune' ti', hak tu' xin mach chisb'eyb'alnhe eb'ix istx'ojal iswatx'e eb'ix. ⁴⁹Ha' istx'ojal iswatx'e eb'ix tu' yib'anh eb'ix chitokanoj, chistohlan ismul yakoq yet yok yinoyo isb'a sata tioxh; hak tu' chu yohtanheniloj ta haninti'an Yahawil hinan,» xhi Komam.

¶ 23:46 Ha' kawanh eb'ix ti' yechel kab'eb' konhob', ha' konhob' Samaria yeb' konhob' Jerusalén.

Yechel yinh hune' xi chihuji

- 24** ¹Yinh isb'alonheb' hab'il, yinh 10 (islahonheb') ixahaw, yet 10 (islahonheb') tz'ayik yinh ixahaw tu', yul istzoti' Komam Jahawil wetan, yalni haka' ti': ²«Hach isk'ahol naj winaj tz'ib'nhekanayo hune' tz'ayik ti', yeb' yinh tzet ixahawil yeb' yinh tzet tiempohal, yuto yinh hune' tz'ayik ti' chiyako naj rey Nabucodonosor howal yinh Jerusalén, ³kat hatzotel tet konhob' Israel kaw manhk'omkano ti', chawaniko yechel tet yet chachtzoteli, chawalni: “Hak ti' yalni Komam Jahawil haka' ti':
 Ahto hunu ch'en xi yib'anh q'a', chawanayto ha' yul.’
⁴Chawanayto no' chib'e yul xi tu', no' chib'e kaw k'ul, yeb' no' isb'ul yeb' no' ischib'ehal istel yichinh, yeb' no' b'aj, sunil no' kaw k'ul.
⁵Chawiniti hunu no' me' kaw k'ul, kaw b'aq'ich, chawanikto te' si' yalanh ch'en xi tu', haxinwal kaw chihuji masanto chitah no' b'aj yinh kaw k'ul yul ch'en xi tu',” xhi Komam.
⁶»Yalnipaxo Komam Jahawil haka' ti':
 “¡Ay, kaw k'anch'an konhob' Jerusalén, konhob' potx'omkamo anma! Ha' konhob' ti', lahan haka' hunu xi ay sam isq'uxewal, yuto maxhto chi'ilaxilo istz'ilal.
 Chawinahti no' chib'e yul xi tu' yinh hununtajil, yaja' mach chasik'le hawinati no'.
⁷Ha' konhob' ti' kaw nohna yu ischik'il anma xapotx'laxkamoj, ha' chik' tu' maxhtaj yib'anh tx'o tx'otx' tixhmoyoj yu ismujnikanto pojoj, wal xin yib'anh ch'en ch'en ayi.
⁸Ha' ischik'il anma ay tixhna yib'anh ch'en ch'en tu' mach chinho-kanhan yeb' xin mach chiwakojan yenhel.
 Yu istit lemna inhowalan chiwaq'nihan ispaj tet anma potx'nikamo anma malto ischik'il tu',” xhi Komam.
⁹Yuxin yalpaxo Komam Jahawil haka' ti':
 “¡Ay, kaw k'anch'an konhob' potx'omkamo anma! Hankawhinan chinwatx'ehan b'ay chihojlaxkamo hunteq'an potx'om anma tu'.
¹⁰Kaw niman te' si' chinkutxb'ayojan chiwanikojan q'a' yinh te', yu istanhkanilo yal no' chib'e, kat istz'akanto no', kat istz'apaxkanto no' b'aj.

† 24:2-3 Anma ah Jerusalén ayko yinh isya'tajil, yuto hoyb'ilayo konhob' tu' yu naj Nabucodonosor isreyal Babilonia, yuxin lahan haka'ta ayayto anma tu' yul hunu xi ayahto yib'anh q'a'. 2Rey. 25:1; Jer. 52:4.

11 Lahwi tu', kat hawanipaxahto ch'en xi yib'anh q'a q'a' tu' yinh matxa tzet ayayto yul, kat istz'ato yich ch'en, kaw kaj txaltxonhe ch'eliko ch'en yu q'a', yu isnhusnito q'a' istz'ilal yeb' isq'uxewal ch'en.

12»"Yaja' xin nab'anhe nhuslax ch'en yu q'a q'a', yuto maxhtik'a el istz'ilal yeb' isq'uxewal ch'en. 13Hex ah Jerusalén ch'ay isya'tajil teyib'anh yu isyahb'etajil istx'ojal heyaq' yoche heyanna, yuto wochehan kex-waq' sajb'ojan, yaja' mach heyaq' sajb'o heb'a, yaja' hato yet chiwayojan inhowalan teyib'anh katto hesajb'ikanoj. 14Ha' hunteq'an ti' hanin Yahawilinti'an chiwalan, yuxin chiyij isb'a tzet chiwalan ti', kat yul isya'tajil teyib'anh. Ha' tzet xawalan masan chiyij isb'a mach chinmanh-k'otojan, yeb' xin mach chitz'ay ink'ulan teyinh. Hanin Yahawilinti'an chiwalan ta haka'tik'a tzet heb'eyb'alnhe yeb' tzet hewatx'e, hak tu' isya'tajil chiwayojan teyib'anh,"» xhi Komam Jahawil.

Iskamikal yixal ya' Ezequiel

15Istzotelpaxo Komam Jahawil wetan, yalni haka' ti': 16«Hach isk'ahol naj winaj, wal tinanh chiwilojan hawixal kaw ocheb'il hawu, kaw hun-epnhech'an, kat iskamkanh ix, yaja' xin mach chawiq' b'isk'ulal yeb' xin mach chachog' yinh ix. 17Machojab' chayelo hab'isk'ulal yinh ix, mach chak'ub'a istz'ayikal b'isk'ulal haka' chute anma yet ay kamom, wal xin k'alahto isq'uxil hawi', ayko haxanhab' yet chachek'i, mach chawako yenhel hasat chiyenilo b'isk'ulal, yeb' xin mach chaloh tzet chislo anma b'isk'ulal ye yet ay kamom,» xhi Komam wetan.

18Hayet sahab' yet yalanh chuman kintzotelan tet konhob', haxa yet q'ejb'iyalil iskamkanh wixalan, haxa yet hunxa tz'ayik yinh sahab' sak'ayal inyijenan haka' yu yalni Komam Jahawil wetan. 19Yuxin is-q'amb'e anma ay yul konhob' wetan:

—Halilo jetanh tzet chal yelapno hunteq'an tzet chawatx'e ti', xhi.

20Intaq'wihan tet anma tu':

—Tzotel Komam Jahawil wetan, yalni haka' ti': 21“Hal tet anma Israel ta hanin Yahawilinti'an chiwalan: Chiwaq' etaxotojan watutan ay texol b'ay kaw chextzalahi, yeb' kaw cheyoche, watutan kaw hemay yeb' heyip yekoj. Ha' eb'naj hek'ahol yeb' eb'ix hekutz'in heb'ejkano b'ey Jerusalén chitejlaxkamo yu ch'en espada,” xhi Komam. 22Walnihani haka' ti': “Yaja' cheyute haka' wutehan. Mach cheyako yenhel hesat cheyenilo heb'isk'ulal, mach cheloh tzet chilolax yet ay b'isk'ulal yet ay kamom. 23Cheyahto isq'uxil hewi', ayko hexanhab' yet chexek'i, mach cheyiq' b'isk'ulal, mach chexoq' yinh heyuninal tu'. Wal xin nixhtejal hetanhkanilo yu hetx'ojal, cheyal-len isya'tajil teyet hunun hex. 24Haninan chinokan yechelo texol, sunil tzet inwatx'ehan cheyute; hayet chiyuni tzet chiwalan teyet ti', cheyohtanheniloj tato ta Komam Jahawil yahawil yeko jinh,” kinchihan.

25 Yalnipaxo Komam Jahawil wetan: «Hach isk'ahol naj winaj, chiwilojan watutan xol anma Israel, watutan kaw ayko ismayoj yeb' yipoj, yeb' xin b'ay kaw chitzalako yeb' chiyoche yila'. Chintanhtzenilojan yuninal. 26 Hayet hune' tz'ayik tu' chihul hunu mak kolchakaniloj, chul yalno tawet tzet yuhi. 27 Hayet hune' tz'ayikal tu' chihajlo hati', kat hatzotel tet mak elkanh tu'. Hach chaxhok yechelo tet anma ti', choh-tanheniloj ta haninti'an Yahawil hinan,» xhi Komam.

3. TZOTI' YIB'ANHILO HUNTEQ'AN NIME KONHOB' AY ISTIOXH

(25:1—32:32)

Tzoti' hal-laxkano yib'anhilo anma Amón

25 1 Hul istzoti' Komam Jahawil wetan, yalni haka' ti': 2 «Hach isk'ahol naj winaj, t'anhxanhto yinh yetk'ulal istx'otx' eb'naj isk'ahol naj Amón, chawalni isya'tajil ch'ay yib'anh eb'naj. 3 Chawalni tet eb'naj: “Hex ah Amón, ab'ewe istzoti' Komam Jahawil, yuto hak ti' yalni Komam haka' ti': ¡Hex ti' kexah wejna hehuhlahi yu tzalahilal! yet yetalaxto watutan, yeb' yet yalaxayo isya'tajil yib'anh Israel, yilaxto anma ah Judá preso. 4 Yuxin chexwakojan yul isq'ab' eb'naj winaj ay yulajla konhob' ay b'ey yetk'ulal b'ay chi'ahilo tz'ayik, kat yokkano hetx'otx' yu eb'naj. Chiswatx'enkanh eb'naj b'ay chi'eyayoj yeb' ispeyab'il isme' sat hetx'otx', chisloni eb'naj sat hetz'unub', chiyuk'nito eb'naj helech. 5 Ha' konhob' Rabá chiwakanikojan b'ay chilow no' camello, kat xin inmeltzonpaxkanikojan konhob' Amón b'ay chitanhelax no' me', hak tu' chu heyohtanheniloj ta haninti'an Yahawil hinan. 6 Hanin Yahawilinti'an chiwalan: Hex ti' kaw hepoq' heq'ab', hetinhnayo heyoj sat tx'otx' yu tzalahilal, heb'uchni konhob' Israel. 7 Yuxin chiwikanh inq'ab'an teyinh chiwanayojan isya'tajil teyib'anh, chexwanikojan yul isq'ab' ej konhob', kat yelq'anto tzetaj ay hex, chexwilojan xolaj konhob', chexintanhtzenkanilojan yinh hunelnhe sat tx'o tx'otx' ti', cheyohtanheniloj ta haninti'an Yahawil hinan,» xhi Komam,» kachi.

Tzoti' hal-laxkano yib'anh konhob' Moab

8 Yalnipaxo Komam Jahawil haka' ti': «Hex ah Moab, yeb' hex ah Seir heyala ta ha' Judá lahan haka' sunil hunteq'anxa konhob', 9 yuxin chintanhtzelojan konhob' ayko majwal yinhla ismohonal Moab; hunteq'an konhob' kaw ocheb'il, ha' ton konhob' Bet-jesimot, konhob' Baal-meón, yeb' konhob' Quiriataim. 10 Chiwaq'tijan ej konhob' ay b'ey yetk'ulal b'ay chi'ahilo tz'ayik yinh eb'naj moabita kat wanikanikojan istx'otx' eb'naj yul isq'ab' hunteq'an konhob' tu', haka' wutehan yinh eb'naj amonita, hak tu' xin matxa chib'ina konhob' Amón xolaj nimeta

konhob'. ¹¹Hak tu' chu wanayojan isya'tajil yib'anh Moab, yunhe yohtanheniloj ta haninti'an Yahawil hinan,» xhi Komam.⁵

Tzoti' hal-laxkano yib'anhilo Edom

¹²Hak ti' yalni Komam Jahawil haka' ti': «Ha' eb'naj ah Edom yaq' eb'naj howal yinh Judá, yaq'ni eb'naj ispaj seles tet, yuxin kaw ah-kanokanh ismul eb'naj yul insatan. ¹³Yaja' hakinpax tu'an hanin Yahawilinti'an, chiwakanh inq'ab'an yinh eb'naj, chiwanayojan isya'tajil yib'anh Edom ti'. Chintanhtzelojan anma yeb' no noq' sat tx'otx' Edom. Chitanhkanilo anma ah Edom ti', chitejlaxkamo yu espada chitaichiti b'ey Temán masanta b'ey Dedán. ¹⁴Chinpajtzejan tet Edom, chiyaniko konhob' Israel, inkonhob'an howal yinh, chiwayojan isya'tajil yib'anh yu sunil inhowalan, yuto kaw ayko inhowalan yinh Edom. Hanin Yahawilinti'an, chiwalan tato hak tu' chu yohtanheniloj ta haninan chinpajtzejan tet yu tzetaj iswatx'e yinh Israel,» xhi Komam.

Tzoti' hal-laxkano yib'anhilo eb'naj filisteo

¹⁵Hak ti' yalni Komam Jahawil: «Yu tzet iswatx'e eb'naj filisteo, yako eb'naj howal yinh Israel, yaq'ni eb'naj ispaj seles tet, isyahni eb'naj konhob' Israel yinh sunil yanma, kaw payxatax ichi yaq'ni eb'naj howal yinh Israel, yochele eb'naj istanhtzenkaniloj, ¹⁶yuxin hanin Yahawilinti'an chiwikanh inq'ab'an yinh eb'naj filisteo. Chiwanayojan isya'tajil yinh eb'naj. Chintanhtzenkanilojan eb'naj Cereteo yeb' hunteq'anxa anma kantokano isti'la ha' mar. ¹⁷Chiwaq'nihan ispaj seles tet eb'naj, chiwanayojan isya'tajil yib'anh eb'naj yu sunil inhowalan. Hayet chinpajtzenan tet eb'naj filisteo, chiyohntanhenilo eb'naj ta haninti'an Yahawil hinan,» xhi Komam.

Tzoti' hal-laxkano yib'anhilo konhob' Tiro

26 ¹Yet 11 (ishunlahonheb'xa) hab'il yinh isb'ab'el tz'ayik yinh isb'ab'el ixahaw, hul istzoti' Komam Jahawil wetan, yalni haka' ti':
²«Hach isk'ahol naj winaj, hak ti' yalni eb'naj ah Tiro yinh Jerusalén:
 “¡Ha' hune' konhob' b'ay chiskutxb'ako isb'a eb'naj txonhom chitit yulajla nimeta konhob',
 kaw lanhan yaq'len isya'tajil tinanh!
 ¡Wal hanhonz ti' xin kaw lanhan komeltzokaniko q'alomal,
 haxa hune' konhob' ti' xin, lanhan istanhkanayoj!” xhi eb'naj.
³»Yuxin hanin Yahawilinti'an chiwalan:
 “Haninti'an kaw ayko inhowalan yinh konhob' Tiro,

⁵ 25:11 Tx'otx' Seir kaw witzlakano tx'otx', ayko tx'otx' yinh sur yinh ha' Mar Kamom; ha' xin eb'naj edomita ay sat tx'otx'. Gn. 32:3; 33:14.

- chiwaq'tijan tx'i'al nimeta konhob' yaq'a'ko howal yinh haka' chi-yu ismaq'nikanh isb'a ha' mar yu ishowal.
- 4 Chi'uchk'alaxto isk'ub'al konhob' Tiro kaw kok' chi'aykanikoj, kat yuchk'alaxayo istorrehal.
Kaw chintz'iskanhan ispojojal, haka' ch'en nime ch'en kaw tx'utx'u' sat,
hak tu' ch'elkaniko konhob' Tiro.
- 5 Ha' konhob' Tiro chikankano xolb'al ha' mar,
kat yokkano b'ay chitajtzelahto tx'anh hak' ch'inahti no' kay.
Ch'elq'alaxto tzetaj ay konhob' Tiro yu ej nimeta konhob'.
Ha' hunteq'an ti' chiyij isb'a yuto hanin Yahawilinti'an, chiwalan.
- 6 Haxa anma ay yulaj yaldeahil konhob' ay isti'la ha' mar tu',
chitejlaxkamo yu ch'en espada, hak tu' chu yohtanheniloj tato haninti'an Yahawil hinan," xhi Komam.
- 7»Yuto hak ti' yu yalnipaxo Komam Jahawil haka' ti': "Haninan chi-waq'tijan naj Nabucodonosor ay b'ey yetk'ulal tx'otx' norte yaq'a'ko howal yinh konhob' Tiro. Ha' naj tu' isreyal Babilonia, naj kaw aykano yip xol eb'naj isreyal ej konhob'. Chul naj yaq'a'ko howal yeb' issoldado ayahto yib'anh no' cheh, chinipaxti naj no' cheh yeb' ch'en carruaje yet howal, kaw nimankano eb'naj winaj yet howal chiyiti naj," xhi Komam.
- 8 Yalnipaxo Komam: "Ha' anma ay yulajla yaldeahil Tiro chistejkamo yu espada.
Chiswatx'enkanh eb'naj ah Babilonia tu' torre yinhla ishoyanil konhob' Tiro, chiswatx'enkanh eb'naj b'ay chiskol isb'a yet chaq'ni howal,
iq'b'ilpaxo ch'en escudo yu eb'naj.
- 9 Chismaq'nilo eb'naj isk'ub'al konhob' yu ch'en ariete, kat yay wuynahi,
chisq'ajnyo eb'naj istorrehal yu ch'en eche.
- 10 Matxa chu yil-lax konhob' Tiro yu pojoj chi'ah yu no' cheh yet ch'ek' no', yuto kaw tzetk'a no'.
Hayet ch'okapno eb'naj soldado yul ispultahil konhob', xanhe chib'iliko ch'en k'ub' yu isb'ili yay yoj no' cheh,
yeb' yu isb'ili yay isyantahil ch'en carruaje haka' chu yokto eb'naj soldado yul isholanil isk'ul isk'ub'al konhob' uchk'ab'ilxatoj.
- 11 Chisxanhob'tanhe no' yu yisq'aj sunil iscallehil konhob', haxa anma ay yul konhob' chitejlaxkamo yu espada xol howal.
Ha' hunteq'an nime oy kaw ay yip ay yul konhob' chi'ay wuyna sat tx'otx'.
- 12 Ch'elq'alaxto isq'alomal konhob', kat yelq'alaxpaxto tzetaj chis-txonho. Chi'uchk'alaxayo isk'ub'al konhob',
kat yuchk'alaxayo te' nha kaw k'ulejch'an jilni ay yul konhob'.

Ha' yul ha' mar chiq'ojlaxkanayto ch'en ch'en, yeb' te' iste'al nha yeb' ispojojal konhob' tu'.

¹³ Chintantzeltelojan b'it ch'alaxiko yul konhob', matxa b'aq'inhal ch'ab'elax yalaxiko te' arpa.

¹⁴ Ha' konhob' Tiro, chinmeltzokanikojan haka' hunu niman ch'en tx'utx'u' sat, kat yokkano b'ay chilitx'b'alaxto tx'anh hak' iq'o-mahti kay.

B'aq'inh chiwatx'elaxkanh konhob' tu' hunelxa, yuto hanin Yahawilinti'an chiwalkanojan hunteq'an ti'» xhi Komam Jahawil.

¹⁵»Hak ti' yalnipaxo Komam Jahawil tet Tiro haka' ti': "Hex ah Tiro, gchimluylunkanh anma yu xiwkilal ayko isti'la ha' mar yet chiyab'en istanhilo hekonhob', yeb' yet chiyab'enspaxo yel yaw anma yu islahwilal ch'ok yu howal, yeb' yet chiyab'en ispotx'laxkamo anma yul hekonhob'?"

¹⁶Hayet chiyuni tu', sunil eb'naj yahaw ej konhob' ay isti'la ha' mar chi'ayti eb'naj yul istz'onhob'al, chiyinilo eb'naj xil isq'ap hukaniko yinh, yeb' xil isq'ap ayko yelawil, chi'ok hune' niman xiwkilal yinh eb'naj, kat yay tz'onhno eb'naj sat tx'otx', nanhe xin chiluylunkanh eb'naj yu xiwquilal, kat xin isk'aykanilo isk'ul eb'naj yilni isya'tajil ch'ay yib'anh konhob' Tiro, kat xin isk'aykanilo isk'ul eb'naj yilni. ¹⁷Chisb'itnhen eb'naj b'it yet b'isk'ulal yinh, chalni eb'naj:

'Ha' konhob' Tiro b'ay anma ay isti' ha' mar matanhkaniloj, hune' niman konhob' tu' kaw aykano ismay yeb' kaw helan yek' yib'anh ha' mar.

Sunil anma ay yulaj konhob' ayayo yinhla ishoyanil kaw chixiw tet eb'naj ah Tiro tu', yaja' wal tinanh matanhkaniloj.

¹⁸ Ha' tinanh kaw chiluylun anma ay yul konhob' ayayo xol ha' mar, yuto matanhkanilo konhob' Tiro.

Ha' sunil ej konhob' tu' kaw ma'okkano niman xiwkilal yinh, yuto matanhkanilo konhob' Tiro, xhi hune' b'it tu'» xhi Komam.

¹⁹»Yuto hak ti' yu yalnipaxo Komam Jahawil haka' ti': "Haninan chintantzekanilojan konhob' Tiro, kaw chitz'inhlokanoj haka' konhob' b'ay matxa anma chikani. Chiwaq' ch'ib'okanhan ha ha' yinhla ishoyanil konhob' Tiro tu', kat ismujikanto yalanh ha' mar. ²⁰Chiwaniyantojan anma ah Tiro yul kamb'al b'ay ay anma payat kamtoj, chiwakanaytojan nahat yich tx'o tx'otx'. Matxa b'aq'inh chi'ahti hunelxa yeb' xin matxa b'aq'inhal chiwatx'elaxkanh konhob' Tiro yu anma ay sat tx'o tx'otx' ti'. ²¹Chiwutekanikojan haka' hunu xib'teb'al kat isxiw anma tet, yuto chintanhkaniloj, chisaylaxik'oj, yaja' matxa chi'ilchahi,» xhi Komam yinh konhob' Tiro.

27 ¹Istzotelpaxo Komam Jahawil wetan, yalni haka' ti': ²«Hach isk'ahol naj winaj b'itnhe hune' b'it yet b'isk'ulal yinh konhob'

Tiro, ³hune! konhob' ayayo isti' ha' mar, b'ay chiskutxb'ako isb'a anma loq'woj, anma ay yulaj ej konhob' ayayo isti' ha' mar, chawalni: “Hak ti' yalni Komam Jahawil haka' ti':

Ha' konhob' Tiro kaw chiyako ismay,
chalni ta matxa hunuxa konhob' ch'apni haka' isk'ulch'anil.

4 Ha' konhob' tu', hata isti'la ha' mar ch'ek' ismohonal,
ha' eb'naj watx'enkanh kaw k'ulch'an yu iswatx'enkanokanh
eb'naj.

5 Ha' yaq'inte'al, tah te', te' chitit b'ey witz Senir,
haxa yoyal, cedro te', te' chitit b'ey tx'otx' Líbano.

6 Ha' te' te' chimaq'ni ha ha' yu isb'elwito te' barco, hih te', te' chitit
b'ey tx'otx' Basán,
haxa piso yinh te' tah watx'eb'il, ayko ch'en marfil yelawiloj,
ha' te' tah tu' hata b'ey isti'la ha' b'ey Quitim chitit te'.

7 Ha' isvelahil te' barco nab'a lino q'ap ayko yelawil, ha' b'ey Egipto
chitit q'ap,
haxa isbanderahil yaxtz'antz'onhe yeb' saj q'ap,
q'ap chitit b'ey Elisa ayayo isti'la ha' mar.

8 Eb'naj winaj ah Sidón yeb' ah Arvad,
ha' eb'naj chimaq'nik'o isbarco konhob' Tiro.
Ha' eb'naj winaj kaw helan, ah konhob' Tiro eb'naj,
ha' eb'naj chib'aq'on isbarco iskonhob'.

9 Ha' eb'naj ichamta winaj ah Gebal kaw helan,
eb'naj chiwatx'en isbarco konhob' Tiro chi'etaxtoj.
Sunil eb'naj ch'ek' yul barco ch'apni eb'naj isloq'o' tzet chitxonh-
lax yul konhob'.

10 Ha' eb'naj ah Persia, yeb' eb'naj ah Lud yeb' eb'naj ah Fut,
ha' eb'naj ayko issoldadohalo konhob' Tiro.
Ha' ch'en escudo chipahni lit' yeb' ch'en casco chiyahto
eb'naj yinh iswi', lokan ch'en yinhla isk'ul k'ub', yelawil konhob'
yeko ch'en.

Ha' eb'naj soldado tu' kaw ismay konhob' Tiro yeko eb'naj.

11»Ha' eb'naj ah Arvad yeb' issoldadohal konhob' Tiro hoyaniko eb'naj
yinhla ismurohal konhob', haxa yul istorrehal, ha' eb'naj ah Gamad
ayahtoj, ha' yescudo eb'naj chipahni lit' lokankanh ch'en yinhla isk'ul
k'ub', kaw ay ismay jilni konhob' tu' yu ch'en.

12»Ha' eb'naj ah Tarsis chiyaq' eb'naj ch'en plata, ch'en hierro, ch'en
estaño yeb' ch'en plomo selelo tzetaj chisloq' tet konhob' Tiro, yuto kaw
q'alomkano konhob' tu'. ¹³Hakpax tu' konhob' Javán, konhob' Tubal
yeb' konhob' Mesec, chiloq'wi tet konhob' Tiro. Ha' tzet chiyaq' istoho-
lo tzet chisloq' tu', ha' ton eb'naj chejab' yeb' tzetaj ye tu' watx'eb'il yinh
ch'en bronce. ¹⁴Hakpax tu' konhob' Togarma chiyaq' no' cheh ijtzom

yeb' no' cheh yet howal yeb' no' mula selelo tzet chisloq' tet konhob' Tiro. ¹⁵Hakpax tu' konhob' Dedán yeb' tx'i'al konhob' ayayo isti'la ha' mar, chisloq' tzetaj chistxonh konhob' Tiro chiyaq'ni ch'en marfil yeb' te' ébano istoholo tzet chisloq' tu'. ¹⁶Hakpax tu' anma ah konhob' Edom apni loq'wo b'ey Tiro yuto kaw tx'i'al tzet chistxonh konhob' tu', yaq'ni Edom tu' ch'en perla, q'ap q'ap kaj jilni, q'ap xilq'ape ayko yelawil, q'ap lino kaw ay istohol, ch'en coral yeb' ch'en rubí selelo tzet chisloq' b'ey konhob' Tiro. ¹⁷Hakpax tu' tx'otx' Judá yeb' tx'otx' Israel, loq'wipaxo tet konhob' Tiro, yaq'ni ixim trigo ch'el b'ey Minit, yeb' ixim pastel yeb' no' kab', yeb' te' aceite, yeb' bálsamo istoholo tzet chisloq' tu'. ¹⁸Hakpax tu' konhob' Damasco apni loq'wo b'ey Tiro, yuto kaw tx'i'alkano tzet chistxonh konhob' Tiro yeb' xin kaw q'alomkanoj. Yaq'ni konhob' Damasco tu' vino chiwaxt'i b'ey konhob' Helbón yeb' no' saj lana istoholo tzet chisloq' tu'. ¹⁹Hakpax tu' konhob' Dan yeb' konhob' Javán, apnipaxo loq'wo b'ey konhob' Tiro, yaq'ni ch'en hierro watx'eb'ilxa yeb' mirra yeb' te' canela istoholo tzet isloq'o. ²⁰Hakpax tu' konhob' Dedán yaq' q'ap q'ap kaw k'ulejch'an jilni chi'ok yinh isxhilahil carruaje istoholo tzet chisloq' tet konhob' Tiro. ²¹Hakpax tu' konhob' Arabia yeb' sunil eb'naj yahawil konhob' Cedar, apnipaxo eb'naj loq'wo tet konhob' Tiro yaq'ni eb'naj no' nixhte me', yeb' no' icham me', yeb' no' chiw istoholo tzet chisloq'o. Ha' hunteq'an tu', yaq' eb'naj loq'om istoholo tzet isloq' tet konhob' Tiro. ²²Hakpax tu' eb'naj txonhom ah Sabá yeb' eb'naj ah Raama, apnipaxo eb'naj loq'wo tet konhob' Tiro, yaq'ni eb'naj sunil hunteq'an anh kaw xuq' sam kaw ay istohol, yeb' ch'en ch'en k'ulejch'an jilni, yeb' ch'en oro istoholo tzet isloq' tet konhob' Tiro. ²³Hakpax tu' konhob' Harán, konhob' Cane, konhob' Edén, konhob' Sabá, konhob' Asiria yeb' konhob' Quilmad, loq'wipaxo tet konhob' Tiro. ²⁴Ha' eb'naj txonhom ay yul hunteq'an konhob' tu', tx'i'al tzet chiyaq' eb'naj selelo tzet chisloq' tet konhob' Tiro, yaq' eb'naj q'ap q'ap yaxtz'antz'onhe ayko yelawil, yeb' xilq'ape kaw k'ulch'an jilni, yeb' tx'anh lasu kaw k'ul ye isb'ayb'anil, chistxonhnipaxo eb'naj te' cedro tet konhob' Tiro tu'.

²⁵»Ha' isbarco eb'naj ah Tarsis txolanto te' yijnik'o tzet chistxonh Tiro yeb' tzetaj chisloq'o, hak tu' yu isq'alomb'ikanokanh.

Ha' konhob' Tiro lahan haka' hunu barco kaw nohna yu q'alomal ayko yib'anh ha' mar.

²⁶Ilaxto te' barco tu' xolb'al ha' mar yu eb'naj chimaq'nik'o te', yaja' hul hune' niman jaq'eq' tit yinh yetk'ulal b'ay chi'ahilo tz'ayik, ismaq'nipoho jaq'eq' te' yib'anh ha'.

²⁷Hayet yetaxto te', istokano q'alomal ayikto yul te' yich ha', yeb' txonh, yeb' sunil tzet ay yul te'.

Istopaxkano eb'naj chimaq'nik'o te' yib'anh ha' yeb' eb'naj chiwaxt'en te', eb'naj txonhom,

- yeb' sunil eb'naj soldado yeb' sunil anma ayikto yul te',
tokano yich ha' yinh istz'ayikal yet istanhkanilo te'.
- 28 Ha' ej konhob' ay isti' ha' mar chiluylunkanh yu xiwkilal yab'en yel
yaw eb'naj chimunla yul te' barco tu' yet istokano eb'naj yich ha'.
- 29 Ha' sunil eb'naj chimaq'nik'o te' barco,
yeb' eb'naj ch'inik'o te', ayti eb'naj yul isbarco tu',
iskankano eb'naj sat tx'otx' isti' ha' mar,
- 30 yab'elax yul isnuq' eb'naj yoq' sik'leb'il yinh konhob' Tiro,
chistixhnahto eb'naj pojoj yinh iswi', kat isb'alnik'o isb'a eb'naj
xol tanh yu b'isk'ulal.
- 31 Chisk'upnilo eb'naj xil iswi' yu b'isk'ulal yinh konhob' Tiro,
chiyaniko eb'naj xilq'ape yet b'isk'ulal yinh,
chiyab'en eb'naj b'isk'ulal yinh yanma, kat yok eb'naj oq'o, k'ah
yehilo yanma eb'naj.
- 32 Chisb'itnhen eb'naj b'it yet b'isk'ulal yinh konhob' Tiro, chalni
eb'naj:
‘Ha' niman konhob' Tiro matanhkanilo xol ha' mar,
kaw machi hunuxa konhob' haka' hune' konhob' ti', xhi eb'naj.
- 33 Hayet yilaxto tzetaj chistxonh konhob' Tiro yul te' barco yapni yulaj
konnob',
kaw tx'i'al konhob' q'alomb'ikanokanh, hakpax tu' eb'naj rey
q'alomb'ikanokanh eb'naj.
- 34 Yaja' wal tinanh ma'ay isya'tajil yib'anh,
matanhkanilo xol ha' mar, matokano yich ha'.
Ha' sunil tzet chistxonho, yeb' sunil eb'naj chimunla yul konhob'
tu' matokano eb'naj yich ha'.
- 35 Ha' sunil ej konhob' ay isti'la ha' mar kaw k'aykanilo isk'ul yilni
konnob' Tiro,
haka' eb'naj yahawil ej konhob' tu' luylunkanh eb'naj yu xiwkilal,
sajpaq'poxanche eliko sat eb'naj yu xiwkilal.
- 36 Ha' eb'naj txonhom ay yulajla konhob' xanche chixuq'ab'li eb'naj
yinh konhob' Tiro.
Ha' konhob' Tiro kaw xiwkilta chi'elkanikoj,
yinh hunelnhe chitanhkaniloj,» kachi,» xhi Komam Jahawil.

28

¹ Yul istzoti' Komam Jahawil wetan, yalni haka' ti': ² «Hach
isk'ahol naj winaj, hal tet naj isreyal Tiro haka' ti': Hak ti' yalni
Komam Jahawil:

“Hach ti' kaw nohna hawanma yu lolo'al, chawalni:
‘Haninti'an, lahan hinan haka' hune' dios,
tz'onhan hinan yul istz'onhob'al hune' dios xolb'al ha' mar,' kachi.
Yaja' xin anma hach, mach Diosojach.
Chawalni ta lahan hahelanil haka' ishelanil hune' dios.

- 3 ¿Tom ek'b'alto yitz'atil hawi' yib'anh yitz'atil iswi' ya' Daniel?
¿Tom sunil tzet ye tu' ewanyehi hawohtaj?
- 4 Ha' yu hahelanil yeb' yu hanab'al hatenb'a q'alomal,
hatenb'anpaxo ch'en oro yeb' ch'en plata b'ay k'uwan haq'alomal.
- 5 Ha' yu hawip yeb' yu hahelanil yinh txonh, yuxin kaw ch'ib'kano-
kanh haq'alomal,
yaja' haq'alomal tu' aniko lolo'al yinh hawanma.
- 6»Yuxin hanin Yahawilinti'an chiwalan:
Yu hawuteko hawanma haka' yanma hune' dios,
- 7 yuxin chiwaq'tijan eb'naj nan konhob'al tawinh, eb'naj kaw
howkanoj,
chiyinahti eb'naj yespada tawinh, kat istanhkanilo
hak'ulch'anil yeb' hahelanil, kat yelkano ispixan isq'aq'al hamay.
- 8 Chach alaxkanto yul kamb'al, yuto chachpotx'laxkamo
haka' chu ispotx'laxkamo eb'naj winaj xol yiktab'al ha' mar.
- 9 ¿Chimkaxhtzotel tet naj chachpotx'nikamoj, chawalni ta Dios hach?
Hach ti' anma hach, mach Diosojach,
lahan hach haka' komon anma yul isq'ab' naj chachpotx'nikamoj.
- 10 Hanin Yahawilinti'an, haninan chiwalan ta haka' chu ispotx'lax-
kamo eb'naj winaj mach yechel circuncisión yinh,
hak tu' chu hapotx'laxkamo yu eb'naj nan konhob'al,»
xhi Komam Jahawil tet naj rey ah Tiro.
- 11 Yul istzoti' Komam Jahawil, yalni haka' ti': 12 «Hach isk'ahol naj
winaj b'itnhe b'it yet b'isk'ulal yinh naj rey ah Tiro chawalni: Hak ti'
yalni Komam Jahawil haka' ti':
“Hach ti' kaw tohol hachtik'a sik'leb'il, yeb' xin kaw aytik'akano
hanab'al,
yeb' xin kaw k'ulch'an hachtik'a.
- 13 Ha' b'ey Edén, yul ispeyab' Komam Dios ayachtik'a,
ha' sunil ch'en ch'en k'uulejch'an jilni ayko hawelawiloj,
ha' ton ch'en cornerina, ch'en topacio, ch'en jaspe,
ch'en crisólito, ch'en berilo, ch'en ónice, ch'en zafiro,
ch'en carbunclo, ch'en esmeralda, yeb' ch'en oro.
Alaxiko te' tinab' yeb' te' su' yu eb'naj winaj kaw helan yet
hawatx'ikanoj.
- 14 Hach ti' querubín hach, kaw niman hawelapnoj, aq'b'il hawip yinh
tanhehomal,
kach yako Komam Dios b'ey witz yet Komam yehi,
ha' tu' kaxhehi, kach ek' xolaj ch'en ch'en ayko q'a' yinh.^t
- 15 Kaw toholtik'a sunil hab'eyb'al yettaxtik'a istz'ayikal hawatx'i,

^t 28:14 Xol ch'en ch'en ayko q'a' yinh, hune' ti' chalpaxo yelapnoj, xol ej tx'umel.

- yaja' masanto ilchalo istx'ojal tawinh,
 16 yu kaw ch'ib'kanokanh hatxonh,
 yuxin kaw ahkanokanh hatx'ojal yeb' hamul.
 Hach querubín, aq'b'il ismunil yinh tanhehomal,
 haninan kach wilojan b'ey witz wetan yehi,
 kach inq'ojnilojan xol ch'en ch'en ayko q'a' yinh.
 17 Kaw lolo'b'ikanilo hawanma yu hak'ulch'anil,
 hawetato hahelanil yu isq'aq'al hamay, yuto hawako hamay,
 yuxin haninan kach inq'ojyoyojan sat tx'otx' yu ismatz'li eb'naj is-
 reyál konhob' tawinh.
 18 Yu tzetk'a hamul hawatx'e yeb' haweta makta loq'wi yeb' tx'onhwi
 tawet yuxin etaxto hatemplo,
 yuxin waq' elotijan q'a q'a' tawinh, kach isnhusnito q'a'.
 Tanhyanhe kaxheliko sat tx'otx' wuhan sata sunil mak kach ilni.
 19 Sunil makta kach ohtanhen sat tx'o tx'otx' ti' kaw chitakilo isk'ul
 kach yilni,
 kaw chixiw anma kach yilni, kach tanhkanilo yinh hunelnhe,»
 xhi Komam.

Tzoti' hal-laxkano yib'anh konhob' Sidón

- 20 Hul istzoti' Komam Jahawil wetan yalni haka' ti': 21 «Hach isk'ahol
 naj winaj t'anhxanhto yinh yetk'ulal konhob' Sidón, chawalni isya'tajil
 chul yib'anh. 22 Chawal, hak ti' yalni Komam Jahawil:
 “Hex ah konhob' Sidón, haninti'an chiwayojan howal teyib'anh.
 Ch'alaxiko inmayan, yul ej konhob' yu tzet chinwatx'ehan teyinh,
 chiyohntanhenilo anma ta haninti'an Yahawil hinan yet chiwan-
 ayojan isya'tajil teyib'anh,
 kat yalaxiko inmayan.
 23 Chiwayojan howla yab'il teyib'anh, chexpotx'laxkamo yul konhob',
 chik'xanhe chi'ek' yulaj b'eh, cheyohntanheniloj ta haninti'an
 Yahawil hinan.
 24 Hex ah Sidón, lahan hex haka' hunu te' tx'ix kaw xixi' iswi' kaw ya'
 chilow yinh konhob' Israel,
 yaja' wal tinanh matxa b'aq'inal chu haka' tu'.
 Hakpax tu' hunteq'anxa konhob' chiyahni Israel, ayko yinhla isho-
 yanil, matxa chisyaha',
 hak tu' chu yohtanhenilo anma ta haninti'an Yahawil hinan,» xhi
 Komam tet eb'naj ah Sidón.
 25 Yalnipaxo Komam Jahawil: «Hayet chinkutxb'anikojan anma Israel
 yulajla konhob' b'ay pujantoj chinyenilojan ta hanhe hinan kaw ay we-
 lapnojan xol inkonhob'an sata anma ay yulajla nimeta konhob'. Hayet
 chinkutxb'ako tu'an chi'eh sat istx'otx', tx'otx' waq'kanojan tet ya' Jacob

inchejab'an. ²⁶Chi'ehayo eb'naj sat istx'otx' yinh aq'ank'ulal, chiswax'en-kanh eb'naj yatut, chistz'unni eb'naj te' uva. Chi'ehayo eb'naj sat tx'otx' yinh sunil isk'ul. Haninan chiwayojan isya'tajil yib'anh hunteq'an nimeta konhob' etliko yinh eb'naj Israel, hak tu' xin chiyu yohtanhenilo eb'naj tato haninan Yahawil hinan, yeb' xin isDiosal eb'naj,» xhi Komam.

Hal-lax isya'tajil chi'ay yib'anhilo Egipto

29 ¹Ha' yinh 12 (iskab'lahonheb') tz'ayik, yinh 10 (islahonheb') ixahaw, yet (lahonheb'xa) hab'il, jokanh preso, yul istzoti' Komam Jahawil wetan, yalni haka' ti': ²«Hach isk'ahol naj winaj, t'anh-xanhto yinh yetk'ulal Egipto b'ay ay naj rey faraón, chawalni isya'tajil chi'ay yib'anh naj yeb' yib'anh sunil konhob' Egipto tu'. ³Chawalni haka' ti': Hak ti' yalni Komam Jahawil:

“Haninti'an ayko inhowalan tawinh hach Faraón, isreyal Egipto; hach lahan haka' hunu no' dragón, ayayto xol ha ha', chawalni: ‘Ha' niman Nilo ti' wetan, yuto haninan watax'enhe ha’,’ kachi.

⁴Yaja' haninan chiwakojan ch'en gancho yul hati', chachwinahtijan xol ha'.

Hayet chachwinahtijan tu' chi'ahpaxti sunil no' kay ay xol ha' tawintaj, yuto chi'ok nhak'no no' yinh hatz'umal yet chachwinahtijan xol ha'.

⁵Chachwanitojan sat tx'otx' desierto yeb' sunil no' kay ahti tawinta xol ha' Nilo.

Chachkankano b'alno sat tx'otx', machi mak chachsik'nikanh, nitam mak chachmujni; wal xin chachwaq'an isk'uxu' no' howla noq' ay sat tx'o tx'otx', kat yulpaxo no' ch'ik chi'ek' satkanh kach ist'ojotoj.

⁶Chiyotanche sunil anma ay sat tx'otx' Egipto ta haninti'an Yahawil hinan,

yuto ha' konhob' Israel, halni tawet ta chachkolwal yinh, yaja' lahan hach haka' hunu te' ah ch'ok q'ojochoj.

⁷Hayet yok tzab'no eb'naj yinh te' isq'ahto te', istzilmoto yul isq'ab' eb'naj yu te',

yeb' xin hayet yanayo eb'naj yip yib'anh te', isq'ahkanto sunil eb'naj yinh hunelnhe yu te',» xhi Komam.

⁸»Yuxin hak ti' yu yalnipaxo Komam Jahawil: “Haninan chiwaq'-tijan eb'naj yet howal yeb' yespada tawinh, haxa anma ay yul konhob' Egipto chipotx'laxkamoj kat ispotx'laxpaxokamo no noq'. ⁹Chiwayojan isya'tajil yib'anh tx'otx' Egipto, kaw tz'inan chukano tx'otx', hak tu' chu yohtanhenilo anma ah Egipto ta haninti'an Yahawil hinan. Yuto hach ti' hawala: ‘Ha' ha' niman Nilo wetan ha', haninan watax'enhe ha’,’

kachi. ¹⁰Yuxin chiwakojan howal tawinh, yeb' yinh ha ha' ay sat tx'otx' Egipto chawal hawetoj. Chiwanayojan isya'tajil yib'anh tx'otx' Egipto, kaw tz'inan chukano tx'otx', haka' tx'otx' desierto. Ha' isya'tajil chiwayo tu'an, chitaichiti b'ey Migdol masanta ch'apni b'ey Sevene yeb' b'ey ismohon tx'otx' Etiopía. ¹¹Machi hunu mak ti' chi'anayo voj yib'anh tx'otx', matxapaxo hunu no noq' chi'ek' sat tx'otx', yulb'al 40 (kawinaj) hab'il. ¹²Chiwutekojan tx'otx' Egipto ti', kaw tz'inan sata hunteq'anxa tx'otx' kaw tz'inankanoj, kat yuchk'alaxkanto ej konhob' ay yul ismajul Egipto yinta ej konhob' xa'uchk'alaxto; yulb'al 40 (kawinaj) hab'il ch'ay isya'tajil yib'anh tx'otx' Egipto. Ha' anma ah Egipto, chisajlemito wuhan xolaj nimeta nan konhob'al, chipujnato anma sunil sat yib'anhq'inal," xhi Komam.

¹³»Yuto hak ti' yalni Komam Jahawil: “Hayet chilahwi yek'to 40 (kawinaj) hab'il, chinkutxb'anpaxikojan eb'naj Egipto pujnato xolajla ej konhob', kat ismeltzo sat istx'otx'. ¹⁴Ha' anma ah Egipto ilaxto preso tu' chimeltzo wuhan, chiwinitojan sat tx'otx' Patros, istx'otx' b'ay pitzk'anahi, chiswatx'enkanh iskonhob', yaja' chiyahlaxo iskonhob' tu'. ¹⁵Ha' tx'otx' Egipto ti' matxa yelapno sata hunteq'anxa konhob', matxa b'aq'inhal chiyiq'kanh yip yib'anh ej konhob', yuto haninan chiwilojan yip yunhe matxa chiq'oji yib'anh ej konhob'. ¹⁶Matxa b'aq'inh chi'ok Egipto ti' yipo isk'ul konhob' Israel. Hayet chiyilni konhob' Israel yay isya'tajil yib'anh Egipto ti', chisnaniitij ta kaw yako ismul yet iskawxi isk'ul yinh Egipto, kat yohtanheniloj ta haninti'an Yahawil hinan,» xhikano Komam Jahawil.

¹⁷Ha' yinh 27 (hujeb' iskawinaj) hab'il, yinh b'ab'el ixahaw, yinh b'ab'el tz'ayik, istzotel Komam Jahawil wetan, yalni haka' ti': ¹⁸«Hach isk'ahol naj winaj, ha' naj Nabucodonosor isreyal Babilonia kaw niman munil yako naj yib'anh issoldado yet yaq'ni eb'naj howal yinh konhob' Tiro. Sunil eb'naj soldado tu' ay hona xil iswi', islahwi iswixik', yaja' xin mach yiq' naj Nabucodonosor istohol yeb' issoldado yet yaq'ni howal yinh konhob' Tiro. ¹⁹Yu tu', yuxin hanin Yahawilinti'an chiwalan: “Chiwaq'an tx'otx' Egipto tet naj Nabucodonosor, chiyinilo naj isq'alomal tx'otx' yeb' sunil tzet ay sat tx'otx', chistohlan naj Nabucodonosor tu' issoldado yu tzet chiyito b'ey Egipto. ²⁰Hanin Yahawilinti'an chiwalan ta chiwaq'an tx'otx' Egipto tet naj rey Nabucodonosor istoholo ismunil naj yet yaq'ni howal yinh Tiro, yuto wetan hune' munil iswatx'e eb'naj tu',” xhi Komam.

²¹»Hayet hune' tiempohal tu' chiyiq'paxokan yip konhob' Israel hunel-xa wuhan, kat inhajnihan hati', kat hawalni intzoti'an xol eb'naj, hak tu' chu yohtanheniloj ta haninti'an, Yahawil hinan,» xhi Komam.

30 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, hal intzoti'an, chawalni: “Hak ti' yalni Komam Jahawil:

Oq'anhwej, cheyalni: '¡Ay, lanhanxa yul istz'ayikal b'ay chihul isya'tajil!' kexchi.

3 Yuto lanhan ishitzti tz'ayik b'ay chihul isya'tajil,

ha' ton hune' tz'ayik yet Komam Jahawil.

Ha' hune' tz'ayik tu', kaw b'isk'ulal,

lahan haka' yet kaw moyantanhe.

Ha' yinh hune' tz'ayik tu', chi'ay isya'tajil yib'anh ej nimeta konhob'.

4 Chi'alaxoko howal yinh Egipto, kat yelq'alaxto isq'alomal,

chi'uchk'alaxkanto konhob' Egipto tu', yeb' sunil iscimentohal;

wal anma ah Etiopía xin chiluylunkanh yu xiwkilal yu yilni ispotx'laxkamo anma ah Egipto.

5 Hakpax tu' anma ay yul konhob' Etiopía, yeb' Fut, yeb' Lud yeb' sunil Arabia, yeb' Libia,

yeb' anma ay yul hunteq'an konhob' ay istrato yeb' Egipto chitej-laxkamo yu espada yinta anma ah Egipto.

6 Hak ti' yalnipaxo Komam Jahawil: Hakpax tu' hunteq'anxa konhob' kolwa yinh Egipto chitanhpaxiloj.

Ha' yip Egipto b'ay kaw chislolo'nhe isb'a, chitanhpaxiloj.

Ha' anma ay yul konhob' Migdol masanta konhob' Sevene chitej-laxkamo yu espada xol howal," xhi Komam Jahawil.

7»Ha' tx'otx' Egipto kaw tz'inan chi'elkaniko sata hunteq'anxa tx'otx' kaw tz'inan, haxa ej konhob' ay yul ismajul Egipto chi'uchk'alaxkanto yinta konhob' xa'uchk'alaxkantoj. 8 Chiyohantelo anma ta haninti'an Yahawil hinan yet chiwanokojan q'a' yinh Egipto yu istz'akantoj, yeb' yet ch'ay isya'tajil yib'anh konhob' chikolwa yinh.

9»Hayet chi'ay isya'tajil yib'anh Egipto, chinchejtojan eb'naj chejab' yib'anh ha' mar yalno tet anma ah Etiopía, anma kaw matzet chal isk'ul, yaja' hayet chiyab'eni, kat yok niman xiwkilal yinh. Ha' hune' tz'ayik tu' kawilxa yetij.

10»Hanin Yahawilinti'an chiwalan: "Haninan chiwakojan isq'alomal Egipto yul isq'ab' naj Nabucodonosor, isreyal Babilonia kat istanhkanilo naj. 11 Ha' naj Nabucodonosor ch'apni yeb' issoldado yeb' eb'naj winaj kaw ay yip ay yul nimeta konhob' yuchk'akanto konhob' Egipto, chis-potx'nikamo eb'naj anma yu yespada, chinohkanilo konhob' yu anma kamom. 12 Chiwaq' tajolojan ha ha', chiwanikojan tx'otx' Egipto yul isq'ab' eb'naj winaj kaw tx'oj, haxa eb'naj nan konhob'al chitanhtzenkanilo konhob' Egipto yeb' sunil tzet ay yul konhob' tu'. Ha' hunteq'an isya'tajil ti' hanin Yahawilinti'an chiwalkanojan," xhi Komam.

13»Yalnipaxo Komam Jahawil haka' ti':

Chiwuchk'apaxtojan hunteq'an tioxh yeb' hunteq'an yechel komon dios ay b'ey konhob' Menfis,

matxa mak chi'ok yahawilo ej konhob' ay yul ismajul tx'otx'
Egipto,

chiwanikojan xiwkilal yinh anma ah Egipto.

14 Ha' konhob' Patros, chintanhtzelojan,

haxa konhob' Zoán chiwakojan q'a' yinh,

chiwanayojan isya'tajil yib'anh konhob' Tebas.

15»Chiwayojan inhowalan yib'anh konhob' Sin, konhob' kaw ayko yipo Egipto, chintanhtzekanilojan anma ah Tebas. 16Chintzujb'akojan q'a' yinh Egipto, haxa anma ah konhob' Sin kaw chiyab'e isya'il, chintanhtzenkanilojan konhob' Tebas, haxa konhob' Menfis naunhe chiyab'en isya'tajil. 17Ha' eb'naj tzehtaj ah konhob' Avén yeb' eb'naj ah konhob' Pibeset chitejlaxkamo eb'naj yu espada, haxa eb'ix ix chi'ilaxto eb'ix preso. 18Hayet chintanhtzenilojan yip Egipto, yip kaw chi'aniko ismay, chipáxilo yip yoj tz'ayik b'ey konhob' Tafnes kat isq'ejholiloj, haxa anma ay yulajla yaldeahil, chi'ilaxto preso. 19Hayet chiwanayojan isya'tajil yib'anh Egipto chiyohntanhenilo anma ta haninti'an Yahawil hinan,» xhi Komam.

20Hayet 11 (hunlahonheb'xa) hab'il, yinh isb'ab'el ixahaw, yinh ishuj tz'ayik istzotel Komam Jahawil wetan, yalni haka' ti': 21«Hach isk'ahol naj winaj, xahinq'ahiltojan isq'ab' naj faraón, isreyal Egipto. Machi xin mak chi'anhten isq'ab' naj, machi mak chik'alni tet naj yu iswatx'ikoj, kat yiq'ni yip isq'ab' naj istzab'ni ch'en espada. 22Yuxin hanin Yahawilinti'an chiwalan ta chiwakojan howal yinh naj faraón, isreyal Egipto, chinmaq' q'ahojan isq'ab' naj iskab'il, hune' k'ul yeb' xin hune' xatik'a inmaq' q'ahojan, yu yayk'ay yespada naj yul isq'ab'. 23Chisajlemito eb'naj Egipto wuhan xolaj nimeta konhob', chipujnakanh eb'naj wuhan sat yib'anhq'inal ti'. 24Haninan chiwaq'an yip isq'ab' naj rey Nabucodonosor, chiwanikojan wespadahán yul isq'ab' naj; wal naj faraón xin chinmaq' q'ahojan isq'ab' naj, kat isq'ajwi naj sata naj rey Nabucodonosor haka' isq'ajwi hunu mak lanhan iskami. 25Haninan chiwaq'an yip isq'ab' naj rey Nabucodonosor; wal isq'ab' naj faraón chipax lohnahi. Chiwakojan wespadahán yul isq'ab' naj rey Nabucodonosor, chiyaq'ni naj howal yinh Egipto, hak tu' chu yohtanheni ta haninti'an Yahawil hinan. 26Chisajlemito eb'naj Egipto wuhan xolaj ej nimeta konhob', kat ispujnakanto eb'naj sunil sat yib'anhq'inal ti', hak tu' chu yohtanheniloj ta haninti'an Yahawil hinan,» xhi Komam.

31 1Ha' yinh isb'ab'el tz'ayik, yinh isyox ixahaw, yet 11 (hunlahonheb'xa) hab'il jokanh preso, hul istzoti' Komam Jahawil wetan, yalni haka' ti': 2«Hach isk'ahol naj winaj, tzotelanh tet naj faraón, isreyal Egipto yeb' tet anma ay yul ismajul Egipto, chawalni:

“Hach faraón, ¿mak yeb' halahb'a hawip yet ayachkanh?

3 Lahan hach haka' tx'otx' Asiria, tx'otx' yet payxa haka' te' cedro ay b'ey tx'otx' Líbano kaw k'ulch'ankano jilni isq'ab',

yeb' xin kaw niman sat, yeb' kaw nimajal istel; iswi' te' chitaa-hapno satkanh.

4 Kaw k'ul yu isch'ib'kanh te' yu ha' nhab' yeb' yu ha ha' ay sat tx'o tx'otx',

yuto kaw ch'ek' yojomal ha ha' yich te',

hak tu' xin chu yek'paxo yojomal ha' yich sunil hunteq'anxa te' q'eb'taj ay b'ey tu'.

5 Kaw nimajal ch'ib'kanokanh istel te' yib'anh sunil ej te' q'eb'taj,

yuto kaw niman ha ha' chi'ek' yojomal yich te',

kaw niman isq'ab' te' eliløj yeb' xin kaw nimej eliko istel isq'ab' te'.

6 Sunil hunun majan no' ch'ik hul iswatx'e' yatut yinh isq'ab' te',

sunil no' xoltelajil noq' pitzk'a yunin yich te',

tx'i'al nimeta konhob' ehayo yalanh yenhel isq'ab' te'.

7 Ha' te' cedro tu', kaw niman yelapno elkaniko te' yeb' xin kaw k'ul-ch'ankano jilni te',

kaw nimejal ch'ib' istel isq'ab' te', yuto kaw tx'i'al ha ha' ch'ek' yich te'.

8 Machi hunu te' cedro ay yul ispeyab' Komam Dios lahan haka' te' niman cedro tu',

ha' te' tz'isis mach apni isq'ab' te' haka' te',

hakpax tu' te' castaño, mach apni xaj te' haka' te' niman cedro tu'.

Machi hunu te' q'eb'taj ay yul ispeyab' Komam Dios apni haka' isk'ulch'anil te' niman cedro tu'.

9 Kaw k'ulch'an yu inwatx'enan te', yuxin kaw nimankano xaj te'.

Ha' sunil te' q'eb'taj ay yul Edén,

ispeyab' Komam Dios, kaw chichiwako isk'ul te' yinh isk'ulch'anil jilni te', kachi tet naj Faraón," xhi Komam.

10»Yuxin hak ti' yu yalnipaxo Komam Jahawil: "Ha' te' niman cedro tu', kaw nimajalkano istel te', yeb' xin kaw palk'onkanokanh istel te' yib'anh te' q'eb'taj, yuxin kaw lolo' elkaniko te'. 11 Haninan chiwakojan te' yul isq'ab' hune' naj winaj kaw aykano yip xol eb'naj winaj ay yulaj ej nimeta konhob'; chaq'ni naj isya'tajil tet haka'tik'a istx'ojal iswatx'e. Haninti'an yahb'ilxa te' niman cedro tu' wuhan. 12 Chitzok'laxayo te' yu eb'naj winaj kaw ay yip, ay yulajla nimeta konhob', kat istanhtze-laxkanilo yu eb'naj nan konhob'al. Chiq'ahto isq'ab' te' yet chi'ayk'ay yib'anh witz, yeb' yib'anh ej ak'al, yeb' yib'anh ha' nixhte ha' ay sat tx'o tx'otx'. Haxa ej konhob' ayayo yalanh yenhel te', chi'elkanh, kat isb'ej-laxkano te' ischukil. 13 Hayet isq'ajlaxayoj te' yul sunil ismajanil no' ch'ik ch'ek' satkanh eho yib'anh xe' te', yek' no' xoltelajil noq' xolaj isq'ab' te'.

14 Yunhe matxa hunu te te' kaw nimajal istel ayayo isti'la ha ha' chis-lolo'nhe isb'a, yeb' xin matxa te' chipalk'on istel yib'anh te q'eb'taj. Yeb'

yunhe matxa chikawxi isk'ul yinh yu kaw ay ha ha' yich, yuto sunil te' chiq'ajlaxayoj. Ha' chal yelapno tu', to ha' sunil eb'naj nime winaj, yahaw nime konhob', chitanhkanilo yinh eb'naj winaj chitokano yul kamb'al.

¹⁵»Hanin Yahawilinti'an chiwalan: Hayet chi'apni te' niman cedro ti' yul yich kamb'al, chiwaq' tajoyojan ha' mar yu b'isk'ulal, kat islinhi yek' yojomal ha', kat yay niman q'ejhlo yib'anh tx'otx' Líbano, kat ispaxilo yip sunil te' q'eb'taj yu b'isk'ulal. ¹⁶Wakantojan te' yul kamb'al, yapnikano isk'atanh hunteq'an kamom ay b'ey tu'. Hayet isb'ili yet yayk'ay tu', waq'ni b'ilojan nimeta konhob' yintaj, hak tu' xin kaw tzala sunil te te', kaw ay ha ha' ek' yich yet yalanhtokanoj, yaja' wal tinanh ayxa b'ey yul kamb'al, b'ay nahat yich tx'o tx'otx', ha' ton sunil te' q'eb'taj kaw ocheb'il yul peyab' Edén yeb' te' kaw ocheb'il b'ey tx'otx' Líbano. ¹⁷Aypaxkanto hunteq'an tu' yinta naj faraón yul kamb'al, yeb' makta potx'laxkamo yu espada yaypaxkanto yul kamb'al yinta naj, makta kolwa yinh, yeb' ej nimeta konhob' yenhelnhe isb'a yalanh yenhel te' niman cedro, yechel naj faraón tu'.

¹⁸»¿Mak yeb' halahb'a hab'a yeb'i yinh te' q'eb'taj ay b'ey Edén, yinh isk'ulch'anil jilni yeb' yinh isnimanil yelapnoj? Hach ti' tzok'b'il hachayoj yeb' te' q'eb'taj ay b'ey Edén, ay b'ey tx'otx' kaw nahat yehayto yich, yul tx'otx' b'ay ay kamom anma mach circuncisión yinh, hunteq'an potx'laxkamo yu espada. Hunteq'an ti', ha' ton naj faraón yeb' sunil yet konhob'. Hak tu' yalni Komam Jahawil,» kachi,» xhi Komam.

32 ¹Ha' yinh isb'ab'el tz'ayik, yinh 12 (iskab'lahonheb') ixahaw yet 12 (kab'lahonheb'xa) hab'il jokanh preso, yul istzotel Komam Jahawil wetan, yalni haka' ti': ²«Hach isk'ahol naj winaj, b'itnhe hune' b'it yet kamikal yinh naj faraón, isreyal Egipto, chawalni:

“Hach ti' lahan hach haka' hunu no' b'alam ay xolaj nimeta konhob', yeb' haka' hunu no' dragón ay xol ha' mar.

Chamaq'ob'tanhe ha' yu hawoj, kat istatb'ikanh ha', kat haxanhob'tanhen ha' nixhte ha'.

³»Yalnipaxo Komam Jahawil haka' ti' yinh naj faraón:

Haninan chiwaytojan tx'anh hak' tawib'anh, yet chinkutxb'anikojan tx'i'al konhob', kat hakankano yul inhak'an, haxa konhob' tu' chaxhinahti isti ha'.

⁴Chach inhatxnitijan kat hakankano pak'no sat tx'otx', kat yul sunil no' ch'ik kach isxanhob'tanheni, kat kach isk'uxnito no' xoltelajil noq'.

⁵Chiwakojan hachib'ehal iswi'la witz, chinnohtzelojan ej ak'al yu hab'ajil.

⁶Chiwaq' chak'anb'ojan tx'o tx'otx' yu hachik'il masanta yichla witz, kat isnohilo isb'eh ha ha' yu hachik'il.

7 Hayet chachtanhkaniloj chiq'ejholilo satkanh,
kat isq'ejholilo tx'umel, kat yok moyan yinh sat tz'ayik,
yeb' xin matxa chimujli yoj ixahaw.

8 Chiwalan ta chitanhilo ismujlub'al sunil tzet chitzejtzon satkanh,
chiwanayojan q'ejholo yib'anh hatx'otx' yet chachtanhiløj," xhi
Komam Jahawil.

9»Yalnipaxo Komam: Chiwanikojan b'isk'ulal yinh yanma tx'i'al
konhob', yet chi'ilaxto hawet konhob' preso yulajla nimeta konhob'
mach ohtab'il hawu. 10 Chiwakojan niman xiwkilal yinh tx'i'al konhob'
yet chachyilni, chiwanipaxikojan niman xiwkilal yinh eb'naj isreyal
hunteq'an konhob' tu' yet ch'ek' jepla wespadhan yinh sat eb'naj. Ha'
istz'ayikal yet chachtanhiløj toxanhe chiluylunkan sunil anma yu xiw-
kilal, 11 yuto hanin Jahawil inti'an, chiwalan haka' ti':

Ha' yespada naj isreyal Babilonia chilow tawinh,

12 chintanhtzelojan hakonhob' yu yespada eb'naj winaj kaw aykano
yip,
ha' sunil hunteq'an eb'naj tu', ha' eb'naj kaw aykano yip xolaj
nimeta konhob'.

Ha' eb'naj chitanhtzenkanilo islolo'al konhob' Egipto,
kat istanhkanilo anma kaw nimankano isb'isil ay sat tx'otx'
Egipto.

13 Chintanhtzekanilojan sunil isnoq' naj Faraón chi'uk'ni ha ha' ay sat
tx'otx' Egipto,
matxa hunu anma chitz'ilnhento ha' yu yoj,
matxa hunu no noq' chitz'ilnhento ha' yu yisq'aj.

14 Chiwalan ta hak tu' chu waq'ni sajb'ojan ha ha',
kat yel yojomal ha' haka' aceite,» xhi Komam Jahawil.

15 Yalnipaxo Komam: «Hayet kaw chitz'inhlokano tx'otx' Egipto kat yi-
laxilo sunil tzet ay sat tx'otx',
yeb' yet chinpotx'kamojan sunil mak ay sat tx'otx',
chiyotanheniløj ta haninti'an Yahawil hinan.

16»Ha' hune' ti' b'it yet kamikal chib'itnhelaxi, ha' chisb'itnhe eb'ix
ix ay yulajla nimeta konhob', yet chi'oq' eb'ix yinh konhob' Egipto, yeb'
yinh sunil anma ah Egipto,» xhi Komam Jahawil.

17Ha' yinh 15 (isholanheb') tz'ayik, yinh 12 (iskab'lahonheb') ixahaw,
yet 12 (iskab'lahonheb'xa) hab'il jokan preso, hul istzoti' Komam
Jahawil wetan yalni haka' ti': 18 «Hach isk'ahol naj winaj, b'itnhe hune'
b'it yet b'isk'ulal yinh anma ah Egipto kaw nimankano isb'isil, yeb' yinh
eb'ix iskutz'in nimeta konhob'. Chaq'ojnayto yul kamb'al yalan tx'o
tx'otx' yetb'iho anma chilaalaxayto b'ey tu'.

19 Chawalni tet: “¿Tajka chenah ta ek'b'al hek'ulch'anil sata hunteq'an-
xa maka?

- Wal xin chexalaxayto yul kamb'al,
 b'ay ay kamom anma mach circuncisión yinh," kachi tet.
- 20»Ha' hunteq'an anma tu',
 chi'ayk'ay yu espada yinta anma chitejlaxkamo xol howal, chi'alaxo-
 ko yul isq'ab' espada,
 ha' naj faraón tu' iweto naj yeb' sunil yet konhob' yul kamb'al.
- 21 Ha' yul kamb'al tu', chitzotel eb'naj yahaw kaw aykano yip ayxa
 b'ey tu' tet naj faraón yeb' eb'naj kolwa yinh naj,
 ha' ton eb'naj ayayto yul kamb'al b'ay ay kamom anma tejlax-
 kamo yu espada machi circuncisión yinh.
- 22 Ha' b'ey tu', ayayto Asiria yeb' sunil issoldado kaw niman isb'isil,
 tejlaxkamo yu ch'en espada xol howal; ha' b'ay mujb'il naj rey
 Asiria tu',
 hoyb'ilayo yu b'ay muji eb'naj issoldado naj.
- 23 Ha' eb'naj tu', mujb'il eb'naj yul holan kaw nahat yich,
 hoyaniko yinh b'ay mujb'il naj rey Asiria,
 ha' sunil eb'naj tu' tejlaxkamo eb'naj yu ch'en espada xol howal,
 ha' ton eb'naj aq'ni niman xiwkilal xol anma itzitz ay sat tx'o
 tx'otx' ti'.
- 24 Ha' b'ey yul kamb'al tu', ayxapaxayto konhob' Elam,
 yeb' sunil issoldado kaw nimankano isb'isil,
 hoyaniko b'ay mujb'il eb'naj yinhla b'ay mujb'il naj isreyal
 konhob' Elam.
 Sunil eb'naj, tejlaxkamo yu ch'en espada xol howal,
 istokano eb'naj yul kamb'al yul tx'o tx'otx' kaw nahat yich;
 ha' hunteq'an eb'naj tu', machi circuncisión yinh.
 Ha' ton eb'naj aq'ni niman xiwkilal yila' anma itzitz ay sat tx'o
 tx'otx'.
- 25 Ha' b'ay mujan naj isreyal Elam,
 hoyb'ilayo yu b'ay mujan sunil issoldado naj kaw nimankano
 isb'isil;
 ha' sunil eb'naj tu', mach circuncisión yinh, potx'laxkamo eb'naj
 yu espada xol howal.
 Ha' ton eb'naj tu' aq'ni niman xiwkilal yila' anma itzitz ay sat tx'o
 tx'otx' ti',
 yaja' wal tinanh matxa chinawi yu eb'naj tzet chute isb'a yul
 kamb'al xol kamom anma.
- 26 Ha' b'ey yul kamb'al tu', ayxapaxayto naj Mesec yeb' naj Tubal yeb'
 sunil issoldado kaw nimankano isb'isil,
 ha' b'ay mujan eb'naj tu', hoyb'ilayo b'ay mujan issoldado eb'naj.
 Ha' sunil eb'naj tu' mach circuncisión yinh,
 potx'laxkamo eb'naj yu ch'en espada xol howal,

yuto yaq' eb'naj niman xiwkilal yila' anma itzitz ay sat tx'o tx'otx' ti'.
 27 Ha' eb'naj tu', hune'nhe mujan eb'naj yeb' eb'naj soldado kaw helan,
 mach circuncisión yinh, aykanto eb'naj yeb' isch'en yet howal yul
 kamb'al,
 ayikto yespada eb'naj yalanh iswi'; istokano ismul eb'naj yib'anh isb'ajil,
 yuto yaq' eb'naj niman xiwkilal yila' anma itzitz ay sat tx'o tx'otx'
 ti' yeb' kaw ay yip eb'naj.

28 »Hakachpax tu' isreyal Egipto,
 chachaqlax ek'oya' xol eb'naj mach circuncisión yinh,
 kat hamujlax yeb' eb'naj mujlax potx'laxkamo yu ch'en espada.

29 Ha' yul kamb'al tu' ay anma ah Edom yeb' isreyal,
 yeb' eb'naj yahaw ej konhob' ay yul ismajul tx'otx' Edom;
 waxanhka kaw aytik'akano yip eb'naj,
 yaja' wal tinanh ay eb'naj yul kamb'al xol kamom anma tejlax-
 kamo yu ch'en espada.
 Ha' b'ey tu' mujan eb'naj xol anma mach circuncisión yinh b'ay
 chitokano kamom.

30 Ha' b'ey tu' aypaxo eb'naj oklena yahawil tx'o tx'otx' ay yinh yet-
 k'ulal norte, yeb' sunil eb'naj ah Sidón.
 Eb'naj tu', kaw aytik'akano yip eb'naj, yaq' eb'naj niman xiwkilal
 yila' anma,
 yaja' yinhxa tx'ixwilal yu iskam eb'naj.
 Ha' eb'naj mach circuncisión yinh tu' xa'aykanto eb'naj xol
 kamom anma,
 potx'laxkamo yu espada xol howal.
 Ha' b'ey tu', matxa chinawi yu tzet chute isb'a
 yeb' yet kamomal yul kamb'al.

31 »Hanin Yahawilinti'an chiwalan ta ha' sunil eb'naj tu', chi'il-lax eb'naj yu
 naj rey faraón yul kamb'al, chiyiq'ni yaq'lob'al isk'ul naj yinh sunil issoldado
 kamom yul kamb'al. Naj faraón yeb' sunil issoldado potx'laxkamo yu ch'en
 espada xol howal. 32 Hanin Yahawilinti'an waq'an yaq'a'ko naj rey faraón niman
 xiwkilal xol anma itzitz ay sat tx'o tx'otx' ti'; yaja' xin ayxayto naj faraón yul
 kamb'al yeb' sunil issoldado kaw nimankano isb'isil xol kamom anma, mach
 circuncisión yinh, tejlaxkamo yu espada xol howal,» xhi Komam Jahawil.

4. CHIKUTXIKO ISRAEL HUNELXA SAT ISTX'OTX'

(33:1—39:29)

B'aytet yilal iswatx'en naj majwawom

(Ez. 3:16-21)

33 ¹Hul istzoti' Komam Jahawil wetan, yalni haka' ti': ²«Hach
 isk'ahol naj winaj, tzotelanh tet hawet konhob' Israel, chawalni

ta haninan chiwalan haka' ti': "Hayet chiwanitojan howal b'ey hunu konhob', ha' anma b'ey tu' chissik'ilo hunu mak chi'ok majwal. ³Hayet chiyilni naj majwawom tu', ta lanhan yapni eb'naj soldado yanoko howal yinh konhob', kat yoq'tzen naj ch'en trompeta, yu iskolni isb'a anma. ⁴Yaja' ta ay hunu mak mach chiskol isb'a yet chiyab'en yoq' ch'en trompeta, kat istejlaxkamo yu espada, ha' hune' mak tu' ha' ch'initi kamikal tu' yib'anh. ⁵Yuto yab'e yoq' ch'en trompeta, yaja' mach iskol isb'a, yuxin ha' initi kamikal tu' yib'anh. Yaja' wal mak chiyab'e yoq' ch'en trompeta, kat iskolni isb'a, mach chikami. ⁶Yaja' ta chiyil naj majwawom tu' istit eb'naj soldado yaq'a'ko howal yinh konhob', machi xin chiyoq'tze naj ch'en trompeta yu iskolni isb'a anma, yuxin hayet chi'apni eb'naj soldado tu' chistejnikamo eb'naj anma yu espada, ha' mak chikam tu', chikam yu ismul, yaja' ha' iskamikal tu' chitokano yib'anh naj majwawom tu'.

⁷»"Hach isk'ahol naj winaj, hach kach wakojan majwawomal yinh hawet konhob' Israel, ha' tzoti' ch'elti yul inti'an ha' chawal tet yu hachachwa yinh wuhan."^u ⁸Hayet chiwalnihan tet makta tx'oj isb'eyb'al haka' ti': 'Hach tx'oj, yilal chachkami,' kinchihan tet. Yaja' xin ta matzet chawal tet yunhe ispohnilo isb'a yinh istx'ojal, ha' hune' mak tu' chikam yu ismul, yaja' wal iskamikal tu' tawib'anh chitokanoj. ⁹Ta xin chawal tet anma tx'oj isb'eyb'al ta chispohilo isb'a yinh istx'ojal, yaja' xin mach chab'eto tzet chawala, ha' hune' mak tu' chikam yu ismul, yaja' wal hach, matxa hawok yinh,"» xhi Komam.

Ha' isb'eyb'al Komam Dios kaw tz'ajan

(Ez. 18:21-32)

¹⁰Yalnipaxo Komam Jahawil wetan: «Hach isk'ahol naj winaj, hal tet konhob' Israel haka' ti': "Hex ti' cheyala: 'Ha' yu komanhk'omal yeb' yu kotx'ojal, yuxin lanhan kotanhkaniloj, ¿tzetto xin chu yulkanh kok'ul kexchi?' kachi tet. ¹¹Chawalnipaxo tet haka' ti': Komam Jahawil chalni haka' ti': Hanin Yahawilinti'an, itzitz hinan mach chiwochehan iskamikal anma tx'oj, wal xin ha' hune' chiwochehan to chishel isb'eyb'al, haxinwal ay iskawil. Hex Israel meltzanhweko yul inq'ab'an cheb'ejnikano istx'ojal. ¿Hex Israel tzet yinh xin chexkami?

¹²»"Hach, isk'ahol naj winaj, hal tet hawet konhob' haka' ti': Ta ay hunu naj winaj kaw k'ul isb'eyb'al; yaja' lahwi tu' kat iswatx'en istx'ojal, hune' isk'ulal iswatx'e yet yalanhtokano mach chikolwa yinh naj. Haxpax tu', ta ay hunu naj winaj tx'oj isb'eyb'al, lahwi tu' kat isnahni isb'a, chiswatx'en isk'ulal; mach chikam naj yu istx'ojal iswatx'e yet yalanhtokano tu'. Wal xin hune' naj mulum, mach chischah naj isq'inal yu isb'eyb'al

^u 33:7 Kach wakojan *majwawomal*, yib'anhilo hune' tzoti' ti'. Ez. 3:17-21; 33:31.

k'ul yet yalanhtokano tu'. ¹³Hayet chiwalnihan tet mak tohol isb'eyb'al ta ay isq'inal, kaw xin chikawxi isk'ul yinh istoholal iswatx'e tu' chiyaniko ismul, ha' sunil istoholal iswatx'e yet yalanhtokano tu', matxa chinnatijan, wal xin chitit kamikal yib'anh yu ismul yakoj. ¹⁴Yeb' xin ta chiwalan tet mak kaw tx'oj isb'eyb'al ta chikam yu istx'ojal tu', yaja' ta chisnah isb'a kat isb'ejnikanano istx'ojal chiswatx'en isk'ulal yeb' istoholal, ¹⁵chiyaq'ni meltzo tzet ischah isk'amb'anil melyu, chiyaq'ni meltzo tzet yelq'a, chisyijen isk'ulal chiswatx'e anma itzitz sat yib'anhq'inal ti', chisb'ejnikanano istx'ojal, ha' hune' mak tu' yinh kaw yeli ay isq'inal, machi tit kamikal yib'anh. ¹⁶Ha' hune' mak tu' matxa hunu ismul yako yet yalanhtokanoj chinnatijan, yuto iswatx'e isk'ulal yeb' istoholal, yuxin yinh kaw yeli ay isq'inal.

¹⁷»Ha' hawet konhob' ti' chala ta mach toholo tzet chinwatx'ehan, hanin Yahawilinti'an, yaja' ha' eb'naj mach toholo tzet chiswatx'e. ¹⁸Hayet chispohnilo isb'a naj winaj tohol isb'eyb'al yinh isk'ulal, chiswatx'en naj istx'ojal, chitit kamikal yib'anh naj. ¹⁹Yeb' xin ta chispohilo isb'a naj winaj kaw tx'oj isb'eyb'al yinh istx'ojal, chiswatx'en naj isk'ulal yeb' istoholal, matxa chitit kamikal yib'anh naj, wal xin ay isq'inal naj yu istoholal iswatx'e. ²⁰'Ha' tzet chiswatx'e Komam Dios Jahawil, mach toholoj,' kexchi. Hex Israel haninan chiwilan tzet chexeliko hunun hex, hatatik'a tzet heb'eyb'alnhe,» xhi Komam,» kachi.

Apni isq'umal tet ya' Ezequiel ta ayk'ay konhob' Jerusalén

²¹Hayet howeb' tz'ayik yinh 10 (islahonheb') ixahaw yet 12 (kab'lahonheb'xa) hab'il jilaxtojanh preso, yapni hune' naj ispeto b'ey Jerusalén yalno wetan ta xa'ayk'ay konhob' Jerusalén yu eb'naj aniko howal yinh. ²²Yaja' yinh q'ejb'iyal yet yewihal yet yalanhto maxhto chi'apni naj ink'atanhan yanayo Komam Jahawil isq'ab' wib'anhan. Haxa yet sahab' yet apni naj ink'atanhan ishajni Komam inti'an, intzotelkanhan hunelxa, matxa tonhe tukan hinan.

²³Istzotel Komam Jahawil wetan, yalni haka' ti': ²⁴«Hach isk'ahol naj winaj, ha' anma ay yulajla konhob' xa'uchk'alaxto yul ismajul tx'otx' Israel, chala: "Ha' ya' Abraham kaw hanhech'an ya' ischukil, yaja' okkano tx'o tx'otx' yeto ya', hajxamonh kaw niman kob'isil, yuxin jet chukaniko tx'otx'," xhi. ²⁵Yuxin hal tet anma tu': "Hak ti' yalni Komam Jahawil: 'Hex ti' chek'ux no' chib'e yeb' ischik'il, cheyinayo heb'a sata hetioxh, chemaq'nikamo heyet anmahil, ζtom xin chito henah yok tx'o tx'otx' ti' heyetoj? ²⁶Hemaq'kamo anma yu heyespada, hewatx'en isyabh'etajil, heyetanto heb'a hunun hex yet heyixnhen yixal heyet anmahil, ζtom xin chito henah yok tx'o tx'otx' heyetoj?' xhi Komam,» kachi.

²⁷»Chawalnipaxo tet: "Hak ti' yalni Komam Jahawil Yahawil: Hanin-ti'an itzitz hinan, haninan chiwalan ta ha' hunteq'an anma ay yulajla

konhob' xa'uchk'alaxto tu', chimaq'laxkamo yu espada, haxa mak ay xolajla ismunil chiwakojan tet no' howla noq', chisxitnikamo no', haxa mak chikankano yul cuartel maka yulaj ch'en nhach'en chikam yu howla yab'il. ²⁸Haxa iskonhob' chinmeltzokanikojan desiertoal, chiwuchk'ankantojan, chintanhtzenkanilojan yip b'ay kaw chisololo'nhe isb'a. Ha' iswitzal tx'otx' Israel tu', kaw tz'inan chukanoj, matxa hunu mak chi'ek'i. ²⁹Ha' anma tu' chohtanheloy ta haninti'an Yahawil hinan yet chinmeltzokanikojan iskonhob' desiertoal, chiwuchk'ankantojan yu sunil isyahb'etajil iswatx'e," kachi», xhi Komam.

³⁰Yalnipaxo Komam: «Hach isk'ahol naj winaj, ha' eb'naj hawet konhob' ti' chib'uchwa eb'naj tawinh yet chischalen isb'a eb'naj b'ey ismurohal konhob' yeb' b'ey ispultahil yatut, chilatzotel eb'naj tet hunun, chilayalni eb'naj: “Wal tinanh titanhwej hijab'en istzoti' Komam Jahawil,” xhi eb'naj. ³¹Chiskutxb'ako isb'a eb'naj tak'atanh haka' chu iskutxb'aniko isb'a konhob', kat yay tz'onhno eb'naj tasataj yab'en tzet chawala haka' chu yay tz'onhno inkonhob'an, yaja' mach chisyije eb'naj tzet chawala, waxanhka xin kaw k'ulch'an istzotel eb'naj yu isti', yaja' wal yanma eb'naj tzujaniko yinta istx'ojal chiyoche. ³²Hach ti', lahan hach yul sat eb'naj haka' hunu mak chib'itni tet eb'ix q'opotaj, kaw k'ulch'an isb'itni yeb' kaw k'ul yul isnuq'. Ha' anma ti' kaw chiyab'e tzet chawala, yaja' mach chisyije.

³³»Yaja' hayet chiyij isb'a sunil tzet hawala, hunteq'an kaw toxa chiyij isb'a, chisanoti eb'naj ta watojan inchejab'an xol eb'naj,» xhi Komam.

Hal-lax isya'tajil yinh eb'naj tanhem anma Israel

34 ¹Hul istzoti' Komam Jahawil wetan, yalni haka' ti': ²«Hach isk'ahol naj winaj, hal isya'tajil chi'ay yib'anh eb'naj tanhem anma Israel, chawalni: “Hak ti' yalni Komam Jahawil: ¡Ay, kaw k'anch'an hex cheb'aliko heb'a hetanhen anma Israel, yuto hanhe hex chetanhe heb'a! Haka' eb'naj tanhem me', ζtom mach chistanhe eb'naj no' me' xin? ³Hex ti' cheyuk' yal yim no' me', chewatx'enpaxo isxil no' xilo heq'ap, chepotx'nipaxo no' kaw b'aq'ich hek'uxu', yaja' maxhtik'a chetanhepaxo no'. ⁴Mach cheyaq' ilnhe no' machi yip, mach cheyanhtepaxo no' q'ahnato yoj. Ha' no' sajlemitoj, mach heyaq' meltzo no' yul ispeyab', mach hesaypaxo no' k'aynatoj, wal xin kaw yahaw cheyute heb'a yinh no', yeb' xin kaw how hex yinh no', chemaq'ni no'. ⁵Yuxin toxanhe ch'ek' kolo no', yuto machi mak chitanhen no', chisk'uxnito no' xoltelajil noq' no', yuto chisajlemikanik'o no'. ⁶Ha' inkonhob'ti'an lahan haka' no' me' k'aynato iswi'la witz yeb' iswi'la wonhan, issajlemito no' sunil sat yib'anhq'inal ti', machi hunu mak xin chisayni no', maka chiq'amb'en no'. ⁷»Yuxin hex tanhem anma Israel, ab'ewe intzoti'an, ⁸hanin Yahawil hinan, itzitz hinan, haninan chiwalan teyet: Ha' inkonhob'ti'an lahan

haka' no' me' chi'elq'alaxtoj, chik'uxlaxto yu no' xoltelajil noq', yuto machi mak chitanheni, mach xin saylax no' yu eb'naj chitanhen no'. Wal xin hanhe eb'naj chistanhe isb'a, mach xin chistanhe eb'naj inme' tu'an. ⁹Yuxin hex tanhem anma Israel, ab'ewe istzoti' Komam Jahawil. ¹⁰Hak ti' yalni Komam Jahawil haka' ti': Haninti'an chiwiti inhowalan teyinh, hex istanhemal inkonhob'an. Chiwilojan inkonhob'an yul heq'ab', yuto hexnhe chiya' ilnhe heb'a, mach chetanhe inkonhob'ti'an.

¹¹»Yuto hak ti' yu yalnipaxo Komam Jahawil: Hankawinan chin-sayik'ojan inme' tu'an, kat wilnikojan yinh. ¹²Haka' chu yohtanhenilo naj tanhem me' isme', chissayni naj no' yet chissajlemito no', hak tu' chu wohtanhenilojan inme' tu'an. Chinkutxb'anikojan, chiwinilojan yulaj konhob' b'ay sajlemito yinh istz'ayikal yet yul isya'tajil yeb' xiw-kilal yib'anh. ¹³Haninan chiwilojan yulajla konhob', chinkutxb'anikojan chiwinitojan sat istx'otx', chintanhenan yinhla istzalanil tx'otx' Israel, yeb' b'ey isti'la ha ha' yeb' b'ey ej konhob' b'ay ay anma yul ismajul Israel. ¹⁴Chiwitojan lowo b'ay kaw yax telaj, chinwatx'enan ispeyab' yinhla istzalanil witz, ha' b'ey tu' chiway yul ispeyab' tu', chintanhenan b'ay kaw ay cheq'anh yinhla istzalanil iswitzal tx'otx' Israel. ¹⁵Hanin Yahawilinti'an chiwalan ta haninan chintanhehan inme'an, chinwatx'e-nan ispeyab'. ¹⁶Haninan chinsayan no' k'aynatoj, chiwaq'ni meltzohojan no' sajleminato tu' yul ispeyab', chiwanhtenan no' q'ahnato yoj yeb' no' machi yip, chintanhenan no' yinh kaw istoholal. Wal no' kaw b'aq'ich yeb' no' kaw ay yip chintanhtzelojan no'.

¹⁷»Hanin Yahawilinti'an chiwalan teyet hex inkonhob'ti'an: Haninan chiwilan tzet chexeliko hunun hex, hex lahan hex haka' no' me' yeb' hex lahan hex haka' no' chiw. ¹⁸Ay hex ti' haka' no' me', hanhk'anhe te' telaj kaw k'ul cheloh, haxa te' matxa chilahwi heyu toxanhe chexek'xanhxon yib'anh, cheyuk'ni ha ha' kaw saj, yaja' haxa yet chilahwi heyuk'ni ha', kat hetz'ilnhenkanto ha' yu heyoj. ¹⁹Haxa hunteq'anxa inme'an chilonito te' telaj chexanhob'tanhe, chiyuk'ni ha ha' chetz'ilnheto yu heyoj.

²⁰»Yuxin hanin Yahawilinti'an chiwalan teyet: Haninan chiwilan tzet chi'eliko no' me' b'aq'ich yeb' no' me' b'ajtanhe. ²¹Hex ti' lahan hex haka' no' me' chitennik'o yet me'al machi yip, kat issajlemikanto no' yu no'. ²²Haninan chinkolan inme' tu'an, matxa b'aq'inh xin chik'uxlaxto no' yu no' howla noq'. Haninan chiwilan tzet chi'eliko hunun no' me' tu', ta k'ul maka ta machoj. ²³Haninan chiwikanhan hune' mak chexilni hex Israel, kat kexistanheni, ha' hune' mak tu', ha' ton ya' David inchejab'an, ha' hetanhemal.^v ²⁴Hanin Yahawilinti'an chiwalan ta haninan chinokan heDiosaloj, haxa ya' David inchejab'an ha' ch'ok yahawo texol. Ha' hunteq'an ti' hanin Yahawilinti'an chiwalan.

^v 34:23 Ha' ya' David tu' yechel chisyeti ya' yinh Komam Cristo.

25»"Chint'inhb'akanojan intratohan yet aq'ank'ulal yeb' anma Israel, chiwinilojan no' howla noq' sat istx'otx'; chi'eh sat tx'otx' kaw k'ul yinh sunil isk'ul, kat iskankano wayo xolaj q'eb'taj. 26 Chiwayojan isyaxil yib'anh makta ayayo yinhla ishoyanil wonhan wetan yehi, chiwani-paxayojan ha' nhab' yinh istz'ayikal, ha' nhab' chi'ay tu', kaw niman isyaxil chiyakanayoj. 27 Ha' te te' chiyaq' te' sat, chiyaq'ni tx'o tx'otx' sat tz'unub', chi'ehayo anma Israel sat istx'otx' yinh sunil isk'ul. Hayet chinkolilojan yul isq'ab' konhob' b'ay ayko chejab'oj, chiyohntanhelej ta haninti'an Yahawil hinan. 28 Matxa chi'elq'alaxto tzetaj ay yu nimeta konhob', yeb' xin mach chik'uxlaxkamo yu no' howla noq', wal xin chi'ehayo sat istx'otx' yinh sunil isk'ul, machi mak chixib'teni. 29 Ha' istx'otx' eb'naj kaw chib'inakanoy yuto kaw k'ul chu sat tz'unub', yuxin matxa chiyaq'le wahil yul iskonhob', matxa xin ch'el ispixan yu ej nimeta konhob'. 30 Hanin Yahawilinti'an chiwalan ta ayinikojan tek'atanh hex Israel hex ti', yuto hanin Yahawilinti'an haninan heDiosal, haxa hex Israel hex ti' inkonhob'an heyehi. 31 Hanin Yahawilinti'an chiwalan ta wetan heyehi, haninan chexintanhehan haka' istanhelax no' me' b'ay kaw ay telaj. Hex ti' anma hex, haninan heDiosal,"» xhi Komam Jahawil."

Hal-laxkano isya'tajil chi'ay yib'anh tx'otx' Seir

35 1 Hul istzoti' Komam Jahawil wetan, yalni haka' ti': 2 «Hach isk'ahol naj winaj, t'anhxanhto yinh yetk'ulal tx'otx' Seir kat hatzotel yib'anhilo isya'tajil chul yinh tx'otx', 3 chawalni haka' ti': "Hak ti' yalni Komam Jahawil:

Haninti'an chiwakojan inhowalan teyinh, hex ay hex b'ey tx'otx' chewal tx'otx' Seir.

Chiwayojan isya'tajil teyib'anh yinh sunil wipan, chinmeltzokanikojan hekonhob' ti' haka' tx'otx' desierto, kat yuchk'alaxkantoj.

4 Ha' hunteq'an konhob' ay yulaj ismajul tx'otx' Seir chintanhtzekanilojan, matxa mak chikankano sat tx'otx', hak tu' chu heyohntanheniloj ta haninti'an Yahawil hinan.

5»"Hex kaw naunhe heyako howal yinh eb'naj Israel, heyaniko yul isq'ab' kamikal yet kaw ayayo istatilal isya'tajil yib'anh eb'naj. 6 Yuxin hanin Yahawilinti'an chiwaq' b'inaho inb'ihan, chiwalnihan ta chexwakojan yul isq'ab' kamikal, chexistzumb'enik'o kamikal, yuto machi tz'ay hek'ul heyaq'ni maloto ischik'il anma Israel. 7 Chinmeltzokanikojan

» 34:11-31 Hayet lahwi yayk'aykano konhob' Jerusalén, matxataj isya'tajil yalik'o ya' profeta Ezequiel, wal xin ha' iskolni Komam Dios anma tu'. Ha' yinh tu' xin chitzotel hunteq'an capitulo tzujanilo yinta ti'.

tx'otx' chewal tx'otx' Seir haka' tx'otx' machi yahaw, chintanhtzenkanilojan hunteq'an konhob' ay yul ismajul tx'otx'. Chintanhtzenilojan makta chi'apni sat tx'otx' yeb'paxo makta chi'el sat tx'otx'. ⁸Xanhe chinohilo iswi'la witz yu kamom anma chitejlaxkamo yu espada, kat iskankano pak'no b'ey iswi'la wonhan yeb' satla ak'al, yeb' b'ey sunil isti'la ha nixhte ha'. ⁹Haninan chiwayojan isya'tajil teyib'anh yinh sunilb'al tiempo, matxa b'aq'inhal chiwatx'elaxkanh hekonhob' hunelxa, hak tu' chu heyohtanheniloj ta haninti'an Yahawil hinan.

¹⁰»"Hex ti' cheyala: 'Ha' tx'otx' Israel yeb' tx'otx' Judá, jet yeh tx'otx' iskab' majanil, chi'okkano tx'otx' ju waxanhka ayk'o Komam Jahawil b'ey tu', kexchi. ¹¹Yaja' hanin Yahawilinti'an chiwaq' b'inaho inb'ihan, chiwalnihan ta haka' yu ischiwako hek'ul heyaniko howal yinh Israel, hak tu' chexwutepaxojan. Hayet chiwilnihan tzet chexelikoj, chinyohtanhenilojan anma Israel. ¹²Cheyohtanheniloj hex ti' ta hanin Yahawilinti'an, chiwab'ehan yet chexb'uchwa yinh Israel yet cheyalni: 'Ha' konhob' ay b'ey tx'otx' chewal tx'otx' yul ismajul Israel kaw ma'uchk'alaxkantoj, haxa anma tu' ma'alaxiko yul koq'ab' yunhe kotanhtzenkaniloj,' kexchi. ¹³Kaw nime anma cheyute heb'a yinh insatan, kexok tzotelo winhan. Wab'ehan tzet heyalah,» xhi Komam. ¹⁴Hak ti' yalnipaxo Komam Jahawil: «Haninan chiwayojan isya'tajil teyib'anh yunhe istzala anma ay yulajla konhob' ay sat tx'o tx'otx'. ¹⁵Kaw sunil anma chitzalahi haka' yu hetzala yet yay isya'tajil yib'anh anma Israel. Hak tu' chexwutehan yet chiwanayojan isya'tajil teyib'anh, hex ay hex b'ey tx'otx' chewal tx'otx' Seir. Chiwanipaxayojan isya'tajil yib'anh sunil tx'otx' Edom, hak tu' chu heyohtanheniloj ta haninti'an Yahawil hinan,» xhi Komam Jahawil.

Ha' Israel chiwatx'elaxkanh yet b'aq'inh

36 ¹Tzotel Komam Jahawil wetan, yalni haka' ti': «Hach isk'ahol naj winaj, hal intzoti'an tet anma ay b'ey tx'otx' chewal tx'otx' ay yul ismajul Israel, chawalni: "¡Hex ay b'ey tx'otx' chewal tx'otx' ay yul ismajul Israel, ab'ewe istzoti' Komam!" kachi. ²Yalnipaxo Komam Jahawil haka' ti': "Ha' eb'naj ayko ishowal teyinh chiyal haka' ti': 'Ha' tx'otx' chewal tx'otx' ay b'ey hunteq'an nime witz nahat yekanh ay yul ismajul Israel, chi'okpaxkano tx'otx' komajuloj,' xhi eb'naj. ³Yuxin hal intzoti'an, chawalni: Hak ti' yalni Komam Jahawil: Hex ti' kaw sunil nimeta konhob' aq'ni howal teyinh, kexistanhtzenkaniloj, kexayk'aykano yul isq'ab' sunil nananta konhob'al, heb'ahlaxi, heb'uchlax yu anma ay yulajla konhob'. ⁴Yuxin hex ay hex b'ey tx'otx' chewal tx'otx' ay yul ismajul Israel, ab'ewe istzoti' Komam Jahawil: Hak ti' yalni Komam Jahawil tet ej hunteq'an witz, hunteq'an wonhan yeb' ej ha' nixhte ha', hunteq'an konhob' xa'uchk'alaxtoj, hunteq'an konhob' xa'ay isya'tajil yib'anh, yeb' tet hunteq'an konhob' b'ay machi anma, hunteq'an

konhob' elq'alaxto tzetaj aya, isb'uchlaxpaxo yu hunteq'an konhob' ayko yinhla ishoyanil. ⁵Hanin Yahawinti'an, yinh kaw yeli chintzotelan yu sunil inhowalan yinh hunteq'anxa nimeta konhob' yeb' yinh konhob' Edom, yuto ismajilo eb'naj intx'otx'an, kaw xin tzala eb'naj, yalni eb'naj intx'otx'an oko yu. Ischiwako isk'ul yinh inkonhob'an, istzumb'enilo anma ayayo sat tx'otx', ok anma tu' ischejab'oj. ⁶Yuxin hach Ezequiel, hal intzoti'an tet anma ay sat tx'otx' Israel yeb' tet anma ay yinhla istzalanil witz, yeb' b'ey ej wonhan yeb' tet anma ay isti'la ha' nixhte ha', yeb' tet anma ayayo satla ak'al, chawalni haka' ti': Hak ti' yalni Komam Jahawil: 'Haninti'an yinh sunil inhowalan chintzotelan, yuto hex ti' kexb'uchlax yu anma ay yulaj nimeta konhob'. ⁷Yuxin hanin Yahawilinti'an chiwalan ta xawakanh inq'ab'an waq'ni b'inaho inb'ihan walnihan ta ha' hunteq'an konhob' ayko yinhla hehoyanil ch'okkano yinh tx'ixwilal,' kachi.

⁸»'Wal b'ey iswitzlajil Israel xin, kaw chipohchakanokanh te' q'eb'taj, kat isto leno isq'ab' te', chiyaq'ni te' sat yunhe islohni inkonhob'an, yuto kaw toxa chimeltzo inkonhob'tu'an sat tx'otx' Israel. ⁹Yuto haninan chinokan heyetb'ihoj, chinmeltzohan tek'atanh; hex ti' haka' inmunilan yeb' intz'unub'an cheyukoj. ¹⁰Chiwaq' chib'ojan heb'isil hex Israel hex ti', kat ispohchakanh eb'naj winaj texol, kat hepohchakan yulajla hekonhob', kat iswatx'enkanh konhob' uchk'ab'iltoj. ¹¹Chiwaq'pohchahojan heb'isil, chiwaq'nipohchahojan henoq', kaw chich'ib'kanokanh heb'isil, kat hepohchakanokanh, kat heye b'ey tu' haka' yet payat. Chiwaq'nihan ek'b'al isk'ulal teyet sata yet yalanhtokanoj, hak tu' chu heyohtanheniloj ta haninti'an Yahawil hinan. ¹²Hex chewal tx'otx' yul ismajul Israel ch'ek'o xanhxon eb'naj Israel inkonhob'an teyib'anh, kat yehkanayo eb'naj b'ey tu' kat heyokkano ismajuloj, matxa b'aq'inhal xin chetanhtzelo yuninal inkonhob'ti'an.

¹³»'Hanin Yahawilinti'an chiwalan: Hex chewal tx'otx', ha' anma ay yul hunteq'anxa konhob' chala ta hex ti' chek'uxayto anma, chemaq'nikamo anma ay yul konhob'. ¹⁴Yaja' hanin Yahawilinti'an, chiwalan ta matxa b'aq'inhal cheb'iq'ayto anma, yeb' xin matxa b'aq'inhal chemaq'nikamo anma ay yul konhob'. ¹⁵Matxa b'aq'inhal cheyab'e isb'uchwa anma ay yulaj nimeta konhob' teyinh yeb' xin matxa chi'ilaxilo hepixan yu ej konhob'. Hanin Yahawilinti'an chiwalan ta matxa b'aq'inhal chemaq'kamo anma ay yul konhob',» xhi Komam.

¹⁶Lahwi tu' istzotelpaxo Komam Jahawil wetan, yalni haka' ti': ¹⁷«Hach isk'ahol naj winaj hayet ay anma Israel, sat istx'otx' yet yalanhtokanoj yetanto anma tx'otx' yu isb'eyb'al yeb' yu istx'ojal iswatx'e, yuto ha' isb'eyb'al tu' kaw yahb'eta yul insatan haka' istz'ilal yet chilni ix ix istx'awob'al. ¹⁸Wayojan inhowalan yib'anh yuto ismaq'kamo yet anmahil, yaq'ni maloto ischik'il sat tx'otx' yul iskonhob', yetanto tx'o tx'otx' yu istx'ojal iswatx'e yet yok yinoyo isb'a sata tioxh. ¹⁹Yuxin waq'

sajlemotojan yulajla nimeta konhob', ispujnakanto sunil yul sat yib'anhq'inal ti', wilnihan tzet elkaniko hatatik'a tzet isb'eyb'alnhe yeb' tzet iswax'e. ²⁰Haxa yet yapni yulajla nimeta konhob' b'ay apnikanoj yinilo ispixan inb'ihan kaw aykano yelapnoj, yuto ha' anma ay yulajla nimeta konhob' b'ay apni, halni haka' ti': "Ha' hunteq'an anma ti' iskonhob' Komam Dios Jahawil, yaja' xin ma'ilaxilo yul iskonhob'," xhi. ²¹Yaja' xin kaw ya' wab'ehan wilnihan yilaxilo ispixan inb'ihan yu anma Israel yulajla konhob' b'ay apnikanoj.

²²»Yuxin hal tet hawet konhob' Israel, hak ti' yute yalni Komam Jahawil: "Ha' tzet chinwax'ehan maxhtaj heyu Israel hex ti' yuxin inwax'ehan, wal xin yu inb'ihan kaw aykano yelapnoj, yuxin inwax'ehan; ha' ton inb'ihan heyilo ispixan xolaj nimeta konhob' b'ay kexapnikanoj.^x ²³Chinsajnehahan inb'ihan kaw aykano yelapnoj, ha' ton inb'ihan heyilo ispixan xolaj nimeta konhob'. Hanin Yahawilinti'an chiwalan ta chiyoh-tanhelo anma ay yulajla nimeta konhob' ta haninti'an Yahawil hinan yet chinsajnhen inb'ihan teyinh yinh sat anma tu'. ²⁴Haninan chexwilojan yulajla nimeta konhob', chexinkutxb'antijan sunil yul sat yib'anhq'in-al, chexwinitojan yul hekonhob'. ²⁵Chexinsajnehahan yu ha' sajla ha', chexinsajnhenkanojan yinh sunil heyahb'etajil, chexinsajnhenpaxkanojan yinh sunil hemul yet heyinayo heb'a sata hetioxh. ²⁶Chiwaq' ak'b'olojan heyanna, chiwaq'ni ak'b'olojan henab'al. Ha' heyanna kaw kaw haka' ch'en ch'en, chiwaq'an hune' seel kaw lab'an, isyijen tzet chiwalan. ²⁷Chiwanikojan Wespírituhan teyinh, chiwakojan yinh henab'al cheb'eyb'alnhen chejb'anile chiwaq'an, chek'ub'anpaxo kuyb'anile chiwalan, kat heyijen tzet chala. ²⁸Chexehayo sat tx'o tx'otx' waq'an tet heyichmam, kat heyok inkonhob'ojan, kat wokkanojan heDiosalaj. ²⁹Chexinkolilojan tet sunil isyahb'etajil kexetantoj, chiwalnihan ta chisatni ixim trigo, matxa xin chiwayojan wahil teyib'anh. ³⁰Chiwalnihan ta yilal chisatni te' lob'ehal, chiwalnipaxojan ta chisatni tz'unub' ch'el sat tx'o tx'otx', yunhe matxa b'aq'inh ch'el hepixan yu wahil sata ej nimeta konhob'. ³¹Chenanoti istx'ojal heb'eyb'al yeb' tzetaj mach k'ulo hewax'e yet yalanhtokanoj, kat hetx'ixwilo tet, yu istx'ojal yeb' isyahb'etajil hewax'e. ³²Hanin Yahawilinti'an chiwalan: Hex Israel hex ti' ohtanhewelaj ta maxhtaj yu k'ul hex yuxin chinwax'ehan hunteq'an ti', wal xin tx'ixwanhwej, kat istak hek'ul teyinh yu istx'ojal hewax'e.

³³»"Ha' istz'ayikal yet chexinsajnehakanojan yinh sunil hetx'ojal, chexwinitojan yul hekonhob', kat hekankano b'ey tu', chewax'enkanh hekonhob' uchk'alaxtoj. ³⁴Ha' hetx'otx' tz'inan yukanoj chexmunlaho sat

^x 36:22 Hayet yilaxto eb'naj Israel preso b'ey Babilonia yu ismul yako tet Komam Dios, ha' hunteq'anxa nan konhob'al istxumu' ta isDiosal eb'naj Israel mach yip; haxa tinanh xin chisyelo Komam ta ay yip iskolnilo iskonhob' yinh isya'tajil.

tx'otx', chiyaq'ni hetz'unub' sat, hak tu' xin chu yilni anma ch'ek' b'ey tu' ta ayxa tz'unub' sat tx'otx'. ³⁵Chalni anma tu' haka' ti': 'Ha' hune' tx'o tx'otx' ti' kaw tz'inan yukano tx'otx', yaja' wal tinanh ayxa tz'unub' sat tx'otx' kaw lahan jilni tx'otx' haka' peyab' Edén, ispeyab' Komam Dios. Haxa hunteq'an konhob' ti' ay isya'tajil yib'anh, yuchk'alaxkantoj yeb' xin kaw tz'inan yukanoj, ayxa anma sat, peb'ilpaxayoj,' xhi anma. ³⁶Ha' anma chitokan yulajla konhob' ayko yinhla hehoyanil chiyohthanhelej ta haninan Yahawilinti'an, chinwatx'ekanhan tzet uchk'ab'iltioj, chintz'unnoyjan tzet hok'b'ilkanh. Ha' hunteq'an ti' hanin Yahawilinti'an, chiwalan, chiyij isb'a wuhan.

³⁷»Yalnipaxo Komam Jahawil haka' ti': Hex Israel hex ti' chiwaq'paxojan tzet cheq'an hunelxa wetan. Chiwaq' ch'ib'ojan heb'isil haka' isphoch'a isb'isil no' me'. ³⁸Hex ti' lahan hex haka' no' me' chi'aq'lax wetan xahanb'alil yinh q'inh kaw aykano yelapnoj ch'ek'tzelax b'ey konhob' Jerusalén. Ha' konhob' kaw tz'inan yukanoj chinohilo heyu, hak tu' chu heyohtanheniloj ta haninti'an Yahawil hinan,» xhi Komam Jahawil.

Hunteq'an isb'ajil kamom anma kaw tajin yul hune' hokan

37 ¹Lahwi tu' yanayo Komam Jahawil isq'ab' wib'anhan, kinyini-tojan Yespíritu Komam yiktab'al hune' hokan, b'ay nohnayo isb'ajil kamom anma. ²Kinyijb'anik'ojan Komam sunil yinhla ishoyanil hunteq'an b'aj tu'. Ha' hunteq'an b'aj wilan yul hokan tu', kaw niman-kanoj yeb' xin kaw tajin sik'leb'il. ³Yalni Komam wetan:

—Hach isk'ahol naj winaj, ¿chimyululkanh isk'ul hunteq'an isb'ajil kamom ti'? xhi Komam.

Intaq'wihan:

—Mam Wahawil, hach hawohtaj, kinchihan.

⁴Yalni Komam wetan:

—Hal intzoti'an tet hunteq'an isb'ajil kamom ti', chawalni: “¡Hex isb'ajil kamom kaw tajin ti', ab'ewe istzoti' Komam Jahawil! ⁵Hak ti' yalni Komam Jahawil haka' ti': Haninan chiwaq'an jaq'eq' hehiq'a', kat yul hek'ul hunelxa. ⁶Chishunb'an isb'a heb'ajil, chiwaq'nihan ischib'ehal henimanil, chiwanikojan istz'umal henimanil, chiwaq'nihan jaq'eq' hehiq'a', kat yulkanh hek'ul, cheyohtanheniloj ta haninti'an Yahawil hinan,» xhi Komam, kachi, xhi Komam wetan.

⁷Walnihan istzoti' Komam tet hunteq'an isb'ajil kamom haka' yu yalni Komam wetan. Hayet lanhan intzotel tu'an wab'enan isb'ili yek' hune'

» 37:1 Hune' hokan nohna yu isb'ajil kamom, hune' ti' mach camposantohoj, wal xin ha' b'ey tu' oklena hune' howal, ha' tu' xin kankano pak'no isnimanil anma kam yinh howal tu'.

haka' txixkab', ishunb'an isb'a isb'ajil hunun kamom anma tu'. ⁸Wilnihan ta xa'ishunb'a isb'a b'aj tu' yeb' xin ayxa ischib'ehal yeb' istz'umal isnimanil; yaja' maxhto chishiq' jaq'eq'.

⁹Yalni Komam wetan: «Hach isk'ahol naj winaj, hal intzoti'an tet jaq'eq', chawalni: Hak ti' yalni Komam Jahawil wetan haka' ti': “¡Hach jaq'eq', titanh b'ay sunil yul sat yib'anhq'inal ti', kat hawayto yul hunteq'an nimanile kamnajilo ti'!” kachi,» xhi Komam wetan. ¹⁰Walnihan istzoti' Komam tet jaq'eq' haka' yu yalni Komam wetan. Ishiq'ni hunteq'an kamom anma tu' jaq'eq', yulkanh isk'ul, yah linhnoj, kaw nimankano isb'isil haka' jilnito hunu niman majan soldado.

¹¹Tzujan tu' yalni Komam Yahawil wetan: «Hach isk'ahol naj winaj, ha' sunil hunteq'an isb'ajil kamom anma ti' yechel konhob' Israel yehi. Ha' anma Israel ti' chala: “¡Hanhonh ti' tajinxa kob'ajil, kamnaxa tzet ayko yipo kok'ul, lanhan kotanhkanilo yinh hunelnhe!” xhi.» ¹²Yuxin hal intzoti'an tet anma Israel ti', chawalni: Hak ti' yalni Komam Jahawil: Hex Israel inkonhob'an, chexinhajiltijan b'ay mujan hex, chexwiniltijan b'ey tu', chexwaq'ni meltzohojan sat tx'otx' Israel. ¹³Hayet chinhajnihan b'ay mujan hex chexwiniltijan b'ey tu', cheyohtanheniloj hex Israel inkonhob'ti'an ta haninti'an Yahawil hinan. ¹⁴Chiwalan teyet ta chiwaq'an Wespírituhan teyinh, hak tu' xin ay hekawil, chexwaq'ni xewojan sat hetx'otx', cheyohtanheloj ta hanin Yahawilinti'an walan hunteq'an ti', kat yijni isb'a tzet chiwalan,» xhi Komam Yahawil.

Ha' Judá yeb' Israel hunxanhe konhob'al chi'elikoj

¹⁵Yul istzoti' Komam Jahawil wetan yalni haka' ti': ¹⁶«Hach isk'ahol naj winaj sayti hunu te te' b'ay chatz'ib'nheko haka' ti': “Yet konhob' Judá yeb' anma Israel ayiko yetb'ihó Judá tu',” chawutekoj. Lahwi tu' kat hawiniti hunxa te', kat hatz'ib'nheniko yinh te' haka' ti': “Yet ya' Efraín, ya' ayko selelo ya' José yeb' hunteq'anxa anma Israel ayko yetb'ihó,” chawutekoj. ¹⁷Lahwi tu', chahunb'an te' iskab'il, hak tu' xin hune'xanhe chi'eliko te' yul haq'ab'. ¹⁸Haxa yet chisq'amb'en hawet konhob' Israel, chalni: “¿Halilo jetanh tzet chalilo hune' ti'?” xhi. ¹⁹Chawalni tet, hak ti' yalni Komam Jahawil: “Chiwilojan te te' yet ya' José, te' ayko yul isq'ab' ya' Efraín, yeb' hunmajan anma Israel ayko yetb'ihó, chinhunb'an yeb' te' yet Judá, hak tu' xin hunxanhe chi'eliko yul inq'ab'an,” xhi Komam. ²⁰Ha' te te' b'ay kach tz'ib'li tu' ayko te' yul haq'ab' sata anma Israel, ²¹chawalni tet: Hak ti' yalni Komam Jahawil: “Haninti'an

^z 37:11 B'ey ti' mach chitzotel yinh yet chipitzk'akanh kamom yinh islahob'al tiempo, wal xin yechel yinh konhob' Israel. Yuto ha' Komam chikolni, kat yaq'ni meltzoho sat tx'otx' Canaán hunelxa, yet lahwi yek' eb'naj chejab'o b'ey Babilonia. Wal yinh yet chi'ititzb'i-kanh kamom, chu hawilni yinh 37:14; Dn. 12:2.

chiwilojan anma Israel, yulajla nimeta konhob' b'ay apnikanoj, chinkutx-b'anikojan sunil b'ayejtu'walil b'ay pujnakantoj, chiwinitijan sat istx'otx'.²² Hunxanhe konhob'al chi'elkaniko b'ey tx'otx' chewal tx'otx' sat tx'otx' Israel yeb' xin hunxanhe mak chi'ok yahawiloj, matxa b'aq'inhalt ti' kab' konhob'al chi'elikoj, matxa chispohle isb'a.²³ Matxa chiyetato isb'a yu hunteq'an tioxh b'ay yiyo isb'a, yeb' xin matxa chiyetato isb'a yu isyabh'etajil yeb' yu sunil istx'ojal iswatx'e yet yalanhtokanoj. Wal xin chinkolilojan tet sunil istx'ojal, hunteq'an istx'ojal iswatx'e, yaniko ismul yul insatan. Haninan chinsajnhokanojan yinh istx'ojal, kat yokkano inkonhob'ojan, haninan xin chinokan isDiosaløj.

²⁴»Ha' ya' David inchejab'an, ha' ya' chi'ok yahawo yinh eb'naj, yeb' xin hune'nhe mak chi'ok istanhemalo sunil, chisb'eyb'alnhen eb'naj chejb'anil chiwaq'an tet, chisk'ub'an tzet chiwalan, chisyijeni.²⁵ Chi'eh sat tx'o tx'otx' waq'kanojan tet ya' Jacob inchejab'an, tx'otx' b'ay eh yichmam eb'naj, tx'otx' b'ay eh paxo yuninal eb'naj yeb' yuninal yuninal eb'naj, ha' xin ya' David inchejab'an, ha' chi'ok tanhen sunilb'al ej tiempo.²⁶ Chint'inhb'akanojan intratohan yet aq'ank'ulal yeb' eb'naj, ha' hune' trato tu' aynhetik'a yinh sunilb'al ej tz'ayik. Chi'ehayo eb'naj sat istx'otx' yinh hunelnhe, chiwaq'nipohchahojan isb'isil, chiwanayojan watutan xol eb'naj yinh sunilb'al tz'ayik.²⁷ Ha' xol eb'naj chi'ehayo watutan, haninan chinokan isDiosaløj, kat yokkano eb'naj inkonhob'ojan.²⁸ Ha' ej nimeta konhob' chiyotanheløj ta hanin Yahawilinti'an chinsajnhokanojan anma Israel, kat yehayo watutan xol eb'naj yinh sunilb'al ej tiempo,» xhi Komam.

Hal-laxkano isya'tajil chul yib'anh naj rey Gog

38 ¹Yul istzoti' Komam Jahawil wetan yalni haka' ti': ²«Hach isk'ahol naj winaj, t'anhxanhto yinh yetk'ulal tx'otx' Magog, b'ay ay naj Gog isreyal konhob' Mesec yeb' Tubal, chawalni isya'tajil chiwayojan yib'anh naj Gog.» ³Chawalni: «Hak ti' yalni Komam Jahawil: Hach Gog yahawil Mesec yeb' Tubal, haninti'an chiwakojan inhowalan tawinh. ⁴Chiwayojan isya'tajil tawib'anh, chiwanikojan ch'en gancho yinh hati', chachwinilojan b'ey ti' yeb' sunil eb'naj hasoldado yeb' hacheh yet howal, yeb' eb'naj iq'b'il isch'en yet howal, chiyaq' howal yib'anh no', yeb' sunil eb'naj hasoldado kaw nimankano isb'isil, iq'b'il ch'en espada, ch'en escudo yeb' hunteq'anxa ch'en escudo, paves isb'i. ⁵Ha' xol tu' ayko eb'naj soldado ah Persia, ah Cus yeb' eb'naj ah Fut, sunil eb'naj tu', iq'b'il

^a **38:2** Gog. Hak tu' chal-lax yinh hune' naj mach kaw hab'ano yehi, yaja' sunil mak chis-tub'te naj howal yinh Komam Dios yeb' yinh iskonhob' Komam. Xol hunteq'an konhob' chi'ilcha yinh Gn. 10 konhob' Magog, Mesec, yeb' Tubal, ayko hunteq'an konhob' ti' xol yuninal naj Jafet. Gn. 10:2; 1Cr. 1:5; Ap. 20:8.

yespada, yeb' ayahto ch'en casco yinh iswi'. ⁶Ha' hunpaxo eb'naj ah Gomer yeb' sunil issoldado, yeb' eb'naj ah Togarma ay b'ey yinh yetk'ulal norte yeb' sunil issoldado, yeb' hunteq'anxa konhob' ayko hawetb'ihoj, hunteq'an kaw matxa chib'ischahi.

⁷»Wax'e hab'a kat hawiq'ni hach'en yet howal yeb' sunil eb'naj soldado ayko hawetb'ihoj, kat hawok yahawilo yinh eb'naj. ⁸Hayet chi'ek'to tx'i'al hab'il, chachani chejb'anil hawaq'ni howal yinh hune' konhob' kolb'ilxalo tet ch'en espada b'ay ay anma kutxb'ab'ilti yulajla konhob' b'ay sajlemitoj, yaja' xa'iskutxb'ako isb'a b'ey tx'otx' Israel tinanh. Hune' konhob' tu' kaw tx'i'al tiempo kaw tz'inlokanoj, haxa tinanh xameltzo anma sat istx'otx', kaw aq'ank'ulalxa yehi. ⁹Haka' hunu niman jaq'eq' nhab', hak tu' chu hawapni yinh hune' konhob' tu', yeb' xin haka' hunu niman moyan chimajnayo tx'o tx'otx' yu yenhel, hak tu' chu hawapni yinh, yeb' sunil eb'naj hasoldado kaw nimankano isb'isil, yeb' ej konhob', kaw tx'i'alkano isb'isil ayko hawetb'ihoj.

¹⁰»Hanin Yahawilinti'an chiwalan: Ha' yinh hune' tz'ayik tu' chi'oko istx'ojal yinh hawanma yeb' yinh hanab'al. ¹¹Chawalni: 'Chinahtojan waq'a'kojan howal yinh hune' konhob' mach chu iskolni isb'a, konhob' b'ay ay anma kaw tzalahilal yeb' kaw aq'ank'ulal yehi. Konhob' machi isk'ub'al, machi ispultahil, machipaxo isq'an h ispultahil,' kachi. ¹²Chinapnihan yinh hune' konhob' tu', chiwelq'antojan tzetaj aya, chiwitojan ch'en munlab'al yet howal, chiwanikojan howal yinh konhob' kaw tz'inan yukanoj yaja' wal tinanh ayxa anma, aypaxo no' wakax; ha' ton anma kutxiti yulajla nimeta konhob' b'ay pujanejtoj, yehayo yiktab'al ej konhob' tu'. ¹³Ha' anma ay b'ey konhob' Sabá yeb' b'ey Dedán yeb' eb'naj txonhom ay b'ey Tarsis yeb' sunil eb'naj yahawil, chisq'amb'en eb'naj tawet: '¿Tom makach hul eleq'? ¿tom hakutxb'ako sunil eb'naj hasoldado, makach hul yeb' eb'naj hawelq'ato ch'en ch'en yet howal ay yul konhob' ti', yeb' yu hawelq'anto ch'en plata yeb' ch'en oro yeb' no noq' yeb' tzetaj ay yul konhob' ti', kat hawinito sunil isq'alomal?' xhi eb'naj tawet,» xhi Komam.

¹⁴»Yuxin, hach isk'ahol naj winaj, hal intzoti'an tet naj Gog, chawalni: "Hak ti' yalni Komam Jahawil: Ha' yinh hunteq'an tiempo tu' yet chi'eh Israel inkonhob'an yinh aq'ank'ulal, ¿tom mach chawohtajoj xin? ¹⁵Chachtit b'ey tx'otx' norte b'ay ayach yeb' tx'i'al konhob' ayko hawetb'ihoj. Ha' sunil eb'naj hasoldado tu' ayahto eb'naj yib'anh cheh, kaw nimankano isb'isil eb'naj hasoldado tu', yeb' xin kaw ay yip eb'naj yinh howal. ¹⁶Chach ahapno yinh Israel, inkonhob'an, haka' hunu niman moyan chimajnayo tx'o tx'otx', kat yok yenheloj. Hayet islahob'al hunteq'an tz'ayik tu', chachwitijan hach Gog, kat hawul sat intx'otx'an, kat inyenilojan wipan tawinh sata nimeta konhob', yu kinyohtanhenilojan nimeta konhob' ti'.

17»"Yalnipaxo Komam Jahawil: ¿Tom maxhtaj hach ti' hach Gog, waq' b'inahojan yettax payat, yet inchejnihan eb'naj inchejab'an yalno intzoti'an xol anma Israel, yalni eb'naj ta chaxhwaq'tijan hawanoko howal yinh konhob' Israel xin? 18 Hanin Yahawilinti'an chiwalan ta ha' yinh hune' tz'ayik yet chihul naj Gog yaq'a'ko howal yinh konhob' Israel, kaw chititkano lemna inhowalan sik'leb'il. 19 Yuto xawalan yinh sunil inhowalan kaw ayxakano ismay, ta ha' yinh hune' tz'ayik tu' chi'ek' hune' niman txixkab' sat tx'otx' Israel. 20 Ha' sunil no' kay ay xol ha' mar, yeb' no' ch'ik chi'ek' satkanh yeb' sunil no noq' ay xolaj telaj, yeb' sunil no' lab'a chishatxik'o isk'ul sat tx'otx', yeb' sunil eb'naj winaj ay sat tx'o tx'otx', chiluylunkanh yu xiwkilal insatajan, kat yay wuyna witz yeb' ch'en nimeta ch'en, kat yay wuyna isk'ub'al konhob' tu' sat tx'otx'. 21 Hanin Yahawilinti'an, chiwalan: Ha' b'ey sunil iswi'la witz ay yul ismajul inkonhob'an chiwatojan espada yinh naj Gog, haxa hunun eb'naj issoldado naj chimeltzoko howal yinh yet soldadohal yeb' yespada. 22 Haninan chiwayojan isya'tajil yib'anh naj Gog yeb' yib'anh sunil issoldado naj, yeb' yib'anh sunil ej konhob' ayko yetb'ihonaj, chiwanitojan howla yab'il yinh, yeb' kamikal. Chiwanipaxayojan nimeta yaxnhab' yeb' ch'en nimeta sajb'at haka' ch'en ch'en, chiwanipaxtojan q'a q'a' yeb' azufre yib'anh. 23 Hak tu' chu inyenilojan sata tx'i'al nimeta konhob' wipan yeb' ta kaw niman welapnojan, chinyohtanhenilojan ta haninti'an Yahawil hinan," xhi Komam.

39 1»Hach, isk'ahol naj winaj, hal isya'tajil chiwayojan yib'anh naj Gog; chawalni ta hak ti' walnihan, hanin Yahawilinti'an: "Haninti'an chiwakojan inhowalan tawinh, hach Gog, yahawil konhob' Mesec yeb' konhob' Tubal. 2 Chiwayojan isya'tajil tawib'anh, chachwiji-b'antojan b'ey b'ay kaw nahat b'ey yetk'ulal norte, chachwinitojan b'ey iswi'la witz b'ey tx'otx' Israel. 3 Chiwinilojan halit' ayko yul hamekq'ab', chinmaq'nipaxilojan isb'aq' halit' ayko yul hawatx'q'ab'. 4 Haxa hach ti' yeb' hasoldado yeb' sunil konhob'la ayko hawetb'ihoj chexayk'ay xol howal, kat hekamkano iswi'la witz b'ey tx'otx' Israel, chiwaq'nihan hemanil ist'ojoto sunil ej no' ch'ik, kat kexisk'uxnito no' xoltelajil noq'. 5 Chexkankano pak'no sat tx'otx' xolaj munil, yuto hanin Yahawilinti'an, hankawinan chiwalan hunteq'an ti'. 6 Chiwayojan q'a q'a' yib'anh Magog yeb' yib'anh ej konhob' kaw aq'ank'ulal ye isti'la ha' mar, hak tu' chu yohtanheniloj ta haninti'an Yahawil hinan.

7»"Chinyelojan xol anma Israel inkonhob'an ta kaw nimankano yelapno inb'ihan, matxa b'aq'inhal xin chinchahan elo ispixan inb'ihan kaw aykano yelapnoj, chiyotnhenilo nimeta konhob' ta haninti'an Yahawil hinan, kaw aykano welapnojan, hanin isDiosal Israel. 8 Ha' tzet chiwalan ti', yilal yijni isb'a, hanin Yahawilinti'an chiwalan ta ha' yinh hune' tz'ayik tu' ha' yinh kintzotelkanojan.

9»"Ha' anma ay yulajla konhob' Israel chi'elto iskutxb'ako sunil ch'en yet howal; ch'en escudo chipahni q'obj'al, yeb' ch'en nimeta escudo, yeb' te' lit', yeb' isb'aq' lit' yeb' hunteq'an lit' chiq'ojlaxto yu q'ab'e yeb' ch'en lanza. Chiskutxb'ako anma hunteq'an tu', kat yalaxiko q'a' yinh, yulb'al xin hujeb' hab'il chitz'atoj. 10Matxa chiyij anma issi', matxa chistzok' issi' xolaj q'eb'taj, wal xin ha' ch'en ch'en yet howal chisnhus anma selelo te' si'. Hanin Yahawilinti'an chiwalan ta ha' anma Israel chimeltzo yul isq'ab' hunelxa tzet ilaxilo tet, chinilo tzet elq'alaxilo tet.

11»"Ha' yinh hune' tiempohal tu' haninan chiwaq'an b'ay chimujlax naj Gog yeb' sunil issoldado kaw nimankano isb'isil yul ismajul Israel, ha' ton hune' hokan b'ay ch'ek' anma ay satak'ti ha' mar. Ha' b'ey tu' matxa mak ch'ek'i, yuto ha' b'ey tu' chimujlax naj Gog yeb' sunil issoldado, kat yokkano Hamón-gog isb'ihoh hune' hokan tu'. 12Hujeb' ixahaw chiyito ismujlax kamom tu' yu anma Israel, hak tu' chu iswatx'ilo tx'otx' hunelxa. 13Sunil anma Israel chikolwa ismujni kamom. Hanin Yahawilinti'an chiwalan ta kaw aykano yelapno hune' tz'ayik yet chi'alaxiko inmayan xol anma Israel. 14Hayet chilahwi yek'to hujeb' ixahaw tu', chitolalax eb'naj winaj chito mujno isnimanil eb'naj soldado chikankano pak'no sat tx'otx' yul ismajul Israel, yunhe istz'isni eb'naj konhob'. 15Hayet chi'ilcha isb'ajil kamom yu anma chi'ek' sat tx'otx' Israel, kat yanikanayo eb'naj yechel b'ay ayejayo isb'ajil kamom tu', haxa eb'naj mujum kamom chi'initoj, kat ismujni eb'naj b'ey hokan chiyij Hamón-gog. 16Yeb'paxo xin, ha' hune' konhob' b'ay ay tu' chiyij Hamona, hak tu' chu istz'islaxkanh sat tx'otx' Israel yu eb'naj.

17»"Yalnipaxo Komam Jahawil: Hach, isk'ahol naj winaj, hal tet sunil hunun majan no' ch'ik, yeb' tet sunil no' xoltelajil noq': Kutxb'aweti heb'a sunil b'ayejtu'walil, kat hetit b'ey witz ay b'ey Israel b'ay chinpotx'kamojan eb'naj winaj haka'to chinwatx'ehan hunu niman xahanb'al yu helowi. Titanhwej k'uxwe chib'e, cheyuk'ni chik'. 18Chek'ux ischib'ehal isnimanil eb'naj winaj kaw ay yip, cheyuk'ni ischik'il eb'naj yahawil konhob' ay sat tx'o tx'otx' ti', haka'to chek'ux ischib'ehal no' icham me' yeb' no' yunin me', no' winaj chiw, no' wakax yeb' xin no' winaj wakax kaw b'aq'ich ay b'ey tx'otx' Basán. 19Cheloh ismantecahil eb'naj winaj chinpotx'kamojan masanta chinoh hek'ul, cheyuk'nipaxo chik' masanto chinoh hek'ul haka'to chexuk'ikanh yu, ha' hune' ti', lahan haka' hunu niman xahanb'al chinwatx'ehan teyet. 20Hanin Yahawilinti'an chiwalan ta chexwa' sat inmexhahan. Kaw chinoh hek'ul yu hek'uxni ischib'ehal no' cheh, chek'uxni ischib'ehal eb'naj soldado kaw ay yip chiyaq' howal yib'anh cheh, yeb' ischib'ehal isnimanil sunil eb'naj winaj yet howal.

21»"Chiwakojan isq'aq'al inmayan xolaj nimeta konhob', sunil nimeta konhob' chi'ilni ta haninan chiwilan tzet chi'eliko, chiyilni yip inq'ab'an yeb' chiwanayojan isya'tajil yib'anh. 22Hayet hune' tz'ayik tu' chi'ichiko

anma Israel yohtanheniloj ta hanin Yahawilinti'an, haninan isDiosal. ²³Chiyotnhenpaxilo nimeta konhob' ta ilaxto anma Israel preso yu ismul, yuto meltzoko manhk'omal wetan, yuxin web'ato insatan tet eb'naj, wanikojan eb'naj yul isq'ab' eb'naj ayko ishowal yinh, istanhilo eb'naj xol howal yu espada. ²⁴Inwatx'ehan yinh eb'naj haka'tik'a is-yahb'etajil iswatx'e yeb' ismanhk'omal wetan, web'antojan insatan tet eb'naj.

²⁵»Yaja' hanin Yahawilinti'an, chiwaq' meltzohojan anma titna yinh ya' Jacob, chiwinilojan eb'naj preso yehi, kat istz'ay ink'ulan yinh sunil anma Israel ti'. Hak tu' xin chu inyenilojan ta kaw xahan ay eb'naj wuhan, yuto kaw aykano yelapno inb'ihan. ²⁶Chitx'ixwikanh eb'naj yu ismul yeb' yu ismanhk'omal wetan yet chi'ehayo eb'naj sat istx'otx' yinh aq'ank'ulal, yeb' yet matxa mak chixib'ten eb'naj. ²⁷Yet chiwinilojan anma Israel yulajla konhob', chiwilojan sat istx'otx' eb'naj ayko ishowal yinh, chinkutxb'anikojan sat istx'otx' hunelxa. Hayet chinkutxb'anikojan eb'naj tu' kaw niman yelapno chi'elkaniko inb'ihan sata hunteq'an nimeta konhob'. ²⁸Ha' anma Israel chiyotnhenloj ta hanin Yahawilinti'an, yeb' xin haninpaxojan isDiosal yet chinkutxb'anikojan eb'naj sat istx'otx' hunelxa, machi hunu ti' chikankano yulajla nan konhob'al yet lahwi wanitojan preso yulaj nimeta konhob'. ²⁹Hanin Yahawilinti'an chiwalan ta matxa chiweb'ato insatan tet anma Israel, yuto chiwakojan Wespírituhan yinh anma Israel,» xhi Komam Jahawil.

5. YATUT KOMAM DIOS B'EY JERUSALÉN YINH ISTZUJANILXA (40:1—48:35)

Yelax yechel Yatut Komam Dios yila' ya' Ezequiel

40 ¹Hayet 25 (howeb' iskawinaj) hab'ilxa jilaxtojanh preso, yinh 10 (islahonheb') tz'ayik, yulb'al ixahaw yet yicheb'anil hab'il tu', yanayo Komam Jahawil isq'ab' wib'anhan, kinyinitojan b'ey tx'otx' Israel. Hayet yanayo Komam isq'ab' wib'anh tu'an 14 (kanhlahonheb'xa) hab'il istanhtzelaxilo konhob' Jerusalén. ²Wilan kinyinitojan Komam Dios b'ey tx'otx' Israel, kinyinahtojan iswi' hune' witz kaw nahat yekanh, wilnihan yib'anh witz tu' yinh yetk'ulal sur, hune' niman nha, haka' jilni hunu niman konhob'. ³Kinyinitojan Komam b'ey hune' konhob' tu', wilnihan hune' naj winaj kaw chitzejtzon jilni haka' istzejtzon ch'en bronce, linhankanh yinh sat pulta, iq'b'il hune' tx'anh tx'anh lino yul isq'ab', yeb' hune' te' ah ayko malb'alil. ⁴Istzotel hune' naj winaj tu' wetan, yalni naj: «Hach isk'ahol naj winaj kaw kam chawab'e yeb' kaw kam chawil tzet chinyehan tawet chawaniko hawanma yinh, yuto yu inyenihan hunteq'an ti' tawet, yuxin kach ilaxti b'ey ti'. Lahwi tu' chawalni sunil tzet chawil ti' tet anma Israel,» xhi naj wetan.

⁵Lahwi tu' wilnihan hune' k'ub' hoyaniko yinhla Yatut Komam Dios. Ha' hune' te' ah ayko malb'alil iq'b'il yu hune' naj winaj tu' oxeb' metro istel te'. Ismalen naj hune' k'ub' tu', oxeb' metro ispimal, oxeb'paxo metro yekanh istel. ⁶Lahwi tu', isto naj b'ey pulta ayko yinh yetk'ulal b'ay chi'ahilo tz'ayik, yahto naj yul q'och, yok naj ismaleno iswi' pulta; ha' hune' pulta tu', oxeb' metro sat, oxeb' metropaxo ispimal hune' yoyal, yeb' oxeb' metro hunxa yoyal. ⁷Ay oxeb' cuarto yinh q'axq'ep isk'ul yul pulta tu', oxeb' metro sat yeb' oxeb' metro ispak'ul hunun cuarto tu', haxa xolb'al hunun cuarto ay yikta yox metro. Haxa ismalil iswi'ta hune' pulta b'ay chonhokto yulikto tu', oxeb' metro sat. ⁸Ismalenspaxo naj pulta b'ay chonhokapno yul Yatut Komam Dios, oxeb' metro yul. ⁹Lahwi tu' ismalen naj yulikto yamaq'il, kanheb' metro yekoj, haxa yoyal, hune' metro ispimal, haxa ispultahil yamaq'il tu', yulikto aykoj. ¹⁰Haxa b'ey pulta ayko yinh yetk'ulal b'ay chi'ahilo tz'ayik ay oxeb' cuarto yinh q'axq'ep isk'ul, lahannhe xin ismalil hunun cuarto tu', yeb'paxo xin yamaq'il ayko yinh isq'axq'ep isk'ul, lahan ismalil. ¹¹Ismalen naj pulta, howeb' metro sat, haxa yamaq'il b'ay chonhokapnoj, yikta ishuj metro sat. ¹²Ha' isti' hunun cuarto yikta metro yekoj yinh q'axepal, haxa yinh q'axepxa yiktapaxo metro yekoj. Ha' sata hunun cuarto aykanh nixhte k'ub' yikta metro yekanh, yikta metropaxo ispimal. ¹³Ismalen naj pulta yib'anh iswi' hune' cuarto masanta b'ey hune'xa cuarto yetk'ulal istel yichinh ichiko ismalen naj masanta apni yetk'ulal istel yichinh hunxa cuarto, ay yikta yoxlahonheb' metro xolb'al kab'eb' cuarto tu'. ¹⁴Ismalen naj yoyal pulta, 10 (lahonheb') metro istel, lahan ismalil hunun oy hoyaniko yinhla yamaq'il pulta tu'. ¹⁵Haxa ismalil sata pulta b'ay chonhokapnoj masanta sata hune'xa pulta, yuliktoj b'ay chonhokto ay 25 (howeb' iskawinaj) metro. ¹⁶Ay xin isventanahil hunun cuarto, ha' ventanah tu' kaw txannhe sat, hakpax tu' b'itz'ab' ayko yinhla ishoyanil yulikto pulta, ay isventanahil, aypaxo isventanahil cuarto tu' sataj yinh isti'laj, yeb' xin ayleko isventanahil yinhla ishoyanil yuliktoj b'ay chonhoktoj. Ha' yinh hunun oy, ayko yechel te' palmera yelawiloj.

¹⁷Lahwi tu' kinyinitojan b'ey yamaq'il ay yintaltoj, wilnihan 30 (lahonheb' iskawinaj) cuarto yinhla ishoyanil yamaq'il tu', latz'b'ilayo xin ch'en ch'en yinhla ishoyanil yamaq'il tu'. ¹⁸Ha' b'ay latz'b'ilayo ch'en ch'en tu' ha' yamaq'il nahat yehayoj, chitaxin apni b'ey isb'itz'ab'il hunteq'anxa cuarto b'ay chonhokapnoj; ha' yamaq'il tu' haka'tik'a ismalil ispak'ul, hak tu' ismalil yepaxiko sat. ¹⁹Lahwi tu' ismalen naj xolb'al sata pulta ay b'ey yalanhaytoj masanta b'ey hunxa pulta ay yul, ay 50 (lahonheb' yoxk'al) metro ismalil yinh yetk'ulal b'ay chi'ahilo tz'ayik yeb' yetk'ulal norte.

²⁰Ismalenspaxo naj sat yeb' istel ispultahil isk'ub'al yetk'ulal norte. ²¹Ay xin oxeb' iscuartohal yinh q'axq'ep isk'ul; ha' yoyal yeb' ispetanil yib'anh

iswi' pulta, lahan ismalil haka' yamaq'il b'ab'el pulta yetk'ulal b'ay chi'ahilo tz'ayik. Ha' hune' yamaq'il yulikto b'ay chonhokto yul pulta tu' 25 (howeb' iskawinaj) metro yehikto istel, yikta yoxlahonheb' xin metro yeko sat. 22 Haxa isventanahil yeb' ispetanil yeb' yechel te' palmera, lahan ismalil haka' pulta ayko yinh yetk'ulal b'ay chi'ahilo tz'ayik, ay xin hujeb' sat isq'ochal b'ay chonhahtoj, haxa sata isq'ochal tu' aypaxo hunteq'an oy yeb' ispetanil yib'anh iswi'. 23 Ha' pulta b'ey yamaq'il Yatut Komam Dios, yuliktoj yamaq'il ayko satak'to pulta ayko yinh yetk'ulal norte, lahan ismalil pulta ayko yinh yetk'ulal b'ay chi'ahilo tz'ayik; ismalen naj xolb'al kab'eb' pulta tu', ay 50 (lahonheb' yoxk'al) metro xolb'al.

24 Lahwi tu', kinyinitojan hune' naj winaj tu' b'ey yetk'ulal sur, wilnihan hune' pulta b'ey tu', ismalen naj yamaq'il yeb' ispetanil iswi' yelawil oy, lahan xin ismalil yeb' hunteq'anxa. 25 Aypaxo isventanahil iscuartohal pulta tu', yeb' ispetanil yinhla ishoyanil haka' hunteq'anxa ventanah. Ismalen naj hunteq'an cuarto tu', 25 (howeb' iskawinaj) metro ispak'ul, 11 (hunlanheb') metro yok 25 centímetro sat.^b 26 Hujeb' sat isq'ochal b'ay chonhahapnoj b'ey hune' pulta tu', sata q'och tu' aypaxo ispetanil iswi' yoyal yamaq'il tu', yeb' xin ayko yechel te' palmera yinh ej q'axq'ep isk'ul. 27 Aypaxo xin pulta yinh yetk'ulal sur b'ey iskab' yamaq'il. Ismalen naj xolb'al kab'eb' pulta ayko yinh yetk'ulal sur tu', ay 50 (lahonheb' yoxk'al) metro xolb'al.

28 Lahwi tu' kinyinitojan b'ey pulta b'ay ay yamaq'il yul, b'ey yetk'ulal sur. Ismalen naj pulta tu', lahan xin ismalil haka' hunteq'anxa pulta. 29 Ha' iscuartohal b'ay chonhokapnoj, yeb' yoyal yeb' ispetanil iswi' yoyal, lahan ismalil yeb' hunteq'anxa. Ay xin isventanahil yeb' ispetanil iswi' ventanah tu' yinhla ishoyanil. 24 (Kanheb' iskawinaj) metro yeko ispak'ul hune' yokapno tu', haxa sat yikta yoxlahonheb' metro yekoj. 30 Ha' ispetanil yoyal yinhla ishoyanil, 25 (howeb' iskawinaj) metro istel, yikta yoxlahonheb' metro sat. 31 Ha' ispetanil, chitaelapno b'ey hunxa yamaq'il b'ey yintaltoj, aypaxiko te' palmera yelawilo yoyal, haxa hune' isq'ochal ayko waxajeb' b'ay chijayo joj jahapnoj.

32 Kinyinitojan b'ey yamaq'il ay yintaktoj, b'ey yetk'ulal b'ay chi'ahilo tz'ayik, ismalen naj pulta ay b'ey tu', lahan xin ismalil haka' hunteq'anxa. 33 Ha' iscuartohal, yeb' yoyal, yeb' ispetanil iswi' yoyal, lahan ismalil yeb' hunteq'anxa, ay xin isventanahil yeb' ispetanil yinhla ishoyanil, 25 (howeb' iskawinaj) metro ispak'ul, yikta yoxlahonheb' metro sat. 34 Ha' ispetanil chitaelapno b'ey yintalto yamaq'il, aypaxiko te' palmera yelawilo yoyal yinh q'axq'ep isk'ul, haxa isq'ochal waxajeb' b'ay chijayo joj jahapnoj.

^b 40:25 Hune' codo, lahan istel yeb' 45 centímetro.

³⁵Lahwi tu' kinyinitojan b'ey pulta ayko yinh yetk'ulal norte, ismalen naj yamaq'il tu', lahan xin ismalil yeb' hunteq'anxa. ³⁶Aypaxo iscuarto-hal, yeb' yoyal yeb' ispetanil yoyal, yeb' isventanahil yinhla ishoyanil yamaq'il tu'; 25 (howeb' iskawinaj) metro ispak'ul, yikta yoxlahonheb' metro sat. ³⁷Ha' yoyal chi'elapno b'ey hunxa yamaq'il, aypaxiko te' palmera yelawilo yoyal yinh q'axq'ep isk'ul. Haxa isq'ochal waxajeb' b'ay chijayo joj jahapnoj.

³⁸Ha' b'ey tu' ay hune' cuarto b'ey ispultahil yeb' yoyal yamaq'il b'ay chitx'ahlax no noq' ch'alaxiko xahanb'alil. ³⁹Ha' b'ey pulta b'ay chonh-okapnoj ay kab'eb' mexha yinh q'axq'ep isk'ul. Ha' yib'anh mexha tu' chipotx'laxkamo no noq' yinh xahanb'alil tet Komam Dios, chinhuslax-paxo hunteq'anxa no' chitohlan mule. ⁴⁰Ha' b'ey q'axq'ep ispak'ul b'ay chonhokapno yul pulta, ayko yinh yetk'ulal norte, yintalto q'och ay kab'eb' mexha, haxa yinh q'axepxa b'ay chonhokapnoj, aypaxo kab'eb'xa mexha. ⁴¹Kanheb' mexha q'axq'ep isk'ul pulta, yok kanheb'xapaxo mexha q'axq'epxa iskawilal pulta, yuxin ay waxajeb' mexha b'ay chipotx'laxkamo no noq'. ⁴²Ha' kanheb' mexha b'ay chipotx'lax no noq' chihaltelax yinh xahanb'alil tu' ch'en ch'en paq'b'il isk'ul latz'b'ilkanh, 75 (holahonheb' iskanhwinaj) centímetro sat, 50 (lahonheb' yoxk'al) centímetropaxo yekanh istel. Ha' yib'anh mexha tu' chi'alaxayo ch'en munlab'al chi-okniko yet chipotx'lax no noq' chihaltelax xahanb'alil. ⁴³Ha' yinh ay hunteq'an ch'en gancho, wajeb' centímetro sat ayko yinhla ishoyanil, haxa yib'anh mexha ayayo ischib'ehal no noq' chipotx'laxkamoj.

⁴⁴Lahwi tu' kinyinitojan naj yintak'to pulta yul Yatut Komam Dios, b'ey iskab' yamaq'il, iskawilal pulta ayko yinh yetk'ulal norte, ha' tu' ay iscuarto eb'naj b'itnom. Ha' hunteq'an cuarto tu' t'anhanto yinh yetk'ulal sur, haxa hune'xa cuarto xin ayko iskawilal pulta ayko yinh yetk'ulal b'ay chi'ahilo tz'ayik, ha' cuarto tu' t'anhapaxto yinh yetk'ulal norte. ⁴⁵Yalni naj wetan: «Ha' hune' cuarto t'anhanto yinh yetk'ulal sur, yet eb'ya' sacerdote, chitanhen Yatut Komam Dios. ⁴⁶Haxa cuarto t'anhanto yinh yetk'ulal norte, yet eb'ya' sacerdote chimunla b'ey ismexhahil yet xahanb'al, ha' ton eb'ya' isk'ahol ya' Sadoc, titna yinh yuninal ya' Leví, ha' eb'ya' tu' awteb'il yu ismunla yul Yatut Komam Dios, cuarto kaw txahulkanoj b'ay ayikto querubín,» xhi naj wetan.^c ⁴⁷Lahwi tu', ismalen naj yamaq'il, 50 (lahonheb' yoxk'al) metro ispak'ul, 50 (lahonheb' yoxk'al) metro sat, walpaxo ismexhahil xahanb'al xin sata yamaq'il Yatut Komam Dios ayayo.

⁴⁸Kinyinitojan naj b'ey yamaq'il Yatut Komam Dios, ismalen naj yoyal yamaq'il tu', yikta yox metro ispimal, haktik'apax tu' ismalil hune'xa

^c 40:46 Yulb'al istimpohal ya' rey David, ha' ya' Sadoc ayko yinh sacerdotelal yeb'paxo xin ya' sacerdote Abiatar. Haxa yet yinilo ya' Salomón ya' Abiatar yinh ismunil tu', haxanhe ya' Sadoc yeb' isk'ahol Ezequiel kankano yinh munil tu'. Is. 22:20-23; Ez. 44:15.

q'axepxa. Ismalenpaxo naj pulta, yikta iskab' metro sat, haktik'apax tu' ismalil q'axepxa. ⁴⁹Ha' yamaq'il tu', lahonheb' metro ispak'ul, waj-eb' metro sat. Ayko isq'ochal. Ay kab'eb' nime oy b'ey isti' pulta, hune' q'axep, yok hune'xa q'axepxa.

41 ¹Lahwi tu', kinyinitojan naj b'ey yul Yatut Komam Dios, ismalen naj yoyal ispultahil Yatut Komam, oxeb' metro ispimal yoyal q'axep pulta tu', oxeb'paxo metro ispimal hune'xa yoyal q'axepxa. ²Ha' issat pulta tu' howeb' metro, haxa isq'axepal pulta, yikta isyox metro sat, haktik'apax tu' ismalil q'axepxa. Lahwi tu' ismalen naj b'ab'el cuarto, ha' hune' cuarto tu', 20 (hunk'al) metro yeko ispak'ul, 10 (lahonheb') metro sat. ³Tzujan tu' yokto naj yul cuarto ayikto yul Yatut Komam, ismalen naj hunun yoyal pulta, ha' oy tu' hune' metro ispimal; haxa ispultahil oxeb' metro sat, haxa yamaq'il b'ay chonhokapnoj yul cuarto tu', yikta iskanh metro sat. ⁴Lahwi tu' ismalen naj ispak'ul cuarto tu' 10 (lahonheb') metro yekoj, 10 (lahonheb'paxo) metro sat. Yalni naj wetan: «Ha' hune' cuarto ti', ha' kaw ek'na txahulkanoj,» xhi naj.

⁵Lahwi tu' ismalen naj isb'itz'ab'il Yatut Komam Dios, oxeb' metro ispimal, haxa yinhla isk'ul ishoyanil Yatut Komam ay hunteq'an cuarto kab' metro yeko sat. ⁶Ha' hunteq'an cuarto tu' aykanh yib'anh hunteq'anxa, oxeb' piso yehi, haxa yinh hunun piso ay 30 (lahonheb' iskawinaj) cuarto. Haxa isb'itz'ab'il Yatut Komam Dios ayilto isti', chischale isb'a yeb' hunun piso. Haxa yib'anh hunteq'an tu', chi'okto ispatzab'il hunun cuarto, hak tu' xin machi chi'ek'to yib'anh b'itz'ab'. ⁷Ha' hunteq'an cuarto ayko yinhla ishoyanil tu', hunteq'an iskab' piso, nimajal yul sata hunteq'an yinh isb'ab'el piso. Haxa hunteq'an cuarto yinh yox piso niman yul, sata hunteq'anxa yinh iskab' piso. Ay hune' q'och, kotxkon yek'i, chi'ahito b'ey b'ab'el piso, kat yek'paxo b'ey iskab' piso masanto chi'ahapno yinh yox piso. ⁸Wilnihan hanta yekanh istel iskab' piso Yatut Komam Dios yinhla ishoyanil, iswatx'enilto eb'naj yet tz'uh yinh isti'la kab' piso, oxeb' metro yekanh istel. Iswatx'epaxo eb'naj hunteq'an cuarto yib'anh iscimientohal tu'. ⁹Ha' b'itz'ab' ayilto yinalto hunteq'an cuarto, yikta yox metro ispimal, haktik'apax tu' ismalil xolb'al hunteq'an cuarto yeb' isb'itz'ab'il Yatut Komam Dios yuliktoj. ¹⁰Ay xin hune' amaq' yinhla ishoyanil Yatut Komam, lahonheb' metro sat, ha' hune' amaq' tu', ayko xolb'al Yatut Komam yeb' hunteq'an cuarto. ¹¹Ha' hunteq'an cuarto ayko yinhla ishoyanil Yatut Komam, ay ispultahil chitaelapno yamaq'il, ay hune' pulta ayko yinh yetk'ulal norte yeb' hune' ayko yinh yetk'ulal sur. Ay xin yikta yox metro xolb'al Yatut Komam yeb' hunteq'an cuarto tu' sunil yinhla ishoyanil.

¹²Ay xin hune' nha sata yamaq'il ayko yetk'ulal b'ay chi'ahilo tz'ayik, ha' hune' nha tu', 30 (lahonheb' iskawinaj) metro sat, 45 (howeb' yoxk'al) ispak'ul, yikta yox metro ispimal isb'itz'ab'il yinhla ishoyanil.

¹³Lahwi tu' ismalen naj Yatut Komam Dios, 50 (lahonheb' yoxk'al) metro ispak'ul, ismalenpaxo naj yamaq'il yeb' cuarto tu' yeb' isb'itz'ab'il, 50 (lahonheb' yoxk'al) metropaxo ismalil. ¹⁴Ha' sata Yatut Komam yeb' yamaq'il ayko yinh yetk'ulal b'ay chi'ahilo tz'ayik, 50 (lahonheb' yoxk'al) metro ismalil.

¹⁵Tzujan tu' ismalen naj hune' nha ay yintalto Yatut Komam Dios yeb' hunteq'an cuarto ayko yinh q'axq'ep, 50 (lahonh yoxk'al) metro ismalil. Ismalen naj Yatut Komam ayikto yul yeb' yoyal yamaq'il. ¹⁶Ha' iswi' pulta, yeb' ventanah txannhe sat yeb' ej cuarto hoyaniko yinh Yatut Komam yinh oxeb' piso, aq'inte' te' ayko yinh, chi'ichiti te' yich masanta chi'ahapno yib'anh iswi' ventanah. Haxpax tu' ventanah aq'inte' te' ayko ventanahil. ¹⁷Ismalen naj yib'anh pulta masanta b'ey yul Yatut Komam Dios, ismalenpaxo naj yintalto Yatut Komam, yeb' sunil isb'itz'ab'il yinhla ishoyanil yul yeb' yintaj. ¹⁸Nohnako yinh sat sunil aq'inte' tu' yechel eb'naj querubín yeb' yechel te' ch'ib', ha' xolb'al hunun querubín, ayko yechel hunun te' ch'ib', haxa hunun querubín tu', kab'eb' sat. ¹⁹Ha' b'ab'el sat, lahan jilni haka' sat anma, t'anhanto yinh yechel te' ch'ib' yinh q'axep isk'ul, haxa hunxa sat lahan jilni haka' sat no' b'alam, t'anhanto yinh yechel te' ch'ib' yinh q'axepxa isk'ul. Hak tu' yeko yechel eb'naj querubín yeb' yechel te' ch'ib' yinh sunil ishoyanil Yatut Komam Dios. ²⁰Ha' yechel eb'naj querubín yeb' yechel te' ch'ib', chitaichiti sat tx'otx' masanta chi'ahapno yetk'ulal iswi' pulta, ha' yelawil tu' ayko yinh sunil isk'ul isb'itz'ab'il Yatut Komam Dios.

²¹Ha' hunun yoyal Yatut Komam Dios tu', kanheb' istxikin, haxa isti' b'ab'el cuarto yet Yatut Komam Jahawil, lahan jilni haka' isti' hune'xa cuarto, Ehob'al kaw Txahul. ²²Aypaxo hune' te' mexha yet xahanb'al yikta iskab' metro yekanh istel te', lahan ismalil ispak'ul yeb' issat, hune' metro yehi. Ha' hune' mexha tu' aq'inte' te' ayko yinh istxikin, yeb' yib'anh issat yeb' yinh isk'ul. Yalni hune' naj winaj tu' wetan: «Ha' ton hune' mexha ti' ayko sata Komam Jahawil,» xhi naj. ²³Ha' ispultahil b'ab'el cuarto Yatut Komam Dios yeb' ispultahil cuarto kaw txahulkanoj, kab'kab' ye ispultahil hunun. ²⁴Ha' hunun pulta tu' kab'eb' yiq'ni isb'a ha' hunun xaj pulta tu' ayko isvisagrahil, kab'eb' xaj yinh hune' pulta, kab'eb'paxo yinh hune'xa pulta. ²⁵Ha' yinh ispultahil Yatut Komam Dios, ayko yechel eb'naj querubín yeb' yechel te' ch'ib', lahan jilni haka' yeko yinh b'itz'ab'. Ha' b'ey yamaq'il yintalto patzab' te' aykanh iswi'oj. ²⁶Ha' yinh q'axq'ep isk'ul yamaq'il ayko ventanah txannhe sat, ha' yinh sat b'itz'ab' ayko yechel te' ch'ib'.

42 ¹Lahwi tu' kinyinitojan hune' naj winaj tu' b'ey yamaq'il yintaltoj, ayko yinh yetk'ulal norte. Kinyinitojan naj yul hunteq'an cuarto ayko sata yamaq'il hune' nha ayko yinh yetk'ulal norte. ²Ha' ismalil hunteq'an cuarto tu' yinh norte yinh sata pulta, 50 (lahonheb'

yoxk'al) metro yeko ispak'ul, yeb' xin 25 (howeb' iskawinaj) metro sat. ³Ha' sata yamaq'il 10 (lahonheb') metro sat ay yuliktoj, yeb' sata yamaq'il yintaltoj b'ay latz'b'ilayo ch'en ch'en, b'ay ay hunteq'an cuarto. Ha' hunteq'an cuarto tu', chilaischale isb'a isti', oxeb' piso yehi. ⁴Ha' sata cuarto tu' ay hune' yamaq'il yuliktoj, howeb' metro yekoj, yikta metro sat, haxa ispultahil hakanto yinh yetk'ulal norte. ⁵Ha' hunteq'an cuarto yinhahto yet yoxeb' piso, txannhe, sata hunteq'an yet iskab' piso yeb' yet isb'ab'el piso, yuto yexakto hunteq'an cuarto tu' yib'anh hunteq'anxa piso tu'. ⁶Yuto oxeb' piso yehi, mach xin yoyal haka' yoyal yamaq'il, yuxin txannhe hunteq'an cuarto yib'anh sata cuarto ay xolb'al, haxa hunteq'an xolb'al tu' txannhe sata hunteq'an cuarto ay yalanh. ⁷Ha' sata hunteq'an cuarto tu' ay hune' k'ub' 25 (howeb' iskawinaj) metro yeko ispak'ul, chitaelapno b'ey yamaq'il ay yintaltoj, ayko sata hunteq'anxa cuarto. ⁸Yuto ha' cuarto ay b'ey yamaq'il yintaltoj, 25 (howeb' iskawinaj) metro yeko ispak'ul, haxa cuarto ay yinhla Yatut Komam Dios, 50 (lahonheb' yoxk'al) metro yeko ispak'ul. ⁹Ha' ispultahil piso ay yalanh ayko yinh yetk'ulal b'ay chi'ahilo tz'ayik, ha' b'ey yamaq'il ay yintaltoj, ha' tu' ayko ispultahil tu'.

¹⁰Ha' sata isk'ub'al yamaq'il, yinh yetk'ulal b'ay ch'ahilo tz'ayik, yeb' sata hunteq'an nha tu' aypaxo hunteq'anxa cuarto. ¹¹Haxa isti' hunteq'an cuarto tu', lahan jilni haka' isti' hunteq'anxa cuarto ayko yinh yetk'ulal norte, lahanpaxo xin ispak'ul yeb' sat. Lahanpaxo xin ispultahil b'ay chonhokapnoj yeb' b'ay chonheliloj. ¹²Haktik'apax tu' jilni ispultahil hunteq'an cuarto ayko yinh yetk'ulal sur, ay xin hune' ispultahil ayko b'ay chi'ichiko isti' hunteq'an cuarto tu', ha' ton isti' ayko sata k'ub' ayko yinh yetk'ulal b'ay chi'ahilo tz'ayik. Ha' yul pulta tu' chi'okto mak chi'apni yul hunteq'an cuarto.

¹³Yalni hune' naj tu' wetan: «Ha' hunteq'an cuarto ay yinh yetk'ulal norte yeb' hunteq'an ay yinh yetk'ulal sur ayko sata yamaq'il machi iswi'. Ha' hunteq'an cuarto tu' kaw txahulkanoj, ha' b'ey tu' chislo eb'ya' sacerdote yeb'alq'ab'e ch'aq'lax tet Komam Jahawil, yuto ha' eb'ya' tu' chimunla yinh ismunil Komam. Ha' b'ey tu' ch'alaxpaxikto yeb'alq'ab'e ch'aq'lax tet Komam, yeb' xahanb'al ch'aq'lax yinh mule, yuto ha' hunteq'an cuarto tu' kaw txahulkanoj. ¹⁴Hayet chi'okto eb'ya' sacerdote yul Ehob'al kaw Txahulkanoj, mach chi'elto eb'ya' b'ey yamaq'il ay yintaltoj ta maxhto chiyilo eb'ya' xil isq'ap chakoj yet chimunla yinh ismunil yul Yatut Komam, yuto ha' hunteq'an xilq'ape tu', kaw txahulkanoj, wal xin nanxa xil isq'ap eb'ya' chako yinh, katto yelto eb'ya' xol konhob',» xhi naj wetan.

¹⁵Lahwi ismalenkano naj yul Yatut Komam Dios tu', kinyiniltojan naj yul isb'ehal pulta hakanto yinh yetk'ulal b'ay chi'ahilo tz'ayik. Yok naj ismaleno sunil yinhla ishoyanil. ¹⁶Ismalen naj yu malb'al yinh te' ah sunil

ishoyanil yinh yetk'ulal b'ay chi'ahilo tz'ayik, ha' b'ey tu' ay doscientos cincuenta metro ismalil. ¹⁷Tzujan tu' ismalen naj yinh yetk'ulal norte, ha' b'ey tu' ay doscientos cincuenta metro ismalil yinhla ishoyanil. ¹⁸Is-malenpaxo naj yinh yetk'ulal sur, aypaxo doscientos cincuenta metro ismalil yinhla ishoyanil. ¹⁹Ismalenpaxo naj yinh ishoyanil yetk'ulal b'ay chito tz'ayik, ha' b'ey tu' aypaxo doscientos cincuenta metro ismalil. ²⁰Is-malenpaxo naj iskanheb'al isk'ul. Ha' yinh sunil istx'otx'al Yatut Komam Dios tu', ay hune' k'ub' doscientos cincuenta metro yeko ispak'ul, doscientos cincuenta metro yeko sat. Ha' hune' k'ub' tu' xin chipohni xolb'al tzet ye tu' txahul yet Komam Dios, yeb' b'ay ay hunteq'an komon tzet ye tu'.

Ha' isq'aq'al yip Komam Dios chinohzenilo yul Yatut

43 ¹Lahwi tu' kinyinitojan hune' naj tu' b'ey pulita hakanto yinh yetk'ulal b'ay chi'ahilo tz'ayik. ²Wilnihan istit isq'aq'al ismay Komam Dios, isDiosal Israel yinh yetk'ulal b'ay chi'ahilo tz'ayik. Ha' isq'aq'al ismay tu' kaw ay yip isb'ili haka' ishaxon tx'i'al isnuq' ha ha', is-sajhopilo sat tx'o tx'otx' yu isq'aq'al ismay. ³Ha' tzet wilan tu', lahan jilni haka' hune' wilan yet yul Komam Dios yuchk'anoto konhob' Jerusalén, yeb' xin lahanpaxo haka' tzet wilan isti' ha' Quebar. Hayet wilnihan isq'aq'al ismay Komam Jahawil tu', way jahnojan, way xulnojan sat tx'otx'. ⁴Ha' isq'aq'al ismay Komam Jahawil tu', okapno jopla yul Yatut Komam yul pulita hakanto yinh yetk'ulal b'ay chi'ahilo tz'ayik. ⁵Kinyinikanhan Komam Espiritu, kinyinitojan b'ey yamaq'il yuliktoj, wilnihan isnohilo yul Yatut Komam Jahawil yu isq'aq'al ismay.

Chejb'anile yinh Yatut Komam Dios yilal isyijelaxi

⁶Ay xin hune' naj winaj linhankanh ink'atanhan, wab'enan istzotelilti Komam Jahawil wetan yul yatut. ⁷Yalni wetan: «Hach isk'ahol naj winaj, ha' ton b'ey ti' ay intronohan, ha' b'ey ti' chiwayojan ispaq'anil wojan. Ha' b'ey ti' chinehik'ojan xol eb'naj Israel yinh sunilb'al ej tiempo, matxa b'aq'inhal xin chi'ilaxilo ispixan inb'ihan yu konhob' Israel, ha' ton inb'ihan kaw aykano yelapnoj. Ha' eb'naj Israel ti' yeb' eb'naj isreyal eb'naj, matxa chinyintanhekaniltojan eb'naj yu yinayo isb'a sata tioxh b'ay nahat yekanh yeb' xin matxa chismuj eb'naj isreyal iskawilal watutan haka' yute eb'naj yet yalanhtokanoj. ⁸Yuto hayet ischalen isb'a istxikin iswi' ispultahil watutan yeb' iswi' ispultahil ispalacio eb'naj, iswatx'en eb'naj ispalacio tu' yinh isk'ul watutan; hune'ch'annhe b'itz'ab' chipohni xol watutan yeb' ispalacio eb'naj, yinilo eb'naj ispixan inb'ihan kaw aykano yelapnoj yet iswatx'en eb'naj isyabh'etajil, yuxin intanhtzelojan eb'naj yu inhowalan. ⁹Yaja' wal tinanh matxa ch'ok eb'naj yiq'ayo isb'a sata tioxh, nahat chisq'ojkanto eb'naj istx'ojal tu' yinh insatan, yeb' xin matxa chismuj eb'naj isreyal iskawilal watutan, yuto chinehayojan xol eb'naj yinh

sunilb'al ej tiempo. ¹⁰Hach isk'ahol naj winaj, yeh yechel watutan maxawil ti' tet konhob' Israel, chayeni ismalil yeb' yelawil yinh sat eb'naj, hak tu' xin chu istx'ixwikanh eb'naj yu ismul. ¹¹Ta xin chitx'ixwilo eb'naj yinh sunil ismul yako, wal tu' chawaq' yohtanhelo eb'naj yechel is-watx'eb'anil watutan, chawalni tzet ay yul, yeb' b'ay chonhoktoj yeb' b'ay chonheltoj; chawalni tzet jilni watuttu'an tet eb'naj, yeb' sunil chejb'anile yilal isyijelaxi. Chatz'ib'nheyo yechel watuttu'an yeb' chejb'anile tu' yinh sat eb'naj yunhe istxumnilo eb'naj, chisyijen eb'naj haka' hawalni. ¹²Ha' hunteq'an chejb'anile ti' yilal isyijelax yinh watutan: Sunil tx'otx' tzalan yinhla ishoyanil watutan kaw ek'na txahulkanoj,» xhi Komam.

¹³Hak ti' ismalil ismexhahil yet xahanb'al ay yul Yatut Komam Dios, ha' malb'al maleni, ha' ton malb'al wilan Yatut Komam Dios. Ha' is-cimentohal yich ismexhahil yet xahanb'al tu', yikta metro yehayto yul tx'otx', yiktapaxo metro sat, haxa isti'la ismexhahil yet xahanb'al tu' 25 (howeb' iskawinaj) centímetro yehilti isti'. Ha' yich ismexhahil yet xahanb'al tu' hak ti' ye haka' ti': ¹⁴Ha' ismalil chi'ichikanh yich xe', masanto chi'ahapno yalanh iskab' majan yich, hune' metro yekanh istel, haxa yinhla ishoyanil isti'laj, yikta metro yehiltij. Haxa hunxa yet yox majan yich, kab' metro yekanh istel, haxa ishoyanil isti'laj yikta metro yehiltij. ¹⁵Ha' ismexhahil yet xahanb'al tu', kab' metro yekanh istel, aypaxo kanheb' yuk'a', hune' yinh hunun istxikin. ¹⁶Ha' mexha yet xahanb'al tu', wajeb' metro ispak'ul, wajeb'paxo metro yeko sat, lahannhe ismalil yinh iskanheb'al istxikin. ¹⁷Haxa hune' yox yich hujeb' metro yeko ispak'ul, hujeb'paxo metro yeko sat, yinh iskanheb'al istxikin, lahannhe ismalil, haxa isti' ayilti yinhla ishoyanil 25 (howeb' iskawinaj) centímetro yehiltij, haxa yich yinhla ishoyanil, yikta metro. Haxa isq'ochal yinh yetk'ulal b'ay chi'ahilo tz'ayik aykoj.

¹⁸Lahwi tu' yalni Komam Jahawil wetan: Hach isk'ahol naj winaj, hanin Yahawilinti'an, chiwalan: «Hayet istz'ayikal b'ay chiwatx'i mexha yet xahanb'al tu' yilal isyijelax hunteq'an chejb'anile ti': Ha' yib'anh ismexha yet xahanb'al tu', chinhuslax no noq' xahanb'alil, kat istxihlax-ayo ischik'il no' yib'anh. ¹⁹Cheyaq'ni hunu no' tzehla wakax tet eb'ya' sacerdote levita titna yinh yuninal ya' Sadoc, ha' ton eb'ya' chihitziko ink'atanhan, chimunla yinh inmunilan yu yaq'ni no' xahanb'alil wetan, yu yaq'ni tanho mule, ha' hunteq'an ti' hanin Yahawilinti'an chiwalan. ²⁰Lahwi tu' chiyinikanh eb'ya' sacerdote tu' hanik' ischik'il no', chismasniko eb'ya' yinh iskanheb'al yuk'a' mexha yet xahanb'al tu', yeb' yinh iskanheb'al istxikin, yeb' yinhla ishoyanil isti' mexha yet xahanb'al tu', yunhe saj chi'elkaniko hune' mexha tu'. ²¹Lahwi tu', cheyinilo no' wakax aq'lax istoholo mule, chenhusni no' yintalto watutan b'ey hune' tx'otx' ixtanhxa tik'a yehi, haka' yalni chejb'anile aq'b'ilkano wuhan. ²²Haxa yet iskab' tz'ayik, cheyalte hunu no' chiw winaj machi istzaka'il

yinh xahanb'alil, yu yaq'ni tanho mule, chissajnhen eb'ya' mexha yet xahanb'al yu ischik'il no', haka' yu issajnhen eb'ya' yu ischik'il no' tzehla wakax. ²³Hayet chilahwi heyalten no' chiw yinh xahanb'alil tu', cheyaltenpaxo hunuxa no' wakax tzeh, mach istzaka'il aykoj, yeb' hunuxa no' me' winaj machi istzaka'il. ²⁴Cheyalte no' yinh xahanb'alil wetan, hanin Yahawilinti'an. Chayo eb'ya' sacerdote atz'am yib'anh no', chisnhusni eb'ya' no' xahanb'alil wetan. ²⁵Hunun tz'ayik yulb'al hujeb' tz'ayik, cheyalte hunu no' chiw winaj yinh xahanb'alil ch'aq'ni tanho mule, cheyaltenpaxo hunu no' wakax tzeh yeb' xin hunu no' me' winaj machi istzaka'il aykoj, yinh xahanb'alil tu'. ²⁶Hujeb' tz'ayik cheyalte xahanb'al wetan yunhe issajb'ikano hune' mexha yet xahanb'al tu' kat yokkano yinh inmunilan. ²⁷Hak tu' cheyute yulb'al hujeb' tz'ayik, haxa yinh iswaxajeb' tz'ayik chiyalten eb'ya' sacerdote xahanb'al yib'anh mexha yinh ismul konhob', chiyaltenpaxo eb'ya' yeb'alq'ab'e yet aq'ank'ulal yinh tzalahilal. Ha' hunteq'an chejb'anile ti', hanin Yahawilinti'an chiwalan,» xhi Komam.

44 ¹Lahwi tu', kinyiniltojan hune' naj winaj tu' hunelxa b'ey pulta ay yintalto Yatut Komam Dios, ha' ton pulta ay yinh yetk'ulal b'ay chi'ahilo tz'ayik. Ha' hune' pulta tu' pehan. ²Yalni Komam wetan: «Ha' hune' pulta ti' chipehikanoj machi hajlaxi, machi hunu winaj ti' chi'okto yul hune' pulta ti' yuto hanin Yahawilinti'an isDiosal Israel, haninnhech'anan chisje woktojan yul hune' pulta ti', yuxin chimajikanoj. ³Kachannhe naj yahaw konhob' chisje yapni tz'onhno wa'o pan b'ey tu' insatajan, hanin Yahawilinti'an, yet chisk'uxni naj xahanb'al. Yaja' ha' b'ey pulta ay b'ey yamaq'il, ha' tu' chi'okto naj, ha' b'ey tu' xin chi'elpaxti naj,» xhi Komam.

⁴Lahwi tu' kinyinitojan hune' naj winaj tu' b'ey pulta ayko yinh yetk'ulal norte ayko sata isti' Yatut Komam. Wilnihan isnohilo yul Yatut Komam Jahawil yu isq'aq'al ismay Komam; way jahnojan, way xulnojan sat tx'otx'. ⁵Yalni Komam Jahawil wetan: «Hach isk'ahol naj winaj, kaw kam chawila yeb' kaw kam chawab'e yinh chejb'anile chiwalan tawet yinh watutan. Kaw kam chawila mak ch'oktoj yul watutan yeb' mak chi'eltoj. ⁶Chawalni tet anma Israel, anma kaw manhk'omkanoj: “Hak ti' yalni Komam Jahawil: Hex ah Israel, b'ejwekano hewatx'en isyabh'etajil. ⁷Hex ti' cheyetato watutan yet cheyinikto anma nan konhob'al yul watutu'an, ha' ton hunteq'an machi yechel circuncisión yinh isnimanil yeb' yinh yanma. Cheyetato watuttu'an yet cheyalten ixim pan xahanb'alil wetan yeb' ismantecahil no noq' yeb' ischik'il no', chemanhk'on trato t'inhb'ab'ilkano wuhan yeb' hex, chewatx'en sunil isyabh'etajil. ⁸Hex ti' mach cheyije chejb'anile walkanojan yinh tzetaj ye tu' kaw txahulkano wetan yehi, wal xin ha' yul isq'ab' anma nan konhob'al heyako munil yilal isyijelax yul watuttu'an.

9»"Hanin Yahawilinti'an chiwalan ta machi hunu yuninal anma nan konhob'al ay texol hex Israel hex ti' chi'okto yul watutan, ha' ton hunteq'an mach yechel circuncisión yinh isnimanil yeb' yinh yanma. 10Wal eb'naj levita isphilo isb'a winhan yet kinisb'ejnikanojan anma Israel yok yinoyo isb'a sata tioxh, ha' eb'naj tu' chíkanto eb'naj ismul yib'anh. 11Ha' eb'naj levita tu', chisje yok eb'naj istanheno ispultahil watutan, yeb' yinh hunuxa munil yul watuttu'an. Chisje ispotx'nikamo eb'naj no noq' chi'alaxiko xahanb'alil yul watutan, ha' ton no' chiyaq' konhob' yinh xahanb'alil. Yilal hinan eb'naj ismunla haka' yalni konhob'. 12Yuto eb'naj levita tu' ok eb'naj yiq'ayo isb'a sata tioxh, hak tu' yu yaq'ni ayk'ayo eb'naj konhob' Israel yinh istx'ojal, yuxin hanin Yahawilinti'an wikanh inq'ab'an walnihan ta chiyikanto eb'naj levita tu' ismul yib'anh. 13Mach chisje yok eb'naj yinh inmunilan yinh sacerdotahal insatajan, yeb' xin mach chu ishitziko eb'naj isk'atanh tzetaj ye tu' kaw txahul yeb' hunteq'an kaw ek'nakano txahulkanoj, wal xin chiyikanilo istx'ixob'al eb'naj yu isyahb'etajil iswatx'e. 14Yuxin ha' eb'naj levita tu' chiwakojan yahawilo yinh istanhen watutan, yeb' xin ha' eb'naj chiwatx'en komon munil yilal iswatx'elax yul watutan.

15»"Yaja' wal eb'ya' sacerdote levita, isk'ahol ya' Sadoc, eb'ya' k'ub'an chejb'anile yul watutan yet ispohnilo isb'a konhob' Israel winhan, ha' eb'ya' chimunla yinh insatan. Hanin Yahawilinti'an chiwalan ta ha' eb'ya' isk'ahol ya' Sadoc tu' chihalten ismantecahil no noq' yeb' ischik'il no' xahanb'alil wetan. 16Ha' eb'ya' tu' chi'okto yul watutan kat ishitziko eb'ya' isk'atanh inmexhahan, yu ismunla yinh inmunilan, chisyijen eb'ya' inchejb'anilan. 17Hayet chi'okto eb'ya' yul pulta ay b'ey yamaq'il yuliktoj, yilal yaniko xil isq'ap lino yinh, mach chu yaniko xilq'ape lana yinh yet chi'okto yul pulta ay b'ey yamaq'il yuliktoj yeb' yet chi'okto eb'ya' yul watutan. 18Chiyahto eb'ya' q'ap q'ap nab'a lino yinh iswi', chiyaniko q'ap yul wexe nab'a lino yinh. Mach chu yaniko eb'ya' q'ap xilq'ape kaw pim yinh yunhe mach chi'el ha' yinh eb'ya'. 19Haxa yet chi'elto eb'ya' b'ey yamaq'il yintaltoj b'ay ay konhob', yilal yinilo eb'ya' xil isq'ap ayko yinh yet chimunla yul watutan; chanikano eb'ya' xil isq'ap chiyilo tu' b'ey hune' cuarto, nanxa xin xilq'ape chako eb'ya' yinh yet chi'elto sata konhob', yunhe mach chi'okkano ismay hunteq'an xilq'ape yinh konhob' tu'. 20Mach chu yinilo eb'ya' xil iswi', yeb' xin mach chu yaq'ni ch'ib'opaxo eb'ya', wal xin ha' istxam xil iswi' tu' chu isk'upniloj, yunhe mach chich'ib'i. 21Mach hunu eb'ya' sacerdote ti' chisje yuk'ni vino yet chi'okto yul yamaq'il yuliktoj watutan. 22Mach chu yiq'ni eb'ya' hunu ix hunix kamnaxa yichamil yixaloj, maka hunu ix ix xab'ejlaxkano yu yichamil; wal xin hanhk'anhe hunu ix q'opo ah Israel, maka hunu ix yixal hunu ya' kamom sacerdote, chisje yiq'ni eb'ya'. 23Ha' eb'ya' sacerdote ti' chikuyni inkonhob'an istxumnilo b'aytet wetan yehi yeb' b'aytet mach wetojan,